

Leukah' mun' ren'kawn tem' Mahtae

Ceucat Eun Yesu' na' ce

¹ Aen' meuh a muis ce ceucat Eun Yesu' Hkrit na' ce. Yesu' meuh Eun peue suip' ceucat eun Davit', Davit' eun meuh peue suip' ceucat eun Abraham.

² Abraham eun meuh kuiing' eun I'cak'.

I'cak' eun meuh kuiing' eun Yakop'.

Yakop' eun meuh kuiing' eun Yu'dah mae' awng' eun na' ce.

³ Yu'dah eun meuh kuiing' ka Hparae' mae' Sera'.

Ma ka ka muis Taman.

Hparae' eun meuh kuiing' eun Hes'ron.

Hes'ron eun meuh kuiing' eun Ram.

⁴ Ram eun meuh kuiing' eun Ami'nada'.

Ami'nada' eun meuh kuiing' eun Nason.

Nason eun meuh kuiing' eun Salamon.

⁵ Salamon eun meuh kuiing' eun Baw'ya'. Ma eun ka muis Rahab.

Baw'ya' eun meuh kuiing' eun Obet. Ma eun ka muis Ru'hta'. Obet eun meuh kuiing' eun Yesae'. ⁶ Yesae' eun meuh kuiing' eun hkun'haw'hkam' Davit'.

Davit' eun meuh kuiing' eun Saw'lamon. Ma eun Saw'lamon ka tawn meuh beun' eun U'ri'ya.

⁷ Saw'lamon eun meuh kuiing' eun Rehoboam.

Rehoboam eun meuh kuiing' eun Abi'ya.

Abi'ya eun meuh kuiing' eun Asa.

⁸ Asa eun meuh kuiing' eun Yaw'sahpa'.

Yaw'sahpa' eun meuh kuiing' eun Yeho'ram.

Yeho'ram eun meuh kuiing' eun U'siya'.

⁹ U'siya' eun meuh kuiing' eun Yo'tam.

Yo'tam eun meuh kuiing' eun Ahas.

Ahas eun meuh kuiing' eun Hesaki'.

¹⁰ Hesaki' eun meuh kuiing' eun Manase.

Manase eun meuh kuiing' eun Amon.

Amon eun meuh kuiing' eun Yo'si'.

¹¹ Yo'si' eun meuh kuiing' ce Yehkaw'ni' bae awng' eun na' ce. A meuh cu yam meuh ce mhai' nang kuiing' Babu'lon na'.

¹² Hawc' ka yam meuh ce mhai' nang kuiing' Babu'lon na',

Yehkaw'ni' eun meuh kuiing' eun Shealtiel'.

Shealtiel' eun meuh kuiing' eun Yeru'babel.

¹³ Yeru'babel eun meuh kuiing' eun Abi'o'.

Abi'o' eun meuh kuiing' eun E'lakim.

E'lakeng eun meuh kuiing' eun Ashaw.

¹⁴ Ashaw eun meuh kuiing' eun Sado'.

Sado' eun meuh kuiing' eun Akim.

Akim eun meuh kuiing' eun E'li'o'.

¹⁵ E'li'o' eun meuh kuiing' eun E'lasa.

E'lasa eun meuh kuiing' eun Mahtan.

Mahtan eun meuh kuiing' eun Yakop'.

¹⁶ Yakop' eun meuh kuiing' eun Yo'saep. Yo'saep eun meuh me eun Mari'. Mari' eun meuh ma Eun Yesu' ku' klawng peue Eun muis Hkrit* na' Eun.

¹⁷ Kop awn' na, tang' neum cu eun Abraham na' rot ti cu eun Davit' na' a kue' kul'pun' cu. Tang' neum cu eun

* **1:16** 1:16 A'ko' Mesi'ya, vangdoh' ka "Hkrit" (leukah' Helasa') mae' "Mesi'ya" (leukah' Hebrae') na' a meuh "peue pun ri leuk ri uin'."

Davit' na' rot ti yam meuh ce mhai' nang kuing' Babu'lon na' a kue' kul'pun' cu. Tang' neum yam meuh ce mhai' leuvaee nang kuing' Babu'lon na' rot ti cu Eun Hkrit na' a kue' kul'pun' cu.

Yesu' Hkrit keut' Eun

¹⁸ Lawng Yesu' Hkrit keut' Eun na' yeuh a ki', Mari' ma Eun na' meuh eun kon'hk'ih' yeuh kati ri kaw ti Yo'saep eun. Daecti yam un' nang ut' ka tiduih' seun' hpo'me na', Mari' eun nyhel' kopti meuh a Cit' seunga' chak' na'. ¹⁹ Kopti Yo'saep seula eun na' meuh eun peue leupaws seumeu' eun un' sum' kah kon'hk'ih' ri na' eun kaic nanggal' peue na', eun kuit ri kaw dit' ti yeuh kati na' hawc'.

²⁰ Daecti yam buih kuit eun a yeuh keutit' na', in'hpom Eun Peucawo' ti peue eun pucti lih lah' a hk'a'naee vang it' eun ri leumu na', "Yo'saep kon' Davit', pawlaee lhat' ri kaw mi ti Mari' eun meuh beun' ri. Nyhel' eun kon' nang keuteul ri na' meuh a kopti Cit' seunga' chak' na'. ²¹ Kaw eun keut' kon' me ti peue. Mi na' kah ri ghuk' Eun muis Yesu'†, kopti kaw Eun teum'kawm peue ceu ri na' ce lawtpon hk'ai' map' ri na'."

²² Ceu nang aen' ce gawm'euc' meuh a neumneum seun' ku' Peucawo' lah' Eun ri uin' ri suip Eun ri cu peue suip leukah' ri na' eun na'. ²³ Eun lah', "Keue', kon'hk'ih' plot'lon ti peue na' kaw eun nyhel'. Eun na' keut' kon' me ti peue. Peue kaw lah' Eun muis I'manuela'."‡ (Vangdoh' ka na' a lah', "Peucawo' ut' Eun mae'e'.")

²⁴ Yam Yo'saep hk'awn' eun hk'ai' it' ri na', eun ku hot' ri yeuh seun' ku' in'hpom Eun Peucawo' na' tuil' eun leukah' ri heun na'. Eun ti Mari' eun meuh beun' ri. ²⁵ Daecti eun

† 1:21 1:21 "Yesu'" na' meuh a leukah' Helasa', a ing' neum leukah' Hebrae' lah' ri meuh "Yaw'su'" na', vangdoh' ka na' a meuh "Peucawo' Cawo' htut."

‡ 1:23 1:23 I'saya' 7:14

hkuin' nang it' maeé heun cu yam Kon' me awn' un' nang keut' Eun na'. Kon' me awn' na' Eun tawl' keut', Yo'saep eun ghuk' Eun muis Yesu'.

2

Peue kue' cu'yi na' ing' ce ri kon' nyom aet' Yesu' Eun

¹ Hawc' ka yam Yesu' keut' Eun nang yung' Baelaehaem kuing' Yu'da hk'a'naee cu eun hkun'haw'hkam' Herot' na', a kue' peue kue' cu'yi ce kuh' neum hk'a'lih seunyi na' ce heul' rot nang veng Yeru'salaem na'. ² Ce mhaing', "Kon' nyom aet' keut' Eun kaw meuh Hkun'haw'hkam' ce peue Yu'da na' Eun ci' ut' tawngnhaw'? Yam ut' ye hk'a'lih seunyi na' pun ye ri nyu seumeueng' Eun na'. Ye kaw heul' faee' Eun."

³ Yam hkun'haw'hkam' Herot' mhawng' eun leukah' awn' a na', eun hpum' suksak nyawk'. Saec' meuh peue veng Yeru'salaem na' ce gawm'euc' ce ku pa' ri hpum' suksak maeé heun yeut. ⁴ Cawo' Herot' eun klawng ro' ce peue jhawp' rit keuting ce peue Yu'da maeé ro' ce peue guil leukah' ritroe ce na' ce hk'om. Eun mhaing' ce, "Mesi'ya* Eun ci' kaw keut' tawngnhaw'?" ⁵ Ce top' a ri heun, "Kaw Eun keut' nang yung' Baelaehaem kuing' Yu'da na', kopti peue suip leukah' Eun Peucawo' na' tem' eun ri uin' a yeuhki',

⁶ 'Yung' Baelaehaem ut' nang kuing' Yu'dah na' mi,
 hpaw mi ca' kaw aet' hk'ai' peue hk'a'naee vang
 u'peung ce kuing' Yu'da na',
 kopti Cawo' u'peung ti peue na' kaw Eun pucti lih
 hk'a'naee mi.

* 2:4 2:4 A'ko' Hkrit

Eun kaw meuh nang teuk' va peue ceu Ui' Ísarela' na' ce seun' cawo' go' kon'yung' na' teuk' va eun kon'yung' ri na' ko'."†

⁷ Hawc' ko', cawo' Herot' eun klawng' geup' peue kue' cu'yi na' ce ing' ri ti. Eun mhaing' ce ri yam seumeueng' na' puc a ri lih meulamlam ri na'. ⁸ Hawc' ko', eun kah ce heul' nang yung' Baelaehaem na'. Eun tuil' leukah' lah' a ri ce, "Heul' sok ri nom'nawk kon' nyom aet' awn' Eun reu'. Hawc' pun pé ri nyu Eun na', saec' ui' ri punta kaw ui' heul' faeé Eun na', pé na' tang ing' lah' ui' mhawng' a awh."

⁹ Hawc' pun ce ri mhawng' leukah' tuil' eun hkun'haw'hkam' na', ce tang suip' hk'a' ri na' heul'. Seumeueng' pun ce ri nyu neum hk'a'lih seunyi na' a va ce heul' rot ti heul' kuit' a ring' hk'a'pang vang ut' Eun kon' nyom na'. ¹⁰ Yam pun ce ri nyu seumeueng' na', ce ren'kawn nyawk'. ¹¹ Yam ing' lec ce hk'a'naee nya na', ce pun ri nyu kon' nyom na' Eun maeé ma Eun Mari' ka. Ce nghup' ri faeé Eun. Ce tuh' a'up' ka lapsawng' ri na', ce tan a ri Heun. Lapsawng' na' a meuh hk'il', Law'ban‡ maeé Mu'ra§. ¹² Yam pun ce leukah' tuil' sati un' kah ce ing' hk'eup' cawo' Herot' eun hk'a'naee vang it' ce ri leumu na', ce ing' hk'a' tawk seubu ri kuing' ri na'.

Hk'uih heul' nang kuing' E'ji'tu'

¹³ Hawc' ka yam peue kue' cu'yi na' keutah ce ing' na', in'hpom Eun Peucawo' ti peue eun pucti lih tuil' leukah' ri Yo'saep eun hk'a'naee vang it' eun ri leumu na'. Eun lah', "Kuh' reu', va kon' nyom na' Eun maeé ma Eun ka hk'uih heul' nang kuing' E'ji'tu' na' reu'. Ut' teh' rot ti yam na' ui' tang lah' a ri mi. Kopti cawo' Herot' buih sok eun ri kaw toh kon' nyom na' Eun."

† 2:6 2:6 Mi'hka 5:2 ‡ 2:11 2:11 Ten tu' hom' muis Law'ban § 2:11 2:11 Hku' puis hom' muis Mu'ra

¹⁴ Bul awn' na, Yo'saep eun kuh' va kon' nyom na' Eun mae' ma Eun ka heul' nang kuing' E'ji'tu' na'. ¹⁵ Ce ut' teh' rot ti cawo' Herot' yeum eun. Aen' a meuh neumneum htonnuk hot' seun' ku' Peucawo' lah' Eun ri uin' ri suip Eun ri cu peue suip leukah' ri na' eun. Eun lah', "Klawng Uí kon' me ri na' Eun pucti heul' hk'ai' kuing' E'ji'tu' na' hawc'."*

Cawo' Herot' toh eun kon' nyom na' ce

¹⁶ Yam cawo' Herot' yawng eun peue kue' cu'yi na' chi'lai ce ri na', eun seungeueng' nyawk'. Eun tuil' leukah' kah peue suik' ri na' ce heul' toh kon' nyom me ku' a'yu lal' neum lih hk'a'col nang yung' Baelaehaem na' mae' yung' keunam caona' na' ce gawm'euc'. Kopti hkawp'† sawn' eun ku' lah' ce peue kue' cu'yi na' a cawp' yam awn' a na'. ¹⁷ Aen' a meuh neumneum htonnuk hot' seun' ku' Yerami' peue suip leukah' Eun Peucawo' na' lah' eun, ¹⁸ "Pun ri mhawng' seng' hk'a'nae yung' Ramah.

A meuh seng' ta'ul' aec'rak yam.

Rahkela' tuk ka ri kon' ri na' ce, ka yam.

Kopti un' laee kue' ka kon' na',

a'nhaw' hkuin' cang cop' ka hpum' sam'ran."‡

Tang ing' kuing' I'sarela'

¹⁹ Hawc' ka cawo' Herot' yeum eun na', in'hpom Eun Peucawo' ti peue eun pucti lih ri Yo'saep eun hk'a'nae vang it' eun ri leumu nang kuing' E'ji'tu' na'. ²⁰ Eun lah', "Kuh' reu', va kon' nyom na' Eun mae' ma Eun ka tang ing' kuing' I'sarela' na' reu'. Kopti cawo' Herot' eun mae' peue co'ca' ri kaw toh kon' nyom na' yeum ce hawc'."

²¹ Kop awn' na, Yo'saep eun yuk ri va kon' nyom na' Eun mae' ma Eun ka tang ing' nang kuing' I'sarela' na'.

* 2:15 2:15 Ho'se 11:1 † 2:16 2:16 A'ko' mhin' ‡ 2:18 2:18 Yerami' 31:15

²² Daecti yam Yo'saep pun eun ri mhawng' Ahkelaas' tang u'peung eun kuing' Yu'da na' tang' kuing' ri cawo' Herot' eun na', eun lhat'. Eun un' hat' ri ing' teh'. Yam pun eun ri mhawng' leukah' tuil' sati hk'a'naee it' eun ri leumu na', eun tang ing' nang kuing' Galilae' na'. ²³ Eun ing' ut' nang veng Nasaraet'. Aen' a meuh neumneum htonnuk hot' seun' ku' Peucawo' lah' Eun ri uin' ri suip Eun ri cu peue suip leukah' ri na' eun. A lah', "Kaw peue klawng Eun meuh peue veng Nasaraet'."

3

Yo'han cawo' tuil' hk'a' cum' mhe' eun hk'a'

¹ Hk'a'naee yam awn' na, Yo'han cawo' tuil' hk'a' cum' eun ing' sangsawn' leukah' mun' ren'kawn na' nang vang hk'oh'hk'oeng' nang kuing' Yu'da na'. ² Eun lah', "Kopti kuing' pang maó' na' kaw a hk'aws' rot hawc' na', taws' hpum' fuin map' ri na' reu'." ³ Yo'han aen' meuh eun ku' I'saya' peue suip leukah' Eun Peucawo' na' lah' eun a rot ri heun na' eun. Eun lah', "Seng' eun peue ti peue na' ta'ul' eun ri lah' a vang hk'oh'hk'oeng' na'. Eun lah', 'Mhe' hk'a' pun Peucawo' Eun reu'.

Pleng' hk'a' Eun na' seumeu' reu'."*

⁴ Hk'o eun Yo'han na' meuh a huik' kalaok' a pleng' ri. Eun mawt nyawng ri na' ri sae'caet' hak'. Ku' hk'a eun na' a meuh a'htul mae' leuum' cing' peuyhel' ut' nang hk'i na'. ⁵ Peue veng Yeru'salaem, peue kuing' Yu'da ku duih' mae' peue ut' keunam caonao' ka klong' Yaw'dan ku duih' na' ce pucti ing' taws' hpum' fuin map' ri na' ri Yo'han eun. ⁶ Yam sawng'sawng' hawc' ce taws' hpum' fuin map' ri na' gawm'euc' na', Yo'han eun tuil' hk'a' cum' na' ri ce nang klong' Yaw'dan na'.

* 3:3 3:3 I'saya' 40:3

⁷ Daecti yam Yo'han nyu eun peue Hparisae' maeé' peue Sadu'kae' heun' peue na' ing' ce vang tuil' eun hk'a' cum' na', eun lah' a ri ce, "Kon'hk'i ka seueueng' sa'hao' na' pe', a'nhaw' ci' tuil' sati kah pe' hk'uih hk'ai' hk'a' seungeueng' Eun Peucawo' na'?" ⁸ Punta kaw a meuh sa' hki' ka taws' pe' hpum' fuin pe' map' ri hawc' na', yeuh ku' chak' na' reu'. ⁹ Pawlaee han' maeé' Abraham meuh eun kuiing' pe' nang hpum' ri. Kaw ui' lah' a ri pe', Peucawo' kaw Eun cang pleng' seumu aen' ce meuh kon'hk'i eun Abraham yeut. ¹⁰ Maet'maen', mue' na' uin' a ri keunam kleum' hku' na' hawc'. Kleum' un' pli' ku' chak' na' ku kleum' ka, kah ri gawl ri tec a, dum a hk'a'naee ngawl.

¹¹ Tuil' ui' hk'a' cum' na' ri pe' ri leuum' na' a meuh sa' hki' ka taws' pe' hpum' fuin pe' map' ri na'. Daecti ku' kaw ing' hot' ui' na' kue' Eun ti'ca keuting hk'ai' ui'. Pal yawo kaw ui' un' kuing' ri jang' jhaep' Eun na'. Eun kaw tuil' hk'a' cum' na' ri pe' ri Cit' seunga' chak' na' maeé' ri ngawl na'. ¹² Eun jhawp' ya' yuip. Eun kaw yuip ri tec vang cap' ngho' ri na' hk'el' seunga'. Hawc' Eun hk'on'ro ngho' ri na', Eun na' peus ri uin' a nang htuim'. Daecti dep' ngho' na' Eun kaw dum a hk'a'naee ngawl un' cang laic na'."

Yesu' rap Eun ri ti hk'a' cum'

¹³ Hawc' ko', punta Yesu' kaw Eun rap ri ti hk'a' cum' na' ri Yo'han eun na', Eun ing' neum kuing' Galilae' ing' ri klong' Yaw'dan na'. ¹⁴ Daecti Yo'han eun hk'o'hk'ang ham' Eun lah', "Htuk' ui' ri rap ri ti hk'a' cum' na' ri Mi, Mi vaeé' ing' ri ui', tup na' a kuing' aw?"

¹⁵ Yesu' Eun top' a ri heun, "Maet'maen', hk'o' mi yeuh a ri Ui' reu'. Kopti htuk' e' ri yeuh ku' Peucawo' sum' kah Eun e' yeuh na' ce ku ceu ka." Hawc' ko', Yo'han eun ku sahpaw' ri tuil' hk'a' cum' na' ri Heun.

¹⁶ Yam Yesu' hawc' Eun rap ri ti hk'a' cum' na' Eun keulawn' pucti hk'ai' leuum' na', kuing' pang mao' na' a

dah'. Hawc' ko', Eun pun ri nyu Cit' seunga' Eun Peucawo' na' seun' a gui' na' a lih ut' maeé' Heun. ¹⁷ Seng' na' a laws' lih neum kuing' pang maó'. A lah', "Hkaen' meuh Eun Kon' me leumeus' Ui'. Eun hit' ri hpum' Ui' nyawk'."

4

Yesu' pun Eun ri hkam' hk'a' cop'long

¹ Hawc' awn' na, punta Yesu' kaw Eun pun ri hkam' hk'a' cop'long ka seuca' rai na', Cit' seunga' na' a va Eun heul' nang vang hk'oh' hk'oeng' na'. ² Hawc' ka eut' Eun ku' hk'a' ri na' pun pun'kul' sum' pun'kul' seunyi na', Eun heul' sum' som'. ³ Hawc' ko', cawo' cop'long na' a ing' lah' a ri Heun, "Mi lawn meuh Kon' ai' Eun Peucawo' ko', tuil' leukah' Mi ri seumu aen' ce kah a meuh ku' hk'a' reu'."

⁴ Yesu' Eun top' a, "Nang htawm Seunga' na' tem' a ri yeuhki', 'Peue un' a'yu im' peue ri ku' hk'a' na' palkoe, daecti a'yu im' peue ri leukah' lih neum moeng Eun Peucawo' na' ku moeng ka.* "

⁵ Hawc' ko', seuca' rai na' a tang va Eun huk' nang veng Yeru'salaem veng seunga' chak' na'. A kah Eun cawng pang seubul ka nya hk'o' mun' keuting na'. ⁶ A lah' a ri Heun, "Mi lawn meuh Kon' ai' Eun Peucawo' ko', yawt' Mi hk'ui'c' reu'. Kopti nang htawm Seunga' na' tem' a ri yeuhki', 'Peucawo' kaw Eun tuil' leukah' ri in'hpom ri na' ce, kah ce roksa' Mi.

Punta cung Mi na' kaw a un' cang pen seumu na', in'hpom na' ce kaw ko' ri cem Mi.† "

⁷ Yesu' Eun top' a, "Nang htawm Seunga' na' a ku tem' ri yeuhki', 'Pawlaee long Cawo' Peucawo' mi na' Eun.‡ "

* 4:4 4:4 Saw'n leukah' mun' 8:3 † 4:6 4:6 Suk'seun' 91:11, 12 ‡ 4:7 4:7 Saw'n leukah' mun' 6:16

⁸ Hawc' ko', seuca' rai na' a tang va Eun huk' pang gong lhung' nyawk' na'. A tuil' Eun nawk kuing' ut' nang lok na' gawm'euc' mae' munhpung' hkuru ka na' gawm'euc'. ⁹ A lah', "Mi lawn seukluin ri faee' ui' ko', kaw ui' tuil' Mi is' ceu nang aen' ce gawm'euc'."

¹⁰ Yesu' Eun lah', "Satan, hk'uih hk'ai' Ui' reu'. Kopti nang htawm Seunga' na' tem' a ri yeuhki', 'Kaw mi kah ri faee' Cawo' Peucawo' ri na' Eun, yeuh mhai' Eun na' palkoe.'§ "

¹¹ Hawc' ko', seuca' rai na' a pucti heul' hk'ai' Heun. In'hpom na' ce lih yeuh mhai' Eun.

Yesu' tang' Eun ri sangsawn'

¹² Yam Yesu' mhawng' Eun lawng hk'awng' peue Yo'han eun nang htawng' na', Eun do ri heul' nang kuing' Galilae' na'. ¹³ Eun do ri heul' hk'ai' veng Nasaraet' na' Eun heul' ut' nang veng Kapani'um na'. A meuh veng ut' keunam glu Galilae' ut' hk'a'naee kuing' ka Yebulun mae' kuing' Natali' na'. ¹⁴ Aen' a meuh punta kaw a meuh hot' seun' ku' Peucawo' lah' Eun ri uin' ri suip Eun ri cu I'saya' peue suip leukah' ri na' eun. A lah',

¹⁵ "Kuing' Yebulun na' mae' kuing' Natali' na' meuh a
hk'a' hot' keunam klong' Yaw'dan
heul' ri mha'seumut'
a meuh kuing' Galilae' ce peue un' meuh peue ceu Yu'da,
¹⁶ ce meuh peue ut' vang duim'lawng na',
ce pun ri nyu ku' ceng' keuting nyawk' na' hawc'.
Peue ut' hk'a'ruim rum ka hk'a' yeum na'
ku' ceng' na' til' ka rot ri ce hawc'."*

¹⁷ Tang' neum yam awn' na, Yesu' Eun tang' ri sangsawn' leukah' mun' ren'kawn na'. Eun lah', "Kopti kuing' pang

§ 4:10 4:10 Sawn' leukah' mun' 6:13 * 4:16 4:16 I'saya' 9:1-2

mao' na' kaw a hk'aws' rot hawc' na', taws' hpum' fuin map' ri na' reu'."

Yesu' la Eun ri klawng peue pun' peue na' ce meuh tapae' ri

¹⁸ Yam Yesu' buih heul' Eun keunam ka glu Galilae' na', Eun nyu peue sok ka' lal' peue na' ka. A meuh Si'mon ku' klawng peue eun muis Petru' na' maeé Andre awng' eun na' eun. Ka buih ploé reup ri na' nang glu na'. ¹⁹ Yesu' Eun lah' a ri ka, "Hot' Ui' reu'. Kaw Ui' tuil' pa' meuh peue sok peue seun' sok pa' ka' na' ko'." ²⁰ Ka keulawn' tec reup ri na', ka hot' Eun heul'.

²¹ Yam Yesu' tang suip Eun hk'a' ri na' heul' na', Eun nyu awng'ec' seubu lal' peue na' ka. A meuh Yakop' meuh kon' me eun Yebadae' maeé Yo'han awng' eun na' eun. Ka buih leuplu reup ri na' nang reu na' maeé Yebadae' kuiing' ka na' eun. Yesu' Eun klawng ri ti ka. ²² Ka keulawn' tec reu ri na' maeé kuiing' ri na' eun, ka hot' Yesu' Eun heul'.

Yesu' bai' Eun peue peuyhat na' ce cuin

²³ Yesu' Eun heul' nang kuiing' Galilae' na' hk'awp'. Eun sangsawn' nang sa'la vang hk'o' mun' ce na'. Eun sangsawn' leukah' mun' ren'kawn lawng kuiing' Eun Peucawo' na'. Eun bai' peuyhat ku ceu ce peue na' cuin. ²⁴ Lawng Eun na' a laws' heul' nang kuiing' Su'ri' na' hk'awp'. Peue va peue peuyhat heun' ceu na' ce ing' tuil' Eun bai' ce. Peue peuyhat aen' ce meuh peue peuyhat sui' heun' ceu, peue seuca' lec, peue kue' peuyhat lom maeé peue ti' cung yeum na' ce. Eun bai' ce cuin gawm'euc'. ²⁵ Peue cum heun' ing' neum kuiing' Galilae', kuiing' Dekapo'lis', veng Yeru'salaem, kuiing' Yu'da maeé peue ut' hk'a'teh' ka klong' Yaw'dan na' ce ing' hot' Yesu' Eun heul'.

5

Yesu' sangsawn' Eun leukah' mun' pang puim'

- ¹ Yam Yesu' nyu Eun peue cum heun' na' ce, Eun huk' pang puim' na' Eun mok'. Tapae' Eun na' ce ing' ri Heun.
- ² Eun tang' ri sangsawn' ce. Eun lah',
- ³ "Peue yawng un' papuing ri Peucawo' Eun a un' pun na' kaw ce pun mun',
kopti kuing' pang mao' na' meuh ka is' ce.
- ⁴ Peue kuit nyhap' kuit yak na' kaw ce pun mun',
kopti kaw ce pun ri rap ri ti hk'a' kuit nyawk' kuit sam'ran cumyen' na'.
- ⁵ Peue kue' hpum' nyom' jom tem na' kaw ce pun mun',
kopti kaw ce pun ri rap ri ti bhen' keute' na' meuh a sin' ce.
- ⁶ Peue sum' is' hk'a' leupaws seumeu' na' kaw ce pun mun',
kopti kaw ce pun ri is' seun' ku' sum' is' ce na'.
- ⁷ Peue cang tulyak ri peue na' kaw ce pun mun',
kopti kaw ce tang pun ri rap ri ti hk'a' tulyak ri ce na'.
- ⁸ Peue hpum' seunga' chak' na' kaw ce pun mun',
kopti kaw ce pun ri nyu Peucawo' Eun.
- ⁹ Peue yeuh hk'a' htuk'lung ri puri na' kaw ce pun mun',
kopti kaw ce pun hk'a' klawng ri meuh kon' Eun Peucawo' na'.
- ¹⁰ Peue pun ri hkam' hk'a' keunhap' nokneh kopti meuh a hk'a' leupaws seumeu' na' kaw ce pun mun',
kopti kuing' pang mao' na' meuh a is' ce hawc'.
- ¹¹ Yam yeuh peue ku' un' nawpsang, keunhap' nokneh pe' mae' lah' lawng ku' un' kue' un' meuh na' ri pe' kopti meuh a Ui' ri na', kaw pe' pun mun'. ¹² Ren'kawn kuit nyawk' kuit sam'ran reu', kopti lapsawng' keuting na' kue' a pun pe' nang kuing' pang mao' na'. Peue suip leukah' Eun Peucawo' ku' pucti nanggal' pe' na' ce ku pun ri hkam' hk'a' keunhap' nokneh na' yeut.

Cis ka bhen' keute'

¹³ Meuh pe' cis ka bhen' keute' na'. Daecti eum' ka na' a lawn cuit' ko', a ci' kaw cang yeuh ri eum' bae yeuh sa'nhaw'? A hkuin' kaw lae kue' mun', a na' pun ri bah ri tec ri, peue na' jap'buin yawo a.

Ku' ceng' ka bhen' keute'

¹⁴ Meuh pe' ku' ceng' ka bhen' keute' na'. Veng tang' ri pang gong na' a hkuin' cang mo' ri geup'. ¹⁵ Seun' awn' na, a'nhaw' hkuin' duing tok' kaw' ngawl kuip a ri teng' saec' ti peue. Daecti punta kaw a til' ceng' ri peue nya na' ce ku peue na', po a pang hpa'rang na'. ¹⁶ Seun' awn' na, punta peue gawm'euc' na' kaw peue nyu ku' chak' yeuh pe' na' mae' kaw peue suk'seun' Kuiing' pe' Cawo' ut' nang kuing' pang ma' na' Eun, yeuh ku' ceng' pe' na' ceng' nanggal' peue reu'.

Leukah' ritroe

¹⁷ Pawlae hteum' Ui' lih yeuh leukah' ritroe na' mae' leukah' ce peue suip leukah' Eun Peucawo' na' lu. Hpaw Ui' ca' lih yeuh a lu, daecti lih yeuh Ui' a htonnuk. ¹⁸ Ui' lah' a ri pe' neumneum, cu yam bhen' keute' mae' ma' na' un' nang lulaic ka heul' na', rot ti yam ku ceu gawm'euc' na' pun a ri htonnuk hawc' na', tu' htawm aet', a'ko' vang mhai' aet' ka na' a hkuin' kaw rai' saec' ti tu'. ¹⁹ Kop awn' na, a'nhaw' lawn un' ti a'ye' ka leukah' ritroe vang a'ye' aet' ka hk'ai' peue na' seucen, mae' eun ku sangsawn' peue yeuh seun' ku' yeuh ti na' ko', eun kaw pun hk'a' sawn' ri meuh peue aet' hk'ai' peue hk'a'naee kuing' pang ma' na'. Daecti a'nhaw' lawn hot' ri yeuh leukah' ritroe na' mae' sangsawn' hot' a ko', eun kaw pun hk'a' sawn' ri meuh peue keuting hk'a'naee kuing' pang ma' na'. ²⁰ Kopti Ui' lah' a ri pe', 'Pe' lawn un' kue' hk'a' leupaws seumeu' na' heun' hk'ai' peue Hparisae' mae' peue guil leukah' ritroe

na' ce ko', pe' hkuin' kaw pun ri lec hk'a'naee kuing' pang maó' na' neumneum.'

Hk'a' seungeueng'

²¹ Pun pe' ri mhawng' leukah' lah' ri ri peue leumah' na' ce hawc'. A lah', 'Pawlaee toh peue.* A'nhaw' lawn toh peue ko', eun kaw pun ri hkam' hk'a' taws' a'mu na'.

²² Daecti Ui' lah' a ri pe', 'A'nhaw' lawn seungeueng' ri ec'awng' ri na' eun ko', eun kaw pun ri hkam' hk'a' taws' a'mu na'. A'nhaw' lawn tang' ec'awng' ri na' eun tem ko', eun kaw pun ri hkam' hk'a' taws' a'mu na' nanggal' ce muk peue taws' a'mu na'. A'nhaw' lawn lah' ec'awng' ri na' eun meuh peue nga' ko', eun kaw pun ri hkam' hk'a'naee ngawl ka keutong' nyarok na'.

²³ Kop awn' na, yam buih tan pe' ku' tan vang dum ri tan ku' tan na' pe' lawn kuit rot ri ec'awng' ri na' seungeueng' ce ri ti kop ku' ti ri ceu na' ko', ²⁴ puing uin' ku' tang pe' na' nanggal' ka vang dum ri tan na' pe' na' puing ing' yeuh ri htuk'lung ec'awng' ri na' ce. Hawc' ko', pe' na' koe huk' tan ku' tan ri na' reu'.

²⁵ Yam ku' tang' a'mu ri pe' na' buih va eun pe' heul' ri vang taws' a'mu na', co'ca' ri yeuh ri htuk'lung eun lang' hk'a' na' vaevae reu'. A lawn un' yeuh keutit' ko', kaw eun ap pe' ri cawo' taws' a'mu na' eun. Cawo' taws' a'mu na' eun kaw ap pe' ri cawo' htawng' na' eun. Cawo' htawng' na' eun kaw seue' pe' hk'a'naee htawng' na'. ²⁶ Ui' lah' a ri pe' neumneum, 'Pe' lawn un' nang sai' ku' ma ri na' euc' hklel' ko', pe' hkuin' kaw nang cang pun ri pucti lih hk'ai' htawng' na'.

Hk'a' len'cu

²⁷ Leukah' lah', 'Pawlaee len'cu',† na' pun pe' ri mhawng' a hawc'. ²⁸ Daecti Ui' lah' a ri pe', 'A'nhaw' lawn

* 5:21 5:21 Pucti heul' 20:13 † 5:27 5:27 Pucti heul' 20:14

keué ri beun' na' eun maeé kue' ri hpum' hkuit' nawng'-tang' na' ko', hkawn' len'cu eun maeé beun' awn' eun hk'a'naee hpum' ri na' hawc'.²⁹ Ngai' a'tawm' mi na' a lawn yeuh mi yeuh map' na' ko', koc ri tec a reu'. Mi saec' na' sum hk'eung ka tu' ri na' ti ceu ko', a na' jaen chak' hk'ai' pun mi ri lec nang keutong'nyarok na' gawm' tu' ri na'.³⁰ Seun' awn' na, ti' a'tawm' mi na' a lawn yeuh mi yeuh map' na' ko', reng' ri tec a reu'. Mi saec' na' sum hk'eung ka tu' ri na' ti ceu ko', a na' jaen chak' hk'ai' pun mi ri lec nang keutong'nyarok na' gawm' tu' ri na'.

Hk'a' tec puri

³¹ Kue' a leukah' lah' ri yeuhki', 'A'nhaw' lawn tec beun' ri na' eun ko', eun kaw kah ri tem' ri tuil' licmat tec puri na' ri beun' ri na' eun.'[‡] ³² Daecti Ui' lah' a ri pe', 'Pon hk'ai' meuh a kopti len'cu na' a'nhaw' lawn tec beun' ri na' eun ko', hkawn' yeuh eun beun' ri na' eun meuh peue len'cu. A'nhaw' lawn tang ti ri is' beun' awn' eun ko', hkawn' eun ku meuh peue len'cu yeut.'

Leukah' hkam'

³³ Pun pe' ri mhawng' leukah' lah' ri ri peue leumah' na' ce hawc'. A lah', 'Pawlaee va leukah' hkam' pe' na' lho'lhe', daecti hot' ri yeuh a hot' seun' leukah' hkam' mi ri Peucawo' Eun na' reu'.³⁴ Daecti Ui' lah' a ri pe', 'Pawlaee lah' leukah' hkam' na' saec' peunae'. Pawlaee lah' leukah' hkam' na' ri cu pe' kuing' pang maó na', kopti kuing' pang maó na' meuh a vang mok' Eun Peucawo'.³⁵ A'ko', pawlaee lah' leukah' hkam' na' ri cu pe' bhen' keute' na', kopti bhen' keute' na' meuh a vang tang' cung Eun Peucawo'. A'ko', pawlaee lah' leukah' hkam' na' ri cu pe' veng Yeru'salaem na', kopti veng Yeru'salaem na' meuh a veng Eun Peucawo' Cawo' Hkun'haw' hkam' keuting na'.

[‡] 5:31 5:31 Saw'n leukah' mun' 24:1

³⁶ A'ko', pawlaee lah' leukah' hkam' na' ri cu pe' cing' ri na', kopti huik' pe' na' ti nyeng yawo a kaw paing a kaw lawng na' pe' hkuin' cang yeuh a. ³⁷ A meuh neum ko', lah' a "meuh neum", a un' meuh ko', lah' a "un' meuh". Lah' a lheu' aen' a ko', meuh a leukah' ing' neum seuca' rai na'.

Ngai' tang' ngai'

³⁸ Leukah' lah', 'Peue lawn yeuh ngai' pe' na' lu ko', tang yeuh is' peue na' lu, peue lawn yeuh rang' pe' na' lu ko', tang yeuh is' peue na' lu'§, na' pun pe' ri mhawng' a hawc'. ³⁹ Daecti Ui' lah' a ri pe', 'Pawlaee to'tam' peue rai na' ce. Peue lawn dah beh a'tawm' pe' na' ko', pe' ku na' tang hpawt' ri tung beh a've' na' ri peue reu'. ⁴⁰ Peue lawn tang' a'mu tec'teng ri ti hk'o hk'a'naee pe' na' ko', pe' ku na' tang tuil' hk'o dal' ri na' ri peue yeut reu'. ⁴¹ Peue lawn tec'teng kah pe' heul' tuil' hk'a' ri ti lak' ko', heul' mae' peue lal' lak' reu'. ⁴² Peue hk'o' ri pe' na' tuil' ce is' reu'. Pawlaee hpawt' ri hk'uih ri peue sum' keucan ri pe' na' ce.'

Leumeus' ransu

⁴³ Leukah' lah', 'Leumeus' peue ut' keunam caonao' ri na' ce, ces ri ransu ri na' ce reu'*, na' pun pe' ri mhawng' a hawc'. ⁴⁴ Daecti Ui' lah' a ri pe', 'Leumeus' ransu pe' na' ce. Hk'o' mun' pun peue keunhap' nokneh pe' na' ce reu'. ⁴⁵ Punta kaw pe' meuh kon' Eun A'kuiing' ut' nang kuing' pang ma' na' Eun. Kopti kah Eun seunyi ri na' pucti ceng' til' pun peue rai mae' peue chak' na' ka gawm' al' na'. Eun ku tuil' lhe' na' pun peue leupaws seumeu' mae' peue un' leupaws seumeu' na' ka gawm' al' yeut. ⁴⁶ Pe' lawn leumeus' yawo peue ku' hk'o' ce leumeus' pe' na' ce palkoe ko', pe' ci' kaw pun lapsawng' keunhaw'? Saec' meuh peue cep' hkawn' na' ce ku yeuh keutit' yeut, un' meuh ka aw?

§ 5:38 5:38 Pucti heul' 21:24; Fae' 24:20; Saw'n leukah' mun' 19:21 * 5:43 5:43 Fae' 19:18

⁴⁷ Pe' lawn yeuh yawo a' mawo ce ec' awng' ri na' palkoe ko', pe' ci' chae' kaw chat peue seubu na' ce yeuh sa'nhaw'? Saec' meuh peue un' meuh peue ceu Yu'da na' ce ku yeuh keutit' yeut, un' meuh ka aw? ⁴⁸ Kop awn' na, seun' Kuiing' pe' Cawo' ut' nang kuing' pang mao' na' chak' htonnuk Eun na', yeuh pe' chak' htonnuk yeut reu'.

6

Tiptan

¹ Uin' sati ri, yam yeuh pe' ku' chak' na' pawlaee yeuh a mae' sum' kah pe' peue nyu ri hk'o'cuin. A lawn un' yeuh keutit' ko', na' pe' cang un' pun lapsawng' ri Kuiing' pe' Cawo' ut' nang kuing' pang mao' na' Eun.

² Kop awn' na, yam tiptan teum'kawm pe' peue hk'o'tukyak na' ce na', pe' na' pawlaee puing' pi'tae'rae' nanggal' ri na' seun' peue leukah' seunga' hpum' vok' na' yeuh ce nang sa'la vang hk'o' mun' na' mae' yeuh ce hot' hk'a' na'. Yeuh ce keutit' na' a meuh kopti sum' kah ce peue suk'seun' ri. Uí lah' a ri pe' neumneum, peue awn' sawng' pun ce ri rap lapsawng' meun ri na' htonnuk hawc'.

³ Daecti yam tiptan teum'kawm pe' peue hk'o'tukyak na' ce na', pawlaee kah ti' a've' pe' na' yawng ku' yeuh ka ti' a'tawm' pe' na'. ⁴ Ku' tiptan pe' na' kah a meuh ku' mo' ri. Kuiing' pe' Cawo' cang nyu ku' mo' ri yeuh na' kaw Eun tuil' lapsawng' na' ri pe'.

Hk'o' mun'

⁵ Yam hk'o' pe' mun' na', pawlaee va ri yeuh seun' ku' peue leukah' seunga' hpum' vok' na' yeuh ce na'. Kopti ren' ce mae' cawng ri hk'o' mun' nang sa'la vang hk'o' mun' na' mae' hot' gah' hk'a' na'. Yeuh ce keutit' na' a meuh kopti sum' kah ce peue nyu ri. Uí lah' a ri pe' neumneum, peue awn' sawng' pun ce ri rap lapsawng'

meun ri na' htonnuk hawc'. ⁶ Yam hk'o' pe' mun' na', lec hk'a'naee hkawng pe' na', sawng' leuva' ka. Hawc' ko', hk'o' mun' ri Kuiing' pe' Cawo' peue un' cang nyu peue na' Eun reu'. Kuiing' pe' Cawo' cang nyu ku' mo' ri yeuh na' kaw Eun tuil' lapsawng' na' ri pe'. ⁷ Yam hk'o' pe' mun' na', pawlaee gawm lah' ku' lah' pe' hawc' na' seun' ku' peue un' meuh peue ceu Yu'da na' yeuh ce na'. Yeuh ce keuti' na' meuh a kopti hteum' ce lah' leukah' na' heun'heun' na' peucawo' ce na' eun na' kawn' leuceng a. ⁸ Pawlaee yeuh seun' ce ri, kopti Peucawo' yawng Eun ku' lo' pe' na' tang' neum yam kaw pe' hk'o' ri Heun na' hawc'.

⁹ Kop awn' na, htuk' pe' ri hk'o' mun' yeuhki',
'Kuiing' ye ut' nang kuing' pang ma' na' Mi,
kah muis Mi na' meuh ku' hkopyawm' yumyam'.

¹⁰ Kah kuing' Mi na' lih rot.

Seun' alo Mi na' htonnuk a nang kuing' pang ma' na',
kah a htonnuk pang bhen' keute' na' yeut.

¹¹ Tuil' ku' hk'a lo' ye na' ri ye keuyuit.

¹² Seun' plo'e' ye map' ce peue yeuh ku' kleuc' ri ye na' ce,
hk'o' Mi plo'e' map' ye na' yeut.

¹³ Pawlaee va ye lec hk'a'naee hk'a' cop'long na',
daecti yeuh ye pon hk'ai' ku' rai na'.

Kopti kuing' na', ti'ca na' mae' munhpung' na' meuh
a is' Mi cot'cu ri. Amin.'

¹⁴ Kopti pe' lawn plo'e' map' ce peue yeuh ku' kleuc' ri pe'
na' ko', Kuiing' pe' Cawo' ut' nang kuing' pang ma' na' Eun
ku kaw plo'e' map' pe' na' yeut. ¹⁵ Daecti pe' lawn un' plo'e'
map' peue na' ko', Kuiing' pe' na' Eun ku kaw un' plo'e' map'
pe' na' yeut.

Eut' ku' hk'a

¹⁶ Yam eut' pe' ku' hk'a ri na', pawlaee va ri yeuh buh
ri na' mhong' mhill' seun' ku' peue leukah' seunga' hpum'
vok' na' yeuh ce na'. Kopti sum' kah ce peue nyu buih eut'

ce ku' hk'a ri na', ce guil ri yeuh buh ri na' mhong'mhil'. Uí lah' a ri pé neumneum, peue awn' sawng' pun ce ri rap lapsawng' meun ri na' htonnuk hawc'. ¹⁷ Daecti yam eut' pé ku' hk'a ri na', hkuc' buh ri na', lup huik' ri na' ri lamawn reu'. ¹⁸ Yeuh keutit' na' ko', a lawn un' meuh yawo Kuiing' pé Cawo' un' cang nyu peue Eun na', peue hkuin' kaw ceng' ri buih eut' pé ku' hk'a ri. Kuiing' pé Cawo' cang nyu ku' mo' ri yeuh na' kaw Eun tuil' lapsawng' na' ri pé'.

Hk'on'ro vahtu' hk'il' leumuil ri nang kuing' pang mao'

¹⁹ Pawlae hk'on'ro vahtu' hk'il' leumuil pun tu' ri na' meun pang bhen' keute' vang ruiing cang teun' ka, leuho' a cang hk'a a na' maeé con' ce cang lec ri ra pun a na'. ²⁰ Daecti hk'on'ro vahtu' hk'il' leumuil pun tu' ri na' meun nang kuing' pang mao' vang ruiing un' cang teun' ka, leuho' a un' cang hk'a a na' maeé con' ce un' cang lec ri ra pun a na' reu'. ²¹ Kopti vahtu' hk'il' leumuil pé na' a lawn ut' tawngnhaw' ko', hpum' pé na' a ku kaw ut' ri ka yeut.

²² Ngai' na' meuh a kaw' ngawl ka jawngkui' tu' na'. Ngai' mi na' a lawn chak' ko', gawm' jawngkui' tu' mi na' a kaw htonnuk ri ku' ceng' na' yeut. ²³ Daecti ngai' mi na' a lawn lu ko', gawm' jawngkui' tu' mi na' a ku kaw htonnuk ri ku' duim'lawng na' yeut. Ku' ceng' hk'a'nae mi na' a lawn duim'lawng ko', ku' duim'lawng na' a ci' na' pe leupeul a'ngeng.

²⁴ A saec' meuh a'nhaw', eun kaw un' cang yeuh mhai' cawo' lal' peue. Kopti eun lawn ces ri ku' ti peue na' eun ko', eun kaw leumeus' ku' ti peue na' eun. Eun lawn yumyam' ku' ti peue na' eun ko', eun kaw un' nawpsang ku' ti peue na' eun. Pé kaw un' cang yeuh mhai' ka hk'il' leumuil na' maeé mhai' Eun Peucawo' na' tiduih'.

Pawlae hki'keung

²⁵ Kop awn' na kaw Ui' lah' a ri pe', pawlaee hki'keung ri ku' hk'a ku' som' kaw pe' hk'a pun a'yu ri na'. Pawlaee hki'keung ri hk'ohk'eung kaw pe' hk'eung pun jawngkui' tu' ri na'. A'yu na' ngos heun' a hk'ai' ku' hk'a na', jawngkui' tu' na' a ngos heun' hk'ai' hk'ohk'eung na', un' meuh ka aw? ²⁶ Keue' ri sim' peul' eo' nang wawo na' reu', a hkuin' jheum', hkuin' vuic, a'ko' a hkuin' hk'on'ro nang htuum'. Daecti A'kuiing' pe' Cawo' ut' nang kuing' pang ma' na' Eun uii' a. Pe' ri, ngos heun' pe' hk'ai' sim' awn' ce, un' meuh ka aw? ²⁷ Hk'a'naee pe', a'nhaw' ci' hki'keung eun cang yeuh a'yu ri na' lang' bae ti nali?

²⁸ A ci' meuh kop keunhaw' pe' vae' hki'keung pun hk'ohk'eung ri na'? Tai lole nang hk'i na' a ci' keuting yeuh sa'nhaw' na' kuit ti nawk a reu'. A hkuin' yeuh kan'. A hkuin' kling' kuii'. ²⁹ Daecti kaw Ui' lah' a ri pe', saec' meuh cawo' Saw'lamon yam hk'eung eun hk'eung hkuru ri na', eun hkuin' nang ngam seun' peutai awn' na saec' ti nok'. ³⁰ Seun' rip a'yu im' seunyaen' a kaw dum ri nang ngawl peunsa' na', Peucawo' yong' Eun a htan' awn' na. Peue kue' hk'a' yum' leng na' pe', Peucawo' kaw Eun un' yong' pe' lheu' awn' a aw? ³¹ Kop awn' na, pawlaee hki'keung ri kaw e' pun ri hk'asom' keunhaw' na', a'ko' kaw e' pun ri cuip' hk'eung keunhaw' na'. ³² Kopti peue un' yawng Peucawo' Eun na' sok ce seun' ceu nang awn' a. A'kuiing' pe' Cawo' ut' nang kuing' pang ma' na' yawng Eun lo' pe' ceu nang awn' ce yeut. ³³ Daecti sok kuing' Eun Peucawo' na' mae' hk'a' leupaws seumeu' Eun na' nanggal' reu'. Hawc' ko', Eun ku kaw tuil' ceu nang awn' ce ri pe' yeut. ³⁴ Kop awn' na pawlaee hki'keung pun peunsa' na', kopti pun peunsa' na' kue' a ri is' ku' hki'keung meun na' hawc'. Ku seunyi na' sawng' kue' a ri is' ku' kuit nyhap' na' meun htonnuk hawc'.

7

Tang' map' hk'a' pang peue

¹ Punta Peucawó kaw Eun un' tang' map' hk'a' pang pé na', pé na' pawlaee tang' map' hk'a' pang peue. ² Kopti seun' tang' pé map' hk'a' pang peue na', Peucawó Eun ku kaw tang' map' hk'a' pang pé seun' awn' a yeut. Pé lawn tung' a nang keunhaw' ri peue ko', pé kaw tang pun a nang awn' a.

³ A cí meuh kop keunhaw', pé vaeé seuluil' hpam' ut' nang ngai' ce ec'awng' ri na', daecti ton hku' ut' nang ngai' pé na', pé un' ti a'ye' ka? ⁴ Ton hku' na' a saec' ut' nang ngai' pé na' laleung, pé cí yeuh keunhaw', pé vaeé cang lah' a ri ec'awng' ri na' ce, 'Kaw ui' teum'kawm mi ti ri tec hpam' ut' nang ngai' mi na' ceu?' ⁵ Peue leukah' seunga' hpum' vok' na' pé, ti ri tec ton hku' ut' nang ngai' pé na' nanggal'. Hawc' ko', pé na' kaw'n cang nyu hpam' ut' nang ngai' ce ec'awng' ri na' meulamlam ri, cang hkaws' ri tec a.

⁶ Pawlaee tuil' ku' seunga' chak' na' ri so' na'. Pawlaee nyon ri tuil' seng' seukleu' na' ri lic na'. Gup kaw a chok'chec' buin a. A ku kaw tang hpawt' ri kaw' mi.

Hk'o' reu', sok reu', kloh reu'

⁷ Hk'o' reu', kaw mi pun. Sok reu', kaw mi nyu. Kloh leuva' na' reu', kaw a dah' pun mi. ⁸ Kopti peue hk'o' na' ce ku peue kaw ce pun. Peue sok na' ce ku peue kaw ce nyu. Peue kloh leuva' na' ce ku peue a kaw dah' pun ce yeut.

⁹ Hk'a'naee pé ri, kon' pé na' eun lawn hk'o' ku' hk'a ko', kaw pé tuil' seumu ri heun aw? ¹⁰ A'ko', eun lawn hk'o' ka' ko', kaw pé tuil' seueueng' ri heun aw? ¹¹ Pé saec' na' meuh peue rai ko', pé yawng ri tuil' ku' chak' na' ri kon' ri na' ce yeut. Lheu' awn' na, Kuing' pé Cawó ut' nang kuing' pang mao' na' Eun jaen kaw tuil' ku' chak' lheu' awn' a na' ri peue hk'o' na' ce ku peue ri. ¹² Kop awn' na, yeuh

ku' sum' kah pe' peue yeuh ri ti na' ri peue yeut reu'. Aen' meuh a leukah' ritroe na' mae' leukah' sangsawn' ce peue suip leukah' Eun Peucawo' na'.

Leuva' seuep' mae' leuva' vah

¹³ Lec leuva' seuep' na' reu'. Kopti leuva' vah sam' ran ri long na' meuh a hk'a' heul' lec vang lulaic na'. Peue lec leuva' awn' a na' ce kue' heun' nyawk'. ¹⁴ Daecti leuva' hk'a' heul' ri vang a'yu im' na' seuep' ka. Peue sok ri nyu a na' ce leng.

Kleum' ka mae' pli' ka

¹⁵ Uin' sati ri peue guil ri meuh peue suip leukah' Eun Peucawo' na' ce reu'. Hk'a'nok ce na' guil ce ri seun' kon' yung' ko' ing' ri pe', daecti hk'a'naee ce na' ce meuh ruk rai na'. ¹⁶ Ce meuh peue yeuh sa'nhaw' na' pe' kaw cang yawng a ri kan' ku' yeuh ce na'. Tawn poc' pe' pli' bui ri kleum' kat' na' aw? A'ko', tawn poc' pe' pli' keutuic ri bang' kat' na' yeut aw? ¹⁷ Seun' awn' na, kleum' chak' na' pli' a pli' chak' na'. Daecti kleum' un' chak' na' a ku pli' pli' un' chak' na' yeut. ¹⁸ Kleum' chak' na' a hkuin' cang pli' pli' un' chak' na'. Kleum' un' chak' na' a ku na' un' cang pli' pli' chak' na' yeut. ¹⁹ Kleum' pli' pli' un' chak' ku kleum' na' kaw a pun ri hkam' gawl ri tec ri hk'a'naee ngawl na'. ²⁰ Kop awn' na, pe' kaw cang yawng ce ri kan' ku' yeuh ce na'.

²¹ Peue klawng Ui' meuh Cawo', Cawo', na' ce ku peue hpaw ce ca' kaw pun ri lec nang kuing' pang ma' na' gawm'euc' ri. Daecti ka meuh yawo pal peue hot' ri yeuh alo Eun Kuing' Ui' Cawo' ut' nang kuing' pang ma' na' kaw ce pun ri lec a. ²² A lawn rot ti yam seunyi taws' a'mu na', peue heun' peue na' ce kaw klawng ri lah' a ri Ui', 'Cawo', Cawo', sangsawn' ye leukah' mun' ren'kawn na' hk'a'naee muis Mi na', ye ku ra ri tec seuca' na' hk'a'naee

muis Mi na' mae' ye ku yeuh ku' hk'o'am' keuting heun' ceu na' hk'a'naee muis Mi na', un' meuh ka aw?' ²³ Yam awn' na, Ui' kaw lah' seumeu' a ri ce, 'Hpaw Ui' ca' yawng pe'. Peue rai na' pe', puc pe' heul' hk'ai' Ui' reu'.

Res nya lal' ceu

²⁴ Kop awn' na, peue mhawng' leukah' Ui', leuceng ri hot' ri yeuh a na' ce ku peue ri na' seun' ce peue kue' cu'yi pleng' nya ri pang seumu na'. ²⁵ Yam lhe' ka, ba leuum' na' a reng, guil' na' a saec' htuipeu nya na', daecti kopti res ka nya na' tang' a ri pang seumu na', nya awn' a hkuin' lhu'jah. ²⁶ Daecti peue mhawng' leukah' Ui', un' leuceng ri hot' ri yeuh a na' seun' ce peue nga' suisa pleng' nya ri na' nang tak sai na'. ²⁷ Yam lhe' ka, ba leuum' na' a reng, guil' na' a htuipeu nya na', nya awn' a ku lhu'jah heul'. Hk'a' lhu'jah ka awn' a hk'o'lihat' nyawk'."

²⁸ Yam Yesu' hawc' Eun lah' ri ceu nang aen' ce na', peue na' ce am' nyawk' ri ku' sangsawn' Eun na'. ²⁹ Kopti sangsawn' Eun ce seun' peue kue' ti'ca na' ko', Eun un' seun' peue guil leukah' ritroe ce na' ce.

8

Yesu' bai' Eun peue peuyhat naw cuin

¹ Yam Yesu' lih Eun neum pang gong na', peue cum heun' na' ce hot' Eun heul'. ² Peue naw ti peue na' eun ing' seukluin ri nanggal' Eun Yesu' na'. Eun hk'o'hk'ang lah', "Cawo', a lawn htuk' hpum' Mi ko', kaw Mi cang yeuh ui' seunga' chak'."

³ Yesu' Eun nyat' ti' ri paic' eun. Eun lah', "Htuk' a hpum' Ui' yeut, seunga' chak' reu'." Peuyhat naw eun na' a keulawn' rai'. ⁴ Yesu' Eun lah' a ri heun, "Pawlaee lah' lawng aen' a ri peue saec' ti peue. Daecti peuyhat mi na' cuin ka hawc' na' punta kaw a meuh sa' hki' ri peue heun'

na' ce, heul' tuil' peue jhawp' rit na' ce nyu tu' mi na' mae' heul' tan ku' tan seun' Mo'se tuil' eun ri uin' leukah' to' ri punta kaw yeuh ri seunga' chak' na' reu'."

Hk'a' yum' eun po' suik'

⁵ Yam Yesu' lec Eun nang veng Kapeni'um na', po' suik' ti peue na' eun ing' hk'o' hk'ang a ri Heun. ⁶ Eun lah', "Cawo', mhai' ui' na' ti' cung chuing' eun. Eun it' ti nya. Eun pun ri tukhka nyawk'."

⁷ Yesu' Eun lah' a ri heun, "Kaw ui' ing' bai' eun yeut."

⁸ Po' suik' na' eun lah' a ri Heun, "Cawo', un' kuing' ui' ri rap ri ti Mi ing' lec nang nya ui' na'. Daecti Mi saec' na' lah' yawo leukah' ti moeng, mhai' ui' na' kaw eun cuin. ⁹ Kopti ut' ui' hk'a' ruim peue. Ui' ku kue' peue suik' ut' hk'a' ruim ri yeut. Ui' lawn kah ti peue eun heul' ko', eun ku heul'. Ui' lawn kah ti peue eun ing' ko', eun ku ing'. Ui' lawn kah mhai' ri na' eun yeuh keunhaw' ko', eun ku yeuh a."

¹⁰ Yam Yesu' mhawng' Eun leukah' awn' a na', Eun am'. Eun lah' a ri peue cum heun' hot' ri na' ce, "Kaw Ui' lah' a ri pe' neumneum, hpaw Ui' ca' nang duing nyu peue hk'a' naee peue I'sarela' na' kue' ce nang kue' hk'a' yum' heun' nyawk' yeuhko' na' saec' ti peue. ¹¹ Ui' lah' a ri pe', 'Peue heun' peue ku' ut' hk'a' lih seunyi na' mae' hk'a' lec seunyi na' kaw ce ing' lec vang ut' a'nhaw' vang ut' nang awn' na' hk'a' naee pawe nang kuing' pang ma' na' mae' Abraham, Yakop', I'cak' ce tiduih'. ¹² Daecti peue I'sarela' na' ce kaw pun ri hkam' nyon ri tec ri vang duim'lawng na'. Teh' na' ce kaw cet rang' ri ta'ul' ri yam.' "

¹³ Hawc' ko', Yesu' Eun lah' a ri po' suik' na' eun, "Ing' ti nya reu'. Kah a meuh seun' yum' mi a na'." Yam awn' na, mhai' eun na' eun keulawn' cuin.

Yesu' bai' Eun peue heun' peue cuin

¹⁴ Yam Yesú lec Eun nang nya eun Petru' ná, Eun pun ri nyu a'oe' eun Petru' peuyhat kuc' ha'lok ka. Ka it'. ¹⁵ Yesú Eun paic' tí ka ná, peuyhat kuc' ha'lok ka ná a cuin. Ka kuh'. Hawc' kó, ka nghawm' Yesú Eun hk'asom'.

¹⁶ Yam sumsam ka ná, peue va peue seuca' lec heun' peue ná ce ing' ri Yesú Eun. Yesú Eun ra ri tec seuca' ná pucti lih ri leukah' ri ná. Eun ku bai' peue peuyhat ná ce cuin ku peue ri. ¹⁷ Aen' a meuh punta kaw a meuh neumneum hot' seun' ku' Ísaya' peue suip leukah' Eun Peucawo' ná lah' eun a ná,
 “Eun peus peuyhat é ná,
 Eun ti ri tec a.”*

Hk'a' hot' Yesú Eun ná

¹⁸ Yam Yesú nyu Eun peue cum heun' ná ut' ce rop ri ná, Eun tuil' leukah' lah' ri kaw tang glu ná heul' hk'a'teh'. ¹⁹ Hawc' kó, peue guil leukah' ritroe ti peue ná eun lah' a ri Yesú Eun, “Seura', Mi saec' heul' tawngnhaw', kaw uí hot' Mi heul' yeut.”

²⁰ Yesú Eun top' a, “So' hk'i ná kue' a keutuí. Saec' meuh sim' peul' nang vawo ná a ku kue' han'. Daecti Kon' ai' peue ná Eun kó, hpaw Eun cá kue' vang uin' cing' ri ná.”

²¹ Tapae' ku' ti peue ná eun lah' a ri Heun, “Cawo', hk'o' Mi kah uí ing' puing' kuing' uí eun nanggal'.”

²² Daecti Yesú Eun lah' a ri heun, “Peue yeum ná kah ce puing' puri meun reu'.”

Yesú kah Eun guil' ná yut' ti

²³ Hawc' kó, Yesú Eun lec reu ná. Tapae' Eun ná ce ku lec a heul' mae' Heun. ²⁴ Guil' lomleng ná a puing' glu ná, leuum' ná a baet ti kaw nuk reu ná, daecti Yesú Eun

* 8:17 8:17 Ísaya' 53:4

buih it'. ²⁵ Tapae' na' ce ing' sawl' Eun. Ce lah', "Cawo', teum'kawm ye vaeveae. Kaw ye cum' cawn."

²⁶ Yesu' Eun lah' a ri ce, "Peue kue' hk'a' yum' leng na' pe', a ci' meuh kop keunhaw' pe' vae' lhat' nyawk'?" Hawc' ko', Eun kuh' hae' guil' na' mae' ba leuum' na'. A ku keulawn' dit' ti yen'.

²⁷ Tapae' na' ce am' nyawk'. Ce lah', "Hkawn' Eun ci' meuh peue yeuh sa'nhaw' rot ti guil' mae' ba leuum' na' a ku vae' leuceng leukah' Eun na'."

Yesu' bai' Eun peue seuca' lec lal' peue cuin

²⁸ Yam Yesu' rot Eun hk'a'teh' glu nang kuing' Gadesenes'† na', peue seuca' lec lal' peue na' ka pucti neum keutui' leumuic na' ka ing' ri Heun. Kopti sa'hao' nyawk' ka na', a'nhaw' hkuin' laee hat' ri heul' ri caona' mawn' na' saec' ti peue. ²⁹ Ka ta'ul' ri lah', "Kon' ai' Eun Peucawo' na' Mi, Mi ci' ing' lo' keunhaw' ri ya? Kaw Mi ing' keunhap' nokneh ya nanggal' yam ka na' un' nang rot ka na' aw'?"

³⁰ Vang un' seungai ka mawn' na', a kue' lic cum keuting ti cum, a saee eo' ri. ³¹ Seuca' rai na' ce hk'o' hk'ang a ri Yesu' Eun, "Mi lawn kaw ra ri tec ye ko', hk'o' Mi kah ye heul' lec lic cum teh' ce reu'."

³² Yesu' Eun lah' a ri ce, "Heul' reu'." Seuca' na' a heul' lec lic na'. Lic cum keuting na' a yawt' ti lec leuang' na'. A hk'ui' cum' yeum nang glu na' gawm'euc'. ³³ Peue go' lic na' ce hk'uih ing' lec nang veng na'. Ce eo' ri lah' peue mhawng' lawng awn' a gawm'euc' mae' lawng ka ku' meuh ri peue seuca' lec lal' peue na' ka. ³⁴ Peue veng na' ce gawm'euc' ce pucti heul' hk'eup' Yesu' Eun. Yam pun ce ri nyu Eun na', ce hk'o' Eun pucti heul' hk'ai' ti.

† 8:28 8:28 A'ko' Gerasa'

9

Yesu' bai' Eun peue ti' cung chuing' cuin nang veng Kapeni'um

¹ Yesu' Eun tang pawk reu na' tang glu na' ing' ri nang veng ri na'*. ² Yam awn' na, peue jong' peue ti' cung chuing' it' nang hk'eung it' ri ing' ri Heun ti peue. Yam Yesu' nyu Eun hk'a' yum' ce na', Eun lah' a ri peue peuyhat na' eun, "A'ai', hpum' sam'ran reu', map' mi na' plo'e' a ri hawc'."

³ Peue guil leukah' ritroe na' ce ngon' ce sawng' kuit a nang hpum' ri, "Hkawn' buih lah' Eun ku' un' nawpsang ri Peucawo' Eun."

⁴ Yesu' yawng Eun kuit ce a yeuh keutit' nang hpum' ri na', Eun lah' a ri ce, "A ci' meuh kop keunhaw', pe' vae' kuit a nang hpum' ri yeuhki'? ⁵ 'Map' mi na' plo'e' a ri hawc': Na' Ui' lah' a yeuh keutit', a na' sam'ran aw? A'ko', 'Kuh' mi na' long hk'a' ing' reu.' Leukah' nangnhaw' a ci' na' ca ri sam'ran? ⁶ Daecti sum' kah Ui' pe' yawng, Kon' ai' peue na' punta kaw Eun plo'e' map' na', Eun kue' ti'ca nang lok na'." Hawc' ko', Eun lah' a ri peue ti' cung chuing' na' eun, "Kaw Ui' lah' a ri mi, kuh' klawm' hk'eung it' mi na' ing' ti nya mi reu'." ⁷ Peue awn' eun ku kuh' ing' ti nya ri. ⁸ Yam peue heun' na' nyu ce a na', ce lhat'. Ce suk'seun' Peucawo' Cawo' tuil' ti'ca yeuhki' na' ri peue na' Eun.

Yesu' klawng Eun ri ti Mahtae eun

⁹ Yam Yesu' puc Eun ri heul' hk'ai' mawn' na', Eun nyu peue ti peue muis Mahtae. Eun mok' nang tup' cep' hkawn' na'. Yesu' Eun lah' a ri heun, "Hot' Ui' heul' reu'." Mahtae eun ku kuh' hot' Yesu' Eun heul'.

¹⁰ Yam Yesu' mok' Eun ri som' pul nang nya eun Mahtae na', peue cep' hkawn' mae' peue map' na' ce heun' peue

* **9:1** 9:1 Veng Eun Yesu' lah' ka na' a meuh veng Kapeni'um.

ce ku mok' ri som' mae' Heun mae' tapae' Eun na' ce tiduih' yeut. ¹¹ Yam peue Hparisae' na' nyu ce yeuh a keutit' na', ce mhaing' tapae' Eun na' ce, "A ci' meuh kop keunhaw' seura' pe' na' Eun vae' som' mae' peue cep' hkawn' mae' peue map' na' ce?"

¹² Yam Yesu' mhawng' Eun yeuh a keutit' na', Eun lah', "Peue ut' sam'ran na' un' lo' ce seura' bai', peue peuyhat na' lo' ce koe. ¹³ Ku' lah' ri hk'a'nae' htawm Seunga' a lah', 'Ku' sum' is' Ui' na' meuh a hk'a' tukyak na', a hkuin' meuh hk'a' tiptan na'.[†] Ing' rin ri ti leukah' aen' a meuh lamlam ri reu', kopti hpaw Ui' ca' lih kopti punta kaw Ui' klawng ri ti peue leupaws seumeu' na' ce, daecti lih Ui' pun peue map' na' ce."

Mhaing' Yesu' Eun ri lawng eut' ku' hk'a

¹⁴ Tapae' eun Yo'han[‡] na' ce ing' mhaing' Yesu' Eun, "Ye ri mae' peue Hparisae' na' eut' ye ku' hk'a ri. A ci' meuh kop keunhaw' tapae' Mi na' ce vae' un' eut' ku' hk'a ri?"

¹⁵ Yesu' Eun top' a, "Yam me pen' na' kaw' ut' eun mae' peue ing' hk'a' chec' na' ce, pe' ci' kaw cang kah ce eut' ku' hk'a ri na' yeuh sa'nhaw'? Kaw a rot yam ti peue me pen' na' eun gah' hk'ai' ku' hk'a' chec' na' ce. Yam awn' na, ce na' eut' ku' hk'a ri yeut.

¹⁶ A'nhaw' hkuin' duing leuplu hpen' hk'u' na' ri hk'o hk'im'. A lawn yeuh keutit' ko', hpen' hk'u' na' a kaw ruit, a na' yat hk'o hk'im' na' gawm res nyawk'. ¹⁷ A'nhaw' hkuin' duing seue' leuum' pli' bui hk'u' na' nang huil' hak' hk'im' na'. A lawn yeuh keutit' ko', leuum' pli' bui na' a kaw res huil' hak' na'. Leuum' pli' bui na' a kaw bah, huil' hak' na' a kaw res. Leuum' pli' bui hk'u' na' a kaw kah ri seue' ri nang huil' hak' hk'u' na', a na' cang rok' sa' ri gawm' lal' ceu ka."

[†] 9:13 9:13 Ho'se 6:6 [‡] 9:14 9:14 Yo'han cawo' tuil' hk'a' cum'

Kon' nyom beun' yeum mae' beun' nham' lih

¹⁸ Yam Yesu' buih lah' Eun lawng aen' ce na', ro' ka sa'la vang hk'o' mun' na' eun ing' nghup' ri mae' Heun. Eun lah', "Kon' beun' ui' na' kawn' yeum eun. Hk'o' Mi ing' tang' ti' ri hk'a' pang eun. Eun na' tang kuh' im'." ¹⁹ Yesu' Eun yuk ri hot' eun heul'. Tapae' Eun na' ce ku hot' Eun heul'.

²⁰ Yam buih heul' ce na', a kue' beun' nham' lih pun kul'leual' neum ti peue eun ing' hk'a'kui' Eun Yesu' na'. Eun paic' duing' hk'a'kui' ka hk'o'[§] Eun na'. ²¹ Eun kuit a nang hpum' ri, "Ui' lawn pun ri paic' yawo hk'o' Eun na' ko', ui' kaw cuin."

²² Yesu' Eun hpawt' ri keue', Eun nyu eun. Eun lah' a ri heun, "Kon' beun' Ui', hpum' sam'ran reu'. Kopti meuh a hk'a' yum' mi na', a yeuh mi cuin hawc'." Yam awn' na, peuyhat eun beun' awn' a keulawn' cuin.

²³ Yam Yesu' lec Eun nya eun ro' ka sa'la vang hk'o' mun' na', Eun pun ri nyu peue puing' pi'^{*} na' mae' peue heun' na' glhuit' deus' ce na', ²⁴ Eun lah' a ri ce, "Puc pe' heul' reu'. Kon' nyom beun' aen' hpaw eun ca' nang yeum, gup kawn' it' eun." Daecti ce va puri keunyas cum Yesu' Eun. ²⁵ Hawc' ka yam peue heun' na' puc ce ri heul' na', Eun ing' lec ri jhawp' ti' eun kon' nyom na'. Kon' nyom na' eun ku kuh'. ²⁶ Lawng aen' a seutuin seutan laws' hk'awp' kuing' awn' a heul'.

Yesu' bai' Eun peue ngai' lec' cuin

[§] 9:20 9:20 A meuh sawe duing' hk'a'kui' ka hk'o' na'. ^{*} 9:23 9:23 Puing' pi' nang pawe peue yeum.

²⁷ Yam Yesú puc Eun ri heul' hk'ai' teh' ná, peue ngai' lec' la' peue ná' ka hot' ri klawng ri lah' a ri Heun, “Kon' ai' Davit'†, hk'o' Mi tuckyak ri ya.”

²⁸ Hawc' ka Yesú ing' lec' Eun nya ná, peue ngai' lec' awn' ka ing' ri Heun. Eun mhaing' ka, “Tup yum' pa' cang yeuh Ui' ceu nang aen' a aw?”

Ka top' a, “Cawo', yum' ya a yeut.”

²⁹ Yesú Eun paic' ngai' ka ná, Eun lah', “Kah a meuh seun' hk'a' yum' pa' ná' reu.” ³⁰ Ka ku tang cang nyu hk'a' ri. Yesú Eun deun' ka meulamlam ri. Eun lah', “Pawlae lah' a'nhaw' mhawng' lawng aen' a saec' ti peue.” ³¹ Daecti ka pucti heul' lah' ris lawng Eun Yesú ná' a laws' seutuinn seutan hk'awp' kuing' awn' a heul'.

Yesú bai' Eun peue un' cang leukah' cuin

³² Yam buih puc ce ri heul' ná, peue va peue seuca' lec' un' cang leukah' ing' ri Yesú Eun. ³³ Yam hawc' ra Eun ri tec seuca' ná, peue un' cang leukah' awn' eun tawl' cang leukah'. Peue cum heun' ná' ce am' nyawk'. Ce lah', “Hkuin' nang duing nyu ku' yeuhki' hk'a'naee peue I'sarela' ná' saec' ti pok.”

³⁴ Daecti peue Hparisae' ná' ce lah', “Cu Eun tí'ca ka cawo' seuca' ná' Eun ra ri tec seuca' ná'.”

Peue yeuh kan' ná' leng ce

³⁵ Yesú Eun heul' nang veng nang yung' ná' hk'awp'. Eun sangsawn' nang sa'la vang hk'o' mun' ce ná. Eun sangsawn' leukah' mun' ren'kawn lawng kuing' Eun Peu-cawo' ná. Eun bai' peuyhat ce peue ná' cuin. ³⁶ Yam nyu Eun peue cum heun' ná' ce, kopti hpum' suksak ce un' kue' nang teum'kawm ce seun' kon'yung' un' kue' cawo' go' ná,

† 9:27 9:27 Peue Yu'da ná' keutui' hpum' ce Hkrit Eun kaw pucti lih neum ceucat eun hkun'haw' hkam' Davit' ná. Kop awn' na, peue lah' Hkrit Eun meuh “Kon' ai' Davit’”.

Eun tuckyak ri ce nyawk'. ³⁷ Eun lah' a ri tapae' ri na' ce, "Ngho' hk'o' vuic na' kue' ka heun', daecti peue vuic ngho' na' ce leng. ³⁸ Kop awn' na, hk'o' Cawo' na na' Eun cus' peue vuic ngho' na' ce heul' ri vang vuic ngho' na' reu'."

10

Yesu' cus' Eun peue caee kul'leual' peue ri na' ce pucti heul'

¹ Yesu' klawng Eun ri cu tapae' kul'leual' peue ri na' ce. Eun tuil' ti'ca ra ri tec seuca' na' mae' ti'ca bai' peue peuyhat cuin na' ri ce.

² Muis ce peue caee kul'leual' peue Eun Yesu' na' ce ku' nanggal' ti peue na' a meuh Si'mon (ku' klawng peue muis Petru') mae' awng' eun muis Andre, Yakop' mae' awng' eun muis Yo'han, ka meuh kon' me eun Yebedae', ³ Hpi'lip' mae' Bahto'lome', Hto'mas' mae' Mahtae ku' meuh peue cep' hkawn', Yakop' kon' me eun Alfeas' mae' Htadeas', ⁴ Si'mon ku' klawng peue eun meuh peue ritroe reng* na' eun mae' Yu'das' I'sakariot' ku' kaw fuin Yesu' Eun na' eun.

⁵ Yesu' cus' Eun peue caee kul'leual' peue na' ce pucti heul'. Eun tuil' leukah' ri ce, "Pawlaee heul' ri peue un' meuh peue ceu Yu'da na' ce, a'ko' pawlaee heul' nang veng ce peue Samari' na'. ⁶ Daecti heul' sok kon'yung' rai' heul' ce peue I'sarela' na' reu'. ⁷ Yam buih heul' pe' na', pe' na' heul' sangsawn' lah', 'Kuing' ka kuing' pang mao' na' kaw a hk'aws' rot hawc'. ⁸ Bai' peue peuyhat na' ce cuin. Yeuh peue yeum na' ce tang kuh' im'. Bai' peue naw na' ce cuin. Ra ri tec seuca' na' ce. Seun' pun hk'o' hk'awng' pe' a, tang tuil' hk'o' hk'awng' a. ⁹ Pawlaee seue' leumuil, hk'il', a'ko' tong hk'a'naee sae' caet' pe' na' heul'. ¹⁰ Pawlaee reuk huil' heul', a'ko' pawlaee pin' ri is' hk'o' htok', a'ko' jhaep' htok',

* **10:4** 10:4 Peue ritroe reng na' meuh ce muk peue ham'tap ritroe kuing' na'.

a'ko' hku'ji hot' hk'a' ri, kopti peue yeuh kan' na' htuk' eun ri pun ngos reng ri.

¹¹ Yam lec pé veng nangnhaw', a'ko' yung' nangnhaw' na', sok peue kuing'hpaw na' eun. Ut' nang nya eun na' rot ti yam puc pé ri heul' hk'ai' yung' awn' na. ¹² Yam ing' lec pé nya na', nap mun' ri ce reu'. ¹³ Nya awn' a lawn rap ri ti pé meulamlam ko', kah hk'a' kuit nyawk' kuit sam'ran cumyen' pé na' kue' ri nya awn' a reu'. Daecti a lawn un' yeuh keutit' ko', kah hk'a' kuit nyawk' kuit sam'ran cumyen' na' keutah ing' ri pé reu'. ¹⁴ Peue lawn un' rap ri ti pé, a'ko' un' leuceng leukah' pé na' ko', yam puc pé ri heul' hk'ai' nya, a'ko' hk'ai' veng awn' a na', raws' ri tec peuluing pit dak cung pé na' reu'.† ¹⁵ Uí lah' a ri pé neumneum, 'Hk'a'naee seunyi taws' a'mu na', a'mu ka veng So'dom na' maeé veng Gomorah na' a kaw'n seuyung' hk'ai' a'mu ka veng awn' na.' ¹⁶ Cus' Uí pé heul' seun' kon'yung' heul' hk'a'naee mhu' ka ruk na'. Kop awn' na, yeuh ri heng'laet' seun' seueueng' na', yeuh ri un' kue' pit seun' gui' na' reu'.

¹⁷ Uin' sati ri ko' reu'. Kaw peue mheut' ri ti pé heul' nang sa'nam' ka veng na'. Peue kaw ta'faet' pé hk'a'naee sa'la vang hk'o' mun' na'. ¹⁸ Meuh a kopti Uí ri, pé kaw pun ri va ri heul' nanggal' ce cawo' veng na' maeé hkun'haw'hkam' na' ce. Pé kaw kah ri hkam' sa'hki' ri ce maeé ri peue un' meuh peue ceu Yu'da na' ce. ¹⁹ Yam mheut' peue pé na', pawlaee hki'keung ri ku' kaw pé top' maeé ku' kaw pé lah' na'. Yam rot a yam awn' na, Cit' seunga' chak' na' kaw a tuil' ku' kaw pé lah' na' ri pé. ²⁰ Kopti hpaw a ca' meuh ku' lah' pé meun, daecti meuh a ku' Cit' seunga' chak' Eun A'kuiing' pé na' lah' ka, a suip ri cu pé lah' a na'.

† 10:14 10:14 Maku' 6:11; Lu'ka 9:5; 10:10-11; Peue caee 13:51

²¹ Awng'ec' na' ce kaw fuin puri rot ti ap ce puri ri peue kue' an'nya na' ce kah peue yeuh ce yeum. Kuiing' na' ce kaw fuin kon' ri, kon' na' ce kaw fuin makuiing' ri na' ce rot ti ap ce puri ri peue kue' an'nya na' ce kah peue yeuh ce yeum. ²² Kopti meuh a Ui' ri, peue gawm'euc' peue kaw nyu pe' pereng ri. Daecti peue yeun' hkam a rot tisut' ka na' kaw ce pun ri lawtpon. ‡ ²³ Peue lawn keunhap' nokneh pe' nang veng ti veng na' ko', hk'uih heul' nang veng tawk seubu na' reu'. Ui' lah' a ri pe' neumneum, cu yam na' pe' un' nang eo' veng ka I'sarela' na' hk'awp' na', Kon' ai' peue na' kaw Eun lih rot.

²⁴ Tapaé' na' hpaw eun ca' keuting hk'ai' seura' ri na' eun. Mhai' keuting hk'ai' cawo' ri na' a ku hkuin' kue'. ²⁵ Tapaé' na' eun lawn keuteul hpeng seura' ri na' eun maeé' mhai' na' eun lawn keuteul hpeng cawo' ri na' eun ko', hk'o' ka hawc'. Peue lawn klawng cawo' nya na' eun meuh Be'el'sebu' § ko', peue ci' pe na' klawng peue nya peue hk'ul' eun na' ce lheu' aen' na pe a' neng?

²⁶ Kop awn' na, pawlaee lhat' ri ce. Ku' kuip ri na' a kaw pun ri tuh' ri. Ku' mo' ri na' a kaw pun ri yawng ri. ²⁷ Ku' lah' Ui' ri pe' nang duim' na' tang lah' a vang ceng' na' reu'. Ku' sop' sep' lah' ri nang yhuk' pe' na' tang pao' a pang seubul nya na' reu'. ²⁸ Pawlaee lhat' ri peue cang toh yawo jawngkui' tu' na' daecti ce un' cang toh civit na'. Daecti lhat' til ri Peucawo' Cawo' cang toh civit maeé' jawngkui' tu' hk'a' naee keutong' nyarok na' Eun reu'. ²⁹ A' raic' lah' tu' na' paing' a ri ti paec, un' meuh ka aw? Daecti a lawn un' meuh alo Eun Kuiing' pe' na' Eun ko', a hkuin' kue' nang hk'ui' pang bhen' keute' na' saec' ti tu'. ³⁰ Saec' meuh huik' cing' pe' na' ku nyeng ka, mhin' Eun a gawm'euc'

‡ 10:22 10:22 Maku' 13:13 § 10:25 10:25 A meuh muis ka Satan na'.

hawc'. ³¹ Kop awn' na pawlaee lhat', ngos heun' pe' hk'ai' a'raic heun' tu' na' ce.

³² A'nhaw' lawn lah' ri rap ri ti Ui' nanggal' to'nha' ce peue na' ko', Ui' ku kaw lah' ri rap ri ti eun nanggal' to'nha' Eun A'kuiing' nang kuiing' pang mao' na' yeut. ³³ Daecti a'nhaw' lawn lah' ri un' yawng Ui' nanggal' to'nha' ce peue na' ko', Ui' ku kaw lah' ri un' yawng eun nanggal' to'nha' Eun A'kuiing' nang kuiing' pang mao' na' yeut.

³⁴ Pawlaee hteum' Ui' ti hk'a' kuit nyawk' kuit sam'ran cumyen' na' lih pang bhen' keute' na'. Hpaw Ui' ca' ti hk'a' kuit nyawk' kuit sam'ran cumyen' na' lih, daecti ti Ui' leungawng na' lih. ³⁵ Kopti lih Ui' punta kaw Ui' yeuh 'kon' me na' eun to'tam' kuiing' ri,

kon' beun' na' eun to'tam' ma ri,
leumeun na' eun to'tam' a'oe' ri,

³⁶ ransu ce na' kaw a meuh peue nya peue hk'ul' ce na' ce meun.*

³⁷ A'nhaw' lawn leumeus' makuiing' ri ce lheu' Ui' ri na' ko', hpaw eun ca' kuiing' mae' Ui'. A'nhaw' lawn leumeus' kon' beun' kon' me ri ce lheu' Ui' ri na' ko', eun ku un' kuiing' mae' Ui'. ³⁸ A'nhaw' lawn un' klawm' kleum' rawng'tawp' ri na' un' hot' Ui' ko', hpaw eun ca' kuiing' mae' Ui'. ³⁹ A'nhaw' lawn jhawp' a'yu ri na' ko', eun kaw pun ri sum a'yu ri. A'nhaw' lawn sum a'yu ri na' pun Ui' ko', eun kaw pun a'yu ri.

⁴⁰ A'nhaw' lawn rap ri ti pe' ko', eun ku rap ri ti Ui'. A'nhaw' lawn rap ri ti Ui' ko', eun ku rap ri ti Cawo' ku' cus' U' lih na' Eun yeut. ⁴¹ Peue suip leukah' Eun Peucawo' na' kopti meuh eun peue suip leukah' Eun Peucawo' na' a'nhaw' lawn rap ri ti eun ko', ku' rap ri ti na' eun kaw pun lapsawng' na' seun' peue suip leukah' Eun Peucawo' na' ce yeut. Peue leupaws seumeu' na' kopti meuh eun peue

* 10:36 10:36 Mi'hka 7:6

leupaws seumeu' na' a'nhaw' lawn rap ri ti eun ko', ku' rap ri ti na' eun kaw pun lapsawng' na' seun' peue leupaws seumeu' na' ce yeut. ⁴² Peue aet' aen' ce kopti meuh ce tapae' Ui' na', a'nhaw' lawn tuil' ce ri ti ri peue nyui leuum' seucet ti kaw' ko', Ui' lah' a ri pe' neumneum, lapsawng' eun peue tuil' leuum' na' hpaw a ca' kaw laee rai'."

11

Yesu' mae' Yo'han cawo' tuil' hk'a' cum'

¹ Yam Yesu' hawc' Eun sangsawn' ri tapae' kul'leual' peue ri na' ce na', Eun pucti heul' hk'ai' teh' na'. Eun heul' sangsawn' leukah' mun' nang yung' nang veng ka kuing' Galilae' na'.

² Yam Yo'han ut' eun nang htawng' eun pun ri mhawng' lawng ku' yeuh Eun Hkrit na', Eun cus' tapae' ri na' ce ³ heul' mhaing' Yesu' Eun, "Meuh Mi ku' kaw ing' na' Eun hawc' aw? A'ko', kawn' kaw ye ko' nang seubu aw?"

⁴ Yesu' Eun top' a, "Ing' lah' Yo'han eun mhawng' ku' nyu ku' mhawng' pe' na' reu'. ⁵ Peue ngai' lec' na' tang nyu ce hk'a' ri. Peue cung lu na' ce tang cang heul'. Peue peuyhat naw na' ce tang chak' ngam. Peue lhuit' na' ce tang cang mhawng'. Peue yeum na' ce tang kuh' im'. Peue hk'o'tukyak na' pun ce ri mhawng' leukah' mun' ren'kawn na'. ⁶ Mun' keuting ri peue un' kangkae ri Ui' na' ce."

⁷ Yam tapae' eun Yo'han na' buih keutah ing' ce na', Yesu' Eun lah' peue cum heun' na' ce mhawng' lawng eun Yo'han na'. Eun lah', "Pe' ci' heul' nawk keunhaw' vang hk'oh'hk'oeng' na'? Heul' nawk pe' guil' puing' a maeew' a fuii'fai' na' aw? ⁸ A'ko', pe' ci' heul' nawk keunhaw'? Heul' nawk pe' peue cuip' hk'eung chak' hk'eung ngam na' eun aw? Uih', peue cuip' hk'eung chak' hk'eung ngam na' ut' eun nang haw' eun hkun'haw' hkam' na'. ⁹ A'ko', pe' ci' heul' nawk keunhaw'? Heul' nawk pe' peue suip' leukah'

Eun Peucawó ná eun aw? Euh, heul' nawk pé peue suip leukah' Eun Peucawó ná eun yeut. Daecti kaw'n' lheu' eun peue suip leukah' Eun Peucawó ná eun. ¹⁰ Eun meuh peue ku' tem' ri uin' ri nang htawm Seunga'. A lah' ri yeuhki' ná,
'Keue', kaw Uí' cus' peue caee ri ná' eun heul' nanggal' Mi.

Kaw eun bai mhe' hk'a' Mi ná' heul' nanggal'.*

¹¹ Uí' lah' a ri pé' neumneum, peue keut' lih neum beun' ná' a hkuin' laee kue' nang keuting hk'ai' Yo'han cawó' tuil' hk'a' cum' ná' eun saec' ti peue. Daecti peue aet' hk'ai' peue nang kuing' pang mao' ná' eun kaw'n' keuting hk'ai' Yo'han eun. ¹² Tang' neum cu eun Yo'han cawó' tuil' hk'a' cum' ná' rot seunyaen' ná', kuing' pang mao' ná' meuh a ku' peue ná' sok peue a maeé' hpum' há' hpum' huk' ri. Peue hpum' há' hpum' huk' ná' ce rutrim' ri ti a pun. ¹³ Kopti leukah' ce peue suip leukah' Eun Peucawó' ná' maeé' htawm ka leukah' ritroe ná' ce gawm'euc' tamnai a lawng ku' kaw meuh ná' rot ti cu eun Yo'han ná'. ¹⁴ Pé' lawn sahpaw' ri rap ri ti a ko', peue aen' meuh eun E'li'ya ku' kaw ing' ná' eun hawc'.† ¹⁵ Peue kue' yhuk' ná' leuceng a meulamlam ri reu'.

¹⁶ Uí' cí' kaw keutec peue cu aen' ce maeé' keunhaw'? Seun' ce kon' nyom ti cum mok' nang keulas ce klawng ri lah' a ri a'mawo ri ná' ce,

¹⁷ 'Ye saec' puing' pi' pun pé',
pé' hkuin' cha ri.

Ye saec' lah' cai hpum' sui',
pé' hkuin' hpum' sui'.

¹⁸ Kopti Yo'han ing' eun, eun un' hk'asom', un' nyui leuum' plí' bui ná', ce lah', 'Seuca' a lec eun.' ¹⁹ Kon' aí' peue ná' lih Eun, Eun hk'asom' ná', ce lah', 'Eun meuh peue hk'a pon hk'a lheu', nyui leuum' plí' bui pon lheu', maeé' meuh

* **11:10** 11:10 Malahki' 3:1 † **11:14** 11:14 Malahki' 4:5

a'mawo peue cep' hkawn' maeé' peue map' na' ce.' Daecti punta peuyhá' cu'yi Eun Peucawo' na' cawp' ka na', peue rap ri ti peuyhá' cu'yi Eun na' ce tuh' a hawc'."

Veng un' taws' hpum' fuin map' ri kaw pun ri kuit nyhap'

²⁰ Ku' hk'o'am' keuting na' Yesu' Eun saec' yeuh a hk'a'naee veng aen' ce hk'a' heun' ko', daecti kopti ce hkuin' taws' hpum' fuin map' ri na', Yesu' Eun tang' ri ram ri veng aen' ce. ²¹ Eun lah', "Veng Hko'rasin, kaw mi pun ri hkam' hk'a' jha' na'. Saec' veng Betsai'da' na', mi ku kaw pun ri hkam' hk'a' jha' na' yeut. Kopti ku' hk'o'am' yeuh ri nang veng pa' na' a lawn yeuh ri nang veng Tai'ra' maeé' veng Si'don na' ko', ce ku na' taws' hpum' fuin map' ri cuip' hk'eung htong'tai' mok' nang peuluing[‡] leumah' hawc' yeut. ²² Ui' lah' a ri pa', 'Hk'a'naee seunyi taws' a'mu na', a'mu ka veng Tai'ra' na' maeé' veng Si'don na' a kaw'n seuyung' hk'ai' a'mu pa' na.' ²³ Veng Kapeni'um, kaw mi pun ri yuk ri huk' pang mao' aw? Uih', kaw mi pun ri hk'ui'c' lih nang keutong'nyarok na'. Kopti ku' hk'o'am' yeuh ri nang veng mi na' a lawn yeuh ri nang veng So'dom na' ko', ce ku na' kaw'n kue' rot seunyaen' yeut. ²⁴ Ui' lah' a ri mi, 'Hk'a'naee seunyi taws' a'mu na', a'mu ka veng So'dom na' a kaw'n seuyung' hk'ai' a'mu mi na.' "

Ing' keului' ri ri Ui'

²⁵ Yam awn' na, Yesu' Eun lah', "A'kuiing' Cawo' kuing' pang mao' maeé' bhen' keute' na' Mi, Ui' suk'seun' Mi kopti mo' Mi lawng aen' a ri peue kue' cu'yi na' ce maeé' peue cang yawng na' ce. Daecti Mi tuil' peue sum'hpap na' ce nyu a. ²⁶ A'kuiing', aen' meuh a ku' htuk' hpum' Mi.

²⁷ Kuiing' Ui' ap Eun ku ceu gawm'euc' na' ri Ui' hawc'. A lawn un' meuh A'kuiing' Eun ko', a'nhaw' hkuin' yawng

[‡] 11:21 11:21 Aen' a meuh sa'hki' tuil' peue nyu ku' kuit nyhap' ri na'.

Kon' ai' Eun saec' ti peue. A lawn un' meuh Kon' ai' Eun mae' ku' Kon' ai' sum' tuh' Eun peue yawng A'kuiing' Eun na' ko', a'nhaw' hkuin' yawng A'kuiing' Eun saec' ti peue."

²⁸ Peue tal na' mae' peue peus beus seucen na' ing' ri Ui' reu'. Kaw Ui' tuil' pe' keului' ri. ²⁹ Leuceng leukah' Ui' na' hot' rin ri ti Ui', kopti hpum' Ui' na' onawn' ka. Civit pe' na' a kaw pun ri keului' ri. ³⁰ Kopti leuceng leukah' Ui' na' sam'ran ka, beus Ui' na' a ku seuyung'.

12

Yesu' Cawo' ka seunyi Sin' na' Eun

¹ Yam seunyi Sin' na', Yesu' Eun hpa' mal' ngho' na' heul'. Tapae' Eun na' ce sum' som'. Ce sec' ti sip' seukuk ngho' na'. ² Yam peue Hparisae' na' nyu ce a na', ce lah' a ri Yesu' Eun, "Keue' reu', tapae' Mi na' buih yeuh ce ku' kleuc' ri leukah' ritroe na' hk'a'naee seunyi Sin' na'."

³ Yesu' Eun top' a, "Yam Davit' eun mae' pu eun na' sum' som' nyawk' ce na', eun ci' yeuh keunhaw' na' un' duing lip pe' lawng ka na' aw? ⁴ Davit' eun lec hk'a'naee nya Eun Peucawo' na'. Eun ti ri hk'a' hkawomun' tan peue na'. Eun ku' tuil' pu ri na' ce hk'a' a yeut. Hkawomun' awn' a lawn un' meuh yawo peue jhawp' rit na' ce ko', ce hkuin' cang hk'a' a. ⁵ Lawng peue jhawp' rit na' yeuh ce kan' ri na' hk'a'naee nya hk'o' mun' keuting na' hk'a'naee seunyi Sin' na', a meuh ku' kleuc' ri leukah' ritroe na' daecti ce hkuin' to' ri kleuc' na', un' duing lip pe' lawng aen' a nang htawm leukah' ritroe na' aw? ⁶ Daecti Ui' lah' a ri pe', maen' na' kue' a nang keuting hk'ai' nya hk'o' mun' keuting na'. ⁷ Leukah' lah' ri, 'Ku' sum' is' Ui' na' meuh a hk'a' tukyak na', a hkuin' meuh hk'a' tiptan na', * pe' lawn leuceng pun leukah' aen' a ko', pe' hkuin' kaw duing tang' map' ri peue

* 12:7 12:7 Haw'se 6:6

un' kue' ku' kleuc' na' ce. ⁸ Kopti Kon' ai' peue na' meuh Eun cawo' ka seunyi Sin' na'."

⁹ Eun pucti heul' hk'ai' mawn' na', Eun lec hk'a'naee sa'la vang hk'o' mun' ce na'. ¹⁰ Mawn' na' a kue' peue ti' chuing' ti plak' ti peue. Peue ngon' na' ce buih sok hk'a' kaw ri tang' map' ri Yesu' Eun. Yesu' Eun mhaing' ce, "Bai' peue peuyhat cuin hk'a'naee seunyi Sin' na' kleuc' a leukah' ritroe na' aw?"

¹¹ Hawc' ko', Eun lah' a ri ce, "A'nhaw' lawn kue' kon'yung' ti tu', a na' hk'uic' nang lamo' hk'a'naee seunyi Sin' na' ko', kaw eun un' hue' a pucti lih aw? ¹² Peue na' peue ci' pe ngos heun' hk'ai' kon'yung' na' a'neng? Kop awn' na, yeuh ku' chak' na' hk'a'naee seunyi Sin' na' cawp' a hot' leukah' ritroe na' hawc'."

¹³ Hawc' ko', Eun lah' a ri peue awn' eun, "Nyat' ti' mi na' reu'." Eun ku nyat' a. Ti' eun na' a tang chak' seun' hk'a' ti plak' na'. ¹⁴ Daecti peue Hparisae' na' ce pucti heul'. Ce ci' kaw cang pun ri toh Yesu' Eun yeuh sa'nhaw' na', ce heul' sa'lit puri.

Mhai' Peucawo' leuk Eun ri uin'

¹⁵ Yam Yesu' yawng Eun lawng awn' a na', Eun pucti heul' hk'ai' mawn' na'. Peue heun' na' ce hot' Eun heul'. Eun bai' peuyhat ce na' cuin euc'. ¹⁶ Yesu' Eun tuil' leukah' un' kah ce lah' meuh ri a'nhaw' na'. ¹⁷ Aen' a meuh neumneum hot' seun' ku' I'saya' peue suip leukah' Eun Peucawo' na' lah' eun yeuhki' na',

¹⁸ "Hkaen' meuh Eun mhai' Uí' ku' leuk Uí' ri uin' na' Eun. Uí' leumeus' Eun. Eun hit' ri hpum' Uí' nyawk'.

Uí' kaw cus' Cit' seungá' ri na' lih hk'a' pang Eun.

Eun kaw pao' lawng ka hk'a' leupaws seumeu' Uí' na' ri peue ceu gawm'euc'.

¹⁹ Eun hkuin' kaw kleuc' leumeul a'nhaw', a'ko' hkuin' kaw ta'ul' seng' laws'.

A'nhaw' hkuin' kaw mhawng' seng' klawng Eun nang gon'hk'a'.

²⁰ Cu yam un' nang ti Eun hk'a' leupaws seumeu' na' rot ti vang pe na' ko', maeaw' kaw hk'aws' beuk' na' Eun hkuin' kaw yeuh a deut, saee ka kaw' ngawl ha' a kaw hk'aws' laic na' Eun hkuin' kaw juit' a laic.

²¹ Peue ceu gawm'euc' na' peue kaw uin' hk'a' keutui' hpum' ri na' ri muis Eun na'."†

Yesu' Eun mae' Be'el'sebu'

²² Hawc' awn' na, peue va peue ngai' lec', nga', seuca' a lec eun na' eun ing' ri Yesu' Eun ti peue. Eun bai' peue awn' eun cuin. Eun cang leukah', cang nyu hk'a' ri. ²³ Peue cum heun' na' ce am' nyawk'. Ce lah', "Hkawn' na' Eun chak' cang meuh Kon' ai' eun Davit' na' eun aw'?"

²⁴ Yam peue Hparisae' na' pun ce ri mhawng' a na', ce lah', "Peue aen' cu Eun ti'ca ka cawo' seuca' Be'el'sebu' na' Eun ra ri tec seuca' na'."

²⁵ Yesu' Eun yawng ku' kuit ce na', Eun lah' a ri ce, "Kuing' ces ri puri meun ku kuing' na' a kaw lulaic. Nyahk'ul' ces ri puri ku nya na' a hkuin' kaw cang keutawn'. ²⁶ Seuca' na' a lawn ra puri hk'uih meun ko', kaw ce taic'jah hk'ai' puri meun yeut. Kuing' ce na' a ci' kaw cang keutawn' yeuh sa'nhaw'? ²⁷ Ui' lawn puing Be'el'sebu' na' Ui' ra ri tec seuca' na' ko', peue pe' na' ce ci' na' puing a'nhaw' ce ra ri tec seuca' na'? Kop awn' na, kaw ce meuh nang taws' a' mu ri pe'. ²⁸ Daecti Ui' lawn puing Cit' seunga' Eun Peucawo' na' Ui' ra ri tec seuca' na' ce ko', kuing' Eun Peucawo' na' rot a mae' pe' hawc'.

²⁹ Peue lawn un' nang mawt ri uin' peue kaw'reng keuting na' eun nanggal' hawc' ko', a'nhaw' hkuin' kaw

† 12:21 12:21 I'saya' 42:1-4

cang ing' lec ri rim' ri ti vahtu' hk'il' leumuil ka nya eun na' saec' ti peue. Mawt ri uin' peue kaw' reng keuting na' eun nanggal' hawc', peue na' kaw'n' cang lec nya eun na' rim' ri ti vahtu' hk'il' leumuil eun na' heul'.

³⁰ Peue un' ut' hk'a' Ui' na' meuh ce ransu ri Ui'. Peue un' hk'on'ro mae' Ui' na' meuh ce peue pun ri taic'jah puin' ri tec. ³¹ Kop awn' na Ui' lah' a ri pe', map' yeuh peue na' mae' leukah' un' nawpsang lah' peue na' gawm'euc' ka kaw a cang plo'e' ri. Daecti map' un' nawpsang Cit' seunga' na' un' laee cang plo'e' a ri. ³² A'nhaw' lawn lah' kleuc' ri Kon' ai' peue na' Eun ko', Peucawo' Eun kaw plo'e' map' eun. Daecti a'nhaw' lawn lah' ku' un' nawpsang ri Cit' seunga' chak' na' ko', Eun hkuin' kaw laee plo'e' map' eun na' saec' meuh cu maet'maen', a'ko' cu hk'a' cat na'.

Kleum' chak' na' pli' chak' ka

³³ Kleum' chak' na' pli' a pli' chak', kleum' un' chak' na' pli' a pli' un' chak'. Kopti meuh a pli' ka na', e' cang yawng kleum' ka na'. ³⁴ Kon' hk'i ka seueueng' sa'hao' na' pe', meuh pe' peue rai. Kopti moeng na' lah' a ku' nuk pucti lih neum hpum' na', pe' ci' kaw cang lah' ku' chak' na' yeuh sa'nhaw'? ³⁵ Peue chak' na' hue' ce ku' chak' na' lih neum vang uin' ce hk'eung chak' nang tu' ri na'. Peue rai na' hue' ce ku' rai na' lih neum vang uin' ce hk'eung rai nang tu' ri na'. ³⁶ Ui' lah' a ri pe', hk'a'naee seunyi yam taws' a'mu na', peue na' kaw peue kah ri ti beus ka leukah' sa'hao' tawn lah' ce pucti lih na' ku moeng ka. ³⁷ Kopti kaw pe' pun hk'a' ciyang na', a'ko' kaw pe' pun hk'a' lawtpon na', ut' a ri leukah' lah' pe' na' yeut."

Het' keuting eun Yo'na'

³⁸ Yam awn' na, peue Hparisae' mae' peue guil leukah' ritroe na' ce ing' hk'o' a ri Yesu' Eun, "Seura', sum' nyu ye het' keuting yeuh Mi."

³⁹ Eun top' a, "Peue cu aen' meuh ce cat peue rai maeé' ce meuh peue fuin Peucawo' Eun. Ce hk'o' het' keuting na', daecti a lawn un' meuh yawo het' keuting eun Yo'na' peue suip leukah' Eun Peucawo' na' eun ko', het' keuting seubu na' un' tuil' a ri ce saec' ti ceu. ⁴⁰ Kopti seun' Yo'na' pun eun ri ut' nang keuteul ka ka' keuting na' pun loe' sum' loe' seunyi na', saec' meuh Kon' ai' peue na' Eun ku kaw pun ri ut' nang keute' pun loe' sum' loe' seunyi. ⁴¹ Seunyi yam taws' a'mu na', peue veng Ni'nave na' ce ku kuh' maeé' peue cat aen' ce. Ce kaw taws' a'mu ri ce. Kopti meuh a leukah' mun' sangsawn' eun Yo'na' na', peue veng Ni'nave na' ce taws' hpum' fuin map' ri. Maet' maen', nang keuting hk'ai' Yo'na' eun na' ut' Eun maen' hawc'. ⁴² Seunyi yam taws' a'mu na', nang' haw' hkam' kuing' hk'a' col na' ka kaw kuh' maeé' peue cat aen' ce. Ka kaw taws' a'mu ri ce. Kopti punta kaw ka leuceng leukah' cu'yi eun Saw'lamon na', ka ing' neum vang lok na' sut' ka na'. Maet' maen', nang keuting hk'ai' Saw'lamon eun na' ut' Eun maen' hawc'.

⁴³ Yam seuca' rai na' puc a ri lih hk'ai' peue na' eun, a eo' sok vang kaw ri keului' nang vang hk'oh' hk'oeng' na'. Yam sok un' nyu ka vang kaw ri keului' na', ⁴⁴ a lah', 'Kaw ui' tang ing' ti nya vang puc ui' ri lih heul' na'. Yam ing' rot a ri vang ut' hk'im' ri na', a pun ri nyu nya awn' un' kue' a nang ut', a pis' hk'iu' ri seunga' na'. ⁴⁵ Kop awn' na, a heul' klawng seuca' seubu rai hk'ai' ti a' res tu' na' ce ing' lec ri ut' mawn'. Vang tisut' ka na', peue awn' eun lulaic lheu' hk'im'. Peue rai cu maet' maen' na' kaw ce yeuhko' yeut."

Ma Eun Yesu' ka maeé' awng' me Eun na' ce

⁴⁶ Yam Yesu' buih sangsawn' Eun peue cum heun' na' ce na', ma Eun ka maeé' awng' me Eun na' ce cawng ko' Eun hk'a' nok na'. Ce sum' leukah' maeé' Heun. ⁴⁷ Ngon' peue

lah' a ri Yesu' Eun, "Ma Mi ka mae' awng' me Mi na' cawng ko' ce Mi hk'a' nok. Ce sum' leukah' mae' Mi."

⁴⁸ Yesu' Eun top' a ri ce, "Ma Ui' mae' awng' me Ui' na' ce ci' meuh a'nhaw'?" ⁴⁹ Eun seuji tapae' ri na' ce. Eun lah', "Hkaen' meuh ce ma Ui' mae' awng' me Ui'.

⁵⁰ Kopti a'nhaw' lawn yeuh alo Eun Kuing' Ui' Cawo' ut' nang kuing' pang ma' na' Eun ko', meuh eun ma Ui' mae' awng' me awng' beun' Ui' yeut."

13

Leukah' leupong' lawng nang puin' ku' seumal

¹ Seunyi awn' na Yesu' Eun pucti heul' hk'ai' nya awn' na. Eun heul' mok' keunam ka glu na'. ² Peue cum heun' na' ce ing' cu ri rop Eun. Eun ing' lec ri mok' hk'a' nae ka reu na'. Peue cum heun' na' ce ut' keunam ka glu na'. ³ Eun sangsawn' ce heun' ceu ri leukah' leupong' na'. Eun lah', "Peue sang' mal' ti peue na' heul' puin' eun ku' seumal ri. ⁴ Yam puin' eun ku' seumal na', ngon' a hk'ui' nang gon' hk'a'. Sim' na' a ku seut' ri hk'a a euc'. ⁵ Ngon' a hk'ui' nang tak seumu vang keute' na' ril' ka. Kopti keute' na' un' leupeul ka, a yao kaws. ⁶ Daecti kopti un' kue' a res na', yam kuc' na' tat' ka a na', a fit' hk'oh' heul'. ⁷ Ngon' a hk'ui' nang tak kat'. Bang' kat' na' a kaws, a ghuim' a. ⁸ Daecti ngon' a hk'ui' vang keute' ngeuo. A pli' tipak' pun, leskul' pun a'ko' leuo' kul' pun. ⁹ Peue kue' yhuk' na' leuceng a meulamlam ri reu'."

¹⁰ Hawc' ko', tapae' Eun na' ce ing' lah' a ri Heun, "A ci' meuh kop keunhaw' Mi vae' lah' leukah' leupong' ri peue aen' ce?"

¹¹ Eun top' a ri ce, "Lawng ka kuing' Eun Peucawo' ku' mo' ri geup' na' kaw pe' kue' ahkvang yawng a. Daecti peue seubu na' ce hkuin' kue' ahkvang yawng a. ¹² Ku' kue' na' ce ko', kaw tang tuil' ce bae. Ce na' kue' lheu' buba ri.

Daecti ku' un' kue' na' ce ko', kaw tang hue' ku' kaw'n' kue'
ce na' lih hk'ai' ce. ¹³ Kop awn' na, Ui' lah' leukah' leupong'
na' ri ce.

'Ce saec' kue' ngai', ce hkuin' nyu.

Ce saec' leuceng, ce hkuin' mhawng' mae' hkuin'
ceng' ri ka.'

¹⁴ Leukah' lah' eun I'saya' peue suip leukah' Eun Peucawo'
na' htonnuk a hk'a'naee ce. Eun lah',

'Pe' saec' na' pun ri mhawng' gawm mhawng' a, daecti pe'
hkuin' kaw duing ceng' ri ka.

Pe' saec' na' pun ri nyu gawm nyu a, daecti pe' hkuin'
kaw duing yawng a.

¹⁵ Kopti hpum' ce peue ceu aen' cen' ka.

Yhuk' ce na' a un' leuceng.

Ngai' ce na' a ku yep ri.

A lawn un' yeuh keutit' ko',

ce kaw pun ri nyu ri ngai' ri na',

mhawng' ri yhuk' ri na',

yawng ri hpum' ri na',

hpawt' ce ri ing' na'.

Hawc' ko', Ui' kaw bai' ce cuin.*

¹⁶ Daecti mun' keuting ri ngai' pe' na', kopti pun pe' ri nyu
ri ngai' ri na'. Mun' keuting ri yhuk' pe' na', kopti pun pe'
ri mhawng' ri yhuk' ri na'. ¹⁷ Kopti kaw Ui' lah' a ri pe'

neumneum, 'Peue suip leukah' Eun Peucawo' na' ce mae'
peue leupaws seumeu' na' ce heun' peue ce saec' sum' nyu
seun' ku' pun pe' ri nyu na', daecti ce hkuin' pun ri nyu a.

Ce saec' sum' mhawng' seun' ku' pun pe' ri mhawng' na',
daecti ce hkuin' pun ri mhawng' a.'

Vangdoh' ka leukah' leupong' lawng nang puin' ku' seumal

* **13:15** 13:15 I'saya' 6:9, 10

¹⁸ Leuceng ri mhawng' vangdoh' ka leukah' leupong' lawng nang puin' ku' seumal na' reu'. ¹⁹ Ku' seumal hk'uic' nang gon' hk'a' na' a meuh peue pun ri mhawng' lawng ka kuing' pang mao' daecti ce un' leuceng pun a na', seuca' rai na' ing' ti a ku' seumal puin' ri hk'a'naee hpum' ce na' heul'. ²⁰ Ku' seumal hk'uic' nang tak seumu na' a meuh peue pun ri mhawng' leukah' mun' ren'kawn na', ce keulawn' ren'kawn rap ri ti a. ²¹ Daecti kopti res ka na' un' lec ka rui' na', leukah' mun' ren'kawn na' a ut' mae' ce ti cu hkao'. Yam hk'eup' ce ku' kuit nyhap', a'ko' ku' keunhap' nokneh kopti meuh a leukah' mun' ren'kawn na', ce ku keulawn' tecla a. ²² Ku' seumal hk'uic' nang tak kat' na' a meuh peue pun ri mhawng' leukah' mun' ren'kawn na', daecti ku' kuit nyhap' hk'a'naee yam a'yu im' na' mae' hk'a' se'dai' vahtu' hk'il' leumuil na' ing' ghuim' a leukah' mun' ren'kawn na'. A yeuh leukah' mun' ren'kawn na' un' cang kue' pli'. ²³ Ku' seumal hk'uic' nang vang keute' ngeuo na' a meuh peue pun ri mhawng' leukah' mun' ren'kawn na', hawc' ko' ce leuceng pun a. A pli' lheu' ku' puin' ri na' tipak' pun, leskul' pun a'ko' leuoekul' pun."

Leukah' leupong' lawng puin' vang' ri vang puin' ngho'

²⁴ Yesu' Eun tang sangsawn' ce ri leukah' leupong' seubu na' bae. Eun lah', "Kuing' pang mao' na' seun' a peue ti peue puin' eun ku' seumal chak' nang mal' ri na'. ²⁵ Yam peue na' pun peue ri it' na', ransu eun na' eun ra ri ing' puin' seumal vang' ri vang puin' eun seumal ngho' na'. Hawc' ko', eun pucti heul'. ²⁶ Yam ngho' na' kaws ka a puc seukuk pli' ri na', vang' na' a ku kaws pucti yeut.

²⁷ Mhai' na' ce ing' lah' a ri cawo' mal' na' eun, 'Cawo', puin' mi ku' seumal chak' nang mal' ri na', un' meuh ka aw? Vang' awn' ce ci' ing' neum tawngnhaw'?"

²⁸ Cawo' mal' na' eun top' a, 'Meuh a ku' yeuh ce ransu ui' na'.'

Mhai' na' ce mhaing' eun, 'Ye lawn heul' ruic ri tec a, tup na' a chak' aw?'

²⁹ Cawo' na' eun top' a, 'Pawlaee yeuh a, kopti yam ruic pe' vang' na', na' pe' cang caw ri ruic ngho' na' yeut. ³⁰ Tae' a lak' keuting tiduih' gawm' lal' ceu rot ri yam vuic ngho' na' reu'. A lawn rot yam vuic ngho' na', kaw ui' kah peue vuic ngho' na' ce vuic ri mawt vang' na' meuh mawt ri nanggal'. Hawc' ko', ui' na' kah ce ti ri heul' dum ri tec a nang ngawl. Hawc' awn' na, ui' kaw vuic ri ti ngho' na' ing' seue' a hk'a'naee htuim' ri na'.' "

Leukah' leupong' lawng seumal hpapu

³¹ Yesu' Eun tang sangsawn' ce ri leukah' leupong' seubu na' bae. Eun lah', "Kuing' pang mao' na' seun' a seumal ka hpapu ti peue ri jheum' nang val ri na'. ³² Seumal ka na' a saec' aet' hk'ai' seumal ku' seubu na' ce ko', daecti yam kaws ka na', a meuh kleum' keuting hk'ai' kleum' ku' seubu nang val na'. Kak' ka na' ce a keuting, sim' peul' eo' nang vawo na' a ing' pleng' ri is' han' hk'a'pang kak' ka na' ce."

Leukah' leupong' lawng paeng hkawomun'

³³ Yesu' Eun tang sangsawn' ce ri leukah' leupong' seubu na' bae. Eun lah', "Kuing' pang mao' na' seun' a paeng ku' beun' na' seue' eun nang moc' hkawomun' loe' teng' na', a yeuh hkawomun' na' keulai gawm'euc' ri."

³⁴ Lawng aen' ce gawm'euc', Yesu' Eun lah' yawo leukah' leupong' na' ri ce palkoe. Pon hk'ai' leukah' leupong' na' Eun hkuin' lah' ku' seubu na' ri ce. ³⁵ Aen' meuh a neumneum htonnuk hot' seun' ku' peue suip leukah' Eun Peucawo' na' lah' eun ri uin' a na'. A lah', "Kaw Ui' lah' leukah' leupong' na'.

Ku' mo' ri tang' neum yam hpanpleng' bhen' keute' na' Ui' kaw tuh' a pucti lih.”†

Vangdoh' ka leukah' leupong' lawng puin' vang' ri vang puin' ngho'

³⁶ Hawc' awn' na, Yesu' Eun gah' hk'ai' peue cum heun' na' ce. Eun ing' lec hk'a'naee nya na'. Tapae' Eun na' ce ing' mhaing' Eun, “Hk'o' Mi lah' ye mhawng' vangdoh' ka leukah' leupong' lawng puin' vang' ri vang puin' ngho' na'.”

³⁷ Eun top' a, “Peue puin' ku' seumal chak' na' meuh a Kon' ai' peue na' Eun. ³⁸ Mal' na' a meuh bhen' keute' na'. Ku' seumal chak' na' a meuh peue ka kuing' Eun Peucawo' na' ce. Seumal vang' na' a meuh peue eun seuca' rai na' ce. ³⁹ Ransu ku' puin' vang' na' a meuh seuca' rai na' eun. Yam vuic ngho' na' a meuh yam tisut' na'. Peue vuic ngho' na' a meuh in'hpom na' ce.

⁴⁰ Vang' na' a lawn pun ri ruic ri dum ri nang ngawl na' yeuh sa'nhaw' ko', cu yam tisut' na' a ku kaw yeuhko' yeut. ⁴¹ Kon' ai' peue Eun kaw cus' in'hpom ri na' ce eo' ri ti peue ku' yeuh peue yeuh map' a pucti lih na' ce mae' peue yeuh ku' rai na' ce pucti lih gawm'euc' hk'ai' kuing' Eun Peucawo' na'. ⁴² Hawc' ko', nyon ri seue' ce nang dom' ngawl vang' ta'ul' ri yam cet rang' ri na'. ⁴³ Yam awn' na, peue leupaws seumeu' na' ce kaw ceng' seun' seunyi hk'a'naee kuing' Eun Kuing' ce na'. Peue kue' yhuk' na' leuceng a meulamlam ri reu'.

Leukah' leupong' lawng hk'eung hk'il' leumuil mo' ri mae' lawng seng' seukleu' ngos heun'

⁴⁴ Kuing' pang maos' na' seun' a hk'eung hk'il' leumuil mo' ri nang na na'. Yam peue na' nyu eun a na', eun tang

† 13:35 13:35 Suk'seun' 78:2

suip ri mo' a. Eun ren'kawn ing' paing' ku' kue' ri na' gawm'euc' ka. Hawc' ko', eun ing' leuvaee ri ti na awn' a.

⁴⁵ Kuing' pang maó' na' seun' a peue yeuh ka sok seng' seukleu' ngos heun' na' eun. ⁴⁶ Yam sok nyu eun seng' seukleu' ngos heun' ti gleun' na', eun ing' paing' ku' kue' ri na' gawm'euc' ka. Hawc' ko', eun ing' leuvaee ri ti seng' seukleu' awn' a.

Leukah' leupong' lawng reup

⁴⁷ Kuing' pang maó' na' seun' a reup ku' ploé' ri nang mha'seumut' pun ka' ku ceu na'. ⁴⁸ Yam ka' na' nuk a reup na', peue sok ka' na' ce ol' reup na' ing' keunam ka tak sai na'. Hawc' ko', ce leuk ri ti yawo pal ka' chak' na' seue' a nang teng' ri na'. Ka' un' chak' na' ce seut' ri tec a. ⁴⁹ Cu yam tisut' na' a ku kaw yeuhko' yeut. In'hpom na' ce kaw lih leuk ri tec peue rai na' ce heul' hk'ai' peue leupaws seumeu' na' ce. ⁵⁰ Hawc' ko', nyon ri seue' peue rai na' ce nang dom' ngawl vang ta'ul' ri yam cet rang' ri na'."

⁵¹ Yesu' Eun mhaing' ce, "Leuceng pun pe' lawng aen' ce hawc' aw?"

Ce top' a, "Leuceng pun ye a hawc'."

⁵² Eun lah' a ri ce, "Kop awn' na, peue guil leukah' ritroe ku' pun ri rin lawng kuing' pang maó' ku peue na' seun' ce cawo' nya hue' hk'eung hk'il' leumuil hk'u' maeé' hk'eung hk'il' leumuil hk'im' ri na' pucti lih hk'ai' vang uin' ce hk'eung ri na'."

Peue veng Nasaraet' na' un' rap ce ri ti Yesu' Eun

⁵³ Yam Yesu' hawc' Eun sangsawn' ri leukah' leupong' aen' ce na', Eun pucti heul' hk'ai' mawn' na'. ⁵⁴ Yam ing' rot Eun nang yung' ri na', Eun sangsawn' peue nang sa'la vang hk'o' mun' ce na'. Peue na' ce am' nyawk'. Ce lah' a ri puri, "Peue awn' Eun ci' pun peuyha' cu'yi maeé' ti'ca yeuh ku' hk'o'am' aen' ce neum tawngnhaw'? ⁵⁵ Meuh Eun kon'

eun laksá'má' ná' eun, un' meuh ka aw? Ma Eun ka muis Mari', awng' me Eun ná' ce muis Yakop', Yo'saep, Yu'das' maeé' Sí'mon, un' meuh ka aw? ⁵⁶ Awng' beun' Eun ná' ut' ce maeé' e' gawm'euc', un' meuh ka aw? Eun cí' pun ceu nang aen' ce neum tawngnhaw'?" ⁵⁷ Ce nyu Eun pereng ri.

Daecti, Yesu' Eun lah' a ri ce, "Peue suip leukah' Eun Peucawo' ná' pun Eun munhpung' ri ná' ri peue, daecti Eun hkuin' pun hk'a'naee vang ut' ri ná' maeé' hk'a'naee nyahk'ul' ri ná'."

⁵⁸ Kopti un' kue' ce hk'a'yum' ná', Eun hkuin' laee yeuh ku' hk'o'am' ná' heun' mawn'.

14

Yo'han cawo' tuil' hk'a' cum' yeum eun

¹ Yam awn' na, Herot' cawo' u'peung kuing' ná' pun eun ri mhawng' lawng Eun Yesu' ná'. ² Eun lah' a ri mhai' ri ná' ce, "Hkawn' meuh Eun Yo'han cawo' tuil' hk'a' cum' ná' yeum eun eun tang kuh' im'. Kop awn' na, a yeuh Eun kue' tí'ca cang yeuh ku' hk'o'am' ná' ce."

³ Kopti meuh a Herodí' beun' eun Hpi'lip' ku' meuh awng' me eun cawo' Herot' ná', cawo' Herot' eun mheut' ri seue' Yo'han eun nang htawng'. ⁴ Kopti Yo'han tawn lah' eun a ri cawo' Herot' eun, "Kopti ti mi beun' eun awng' ri ná' ka meuh beun' ri ná', mi yeuh ku' kleuc' ri leukah' ritroe ná'." ⁵ Cawo' Herot' eun saec' ná' sum' toh Yo'han eun ko', daecti eun lhat' ri peue kuing' ná' ce kopti peue kuing' ná' sawn' peue Yo'han eun meuh peue suip leukah' Eun Peucawo' ná'.

⁶ Hk'a'naee pawe seunyi keut' eun cawo' Herot' ná', kon' beun' ka Herodí' ná' eun cha ri nanggal' ce peue chec' ná', a htuk' hpum' eun cawo' Herot' nyawk'. ⁷ Cawo' Herot' eun yeuh kati ri kaw tuil' ku' kon' beun' ná' hk'o' eun ná' ku' ceu ka ri heun. ⁸ Kon' beun' awn' eun hk'o' a hot' ku' ma

eun lah' ka ri heun na'. Eun lah', "Sum' is' ui' cing' eun Yo'han cawo' tuil' hk'a' cum' na' seue' a nang paen' hpan na' tuil' a ri ui' maen' reu'." ⁹ Hkun'haw'hkam' Herot' eun kuit nyhap' nyawk'. Daecti kopti hkam' eun a hawc' na' mae' kopti keue' eun ri buh ce peue chec' na', eun tuil' leukah' hot' seun' ku' hk'o' eun kon' beun' na'. ¹⁰ Kop awn' na, Yo'han eun pun ri hkam' hk'a' reng' ngok ri na' nang htawng' na'. ¹¹ Ce seue' cing' eun Yo'han na' nang paen' hpan na' ing' tuil' a ri kon' beun' na' eun. Kon' beun' na' eun ti ri tuil' a ri ma ri na' ka. ¹² Tapae' eun Yo'han na' ce ing' ti tu' eun na'. Ce heul' puing' a. Hawc' ko', ce heul' lah' a ri Yesu' Eun.

Yesu' tuil' Eun peue hpawn'heng' na' ce som'

¹³ Yam Yesu' mhawng' Eun lawng awn' a na', Eun pawk reu na' pucti heul' hk'ai' mawn' na'. Heun ri mae' tapae' Eun na' ce va puri heul' koe ri vang yen'yong na'. Yam peue cum heun' na' pun ce ri mhawng' lawng ka na', ce pucti neum veng na' ce, ce long hk'a' hot' Eun heul'. ¹⁴ Yam Yesu' lih Eun hk'ai' reu na', Eun nyu peue cum heun' na' ce. Eun tuckyak ri ce nyawk'. Eun bai' peuyhat ce na' cuin.

¹⁵ Yam rot a hk'a'pul na', tapae' Eun na' ce ing' lah' a ri Heun, "Maen' na' seungai ka, a kaw hk'aws' fec' hawc'. Kah peue aen' ce heul' eo' ri leuvaee ku' hk'a' nang yung' caona' na' ce meun reu'."

¹⁶ Yesu' Eun lah', "Hpaw ce ca' kaw lo' ri heul'. Pe' ri tuil' ce som' reu'."

¹⁷ Tapae' na' ce lah', "Maen' na' gup kue' ye hkawomun' hpawn' meul' mae' ka' lal' tu'."

¹⁸ Yesu' Eun lah', "Ti a ing' ri Ui' maen' reu'." ¹⁹ Hawc' ko', Eun kah peue cum heun' na' ce mok' pang rip na'. Eun rap ri ti hkawomun' hpawn' meul' mae' ka' lal' tu' awn' na. Eun mung' ma' na'. Eun mun' keuting ri Peucawo' Eun. Hawc' ko', Eun ves hkawomun' na' Eun tuil' a ri tapae' na'

ce. Tapaé na' ce gvah ri tuil' a ri peue cum heun' na' ce. ²⁰Na' peue pun ri hk'a ri sak' gawm'euc' ri ko', tapaé na' ce seut' ku' hk'a lheu' na' a pun kul'leual' teng' nuk. ²¹Peue hk'a ku' hk'a na' ce, me na' ce palkoe beun' maeé kon' nyom na' ce un' sawn' ce ko', ce kue' hpawn'heng' peue.

Yesu' long Eun pang hak' leuum'

²²Yam Yesu' buih am'la Eun peue cum heun' na' ce na', Eun kah tapaé ri na' ce lec reu na' bai heul' hk'a'teh' ka glu na'. ²³Yam Yesu' hawc' am'la Eun peue cum heun' na' ce na', Eun huk' hk'o' mun' pang gong na' koe. Yam duim' ka na', Eun ut' koe ri ka. ²⁴Daecti reu na' a pon tak sai na' heul' seungai hawc'. Kopti guil' na' htuip a reu ce na', ba leuum' na' a htuip reng reu ce na'.

²⁵Yam kaw a hk'aws' ceng' na', Yesu' Eun long pang hak' leuum' na' heul' ri ce. ²⁶Yam tapaé nyu ce long Eun pang hak' leuum' na', ce tok'seupa lhat' nyawk'. Ce aec' rak laws', "Oh', hpet'."

²⁷Daecti Yesu' Eun keulawn' leukah' maeé ce, "Yeuh hpum' pé' na' hat'han' reu'. Meuh ka Ui' ri, pawlaee lhat'."

²⁸Petru' eun lah' a ri Heun, "Cawo', a lawn meuh Mi ri neum ko', kah ui' heul' pang hak' leuum' na' ri Mi."

²⁹Yesu' Eun lah', "Heul' ri' sae."

Kop awn' na, Petru' eun pucti hk'ai' reu na' eun long pang hak' leuum' na' heul' ri Yesu' Eun. ³⁰Daecti yam nyu eun guil' na' reng nyawk' ka na', eun lhat' nyawk'. Yam buih kaw eun cum' na', eun klawng ri lah', "Cawo', teum'kawm ui'."

³¹Yesu' Eun keulawn' nyat' ti' ri jhawp' eun. Eun lah', "Peue kue' hk'a' yum' leng na' mi, a ci' meuh kop keunhaw' mi vaeé kangkae."

³²Hawc' Yesu' Eun maeé Petru' lec ka reu na', guil' na' a ku yut' ri. ³³Peue ut' nang reu na' ce ing' seukluin ri faee'

Yesú Eun. Ce lah', "Meuh Mi taeng Kon' ai' Eun Peucawó neum."

Yesú bai' Eun peue peuyhat cuin nang veng Genesaret'

³⁴ Yam tang ce glu na' heul' hk'a'teh' na', ce tah' reu na' keunam ka veng Genesaret' na'. ³⁵ Yam peue ut' mawn' na' pawn ce meuh a Yesú Eun na', ce ploé' lawng aen' a heul' hk'awp' kuing' ri na'. Peue va peue peuyhat na' ce ing' ri Heun. ³⁶ Ce hk'o' Eun na' tuil' peue peuyhat na' ce paic' yawo duing' hk'o ri na'. Peue pun ri paic' a na' ce cuin gawm'euc' ri.

15

Ku' un' seunga'

¹ Peue Hparisae' maeé' peue guil leukah' ritroe lih neum veng Yeru'salaem na' ing' mhaing' ce Yesú Eun, ² "Tapae' Mi na' ce ci' yeuh keunhaw', ce vaeé' un' hot' ri yeuh ritroe ku' nang kawt tang' ce ri uin' na'? Ce hkuin' hkué' tí ri nanggal' ce hk'a ku' hk'a."

³ Yesú Eun top' a ri ce, "Kopti meuh a ritroe aen' a, a ci' meuh kop keunhaw' pé' vaeé' yeuh ku' kleuc' ri leukah' Eun Peucawó na'?" ⁴ Kopti Peucawó lah' Eun, 'Hkopyawm' yumyam' ri makuiing' mi ka reu'."* Eun ku lah', 'A'nhaw' lawn jhá' makuiing' ri ka ko', kuing' eun ri pun ri yeum.'† ⁵ Daecti pé' lah', 'A'nhaw' lawn lah' a ri makuiing' ri ka, "Hk'eung kue' ri uí' ku' kaw kue' mun' pun pa' na' a meuh ku' ap tan ri Peucawó Eun hawc'." ' ⁶ Kop awn' na, peue awn' eun un' tuil' munhpung' ri makuiing' ri ka. Kop awn' na, pé' yeuh leukah' Eun Peucawó na' hk'o' hk'awng' ri jhawp' pé' ri ti ritroe pé' na'. ⁷ Peue cang chí' lai na' pé',

* **15:4** 15:4 Pucti heul' 20:12; Saw'n' leukah' mun' 5:16 † **15:4** 15:4 Pucti heul' 21:17; Faeé' 20:9

ku' I'saya' tamnai eun lawng peue leukah' seunga' hpum' vok' seun' pe' ri na' a cawp' nyawk'. A tem' ri lah',

⁸ 'Peue aen' suk'seun' ce Ui' ri moeng ri na' palkoe, daecti hpum' ce na' a seungai Ui' nyawk'.

⁹ Faeé' ce Ui' na' a meuh ku' hk'o' hk'awng', ku' sangsawn' ce na' a meuh yawo ritroe ku' peue sangsawn' peue puri na'.[‡] ”

¹⁰ Hawc' ko', Yesu' Eun klawng peue cum heun' na' ce ing' ri ti. Eun lah', “Leuceng ri yawng ku' lah' Ui' na' reu',

¹¹ 'Ku' ing' lec hk'a'nae moeng peue na' a hkuin' yeuh peue un' seunga', daecti meuh a ku' pucti lih hk'ai' moeng peue na' yeuh a peue un' seunga'.”

¹² Hawc' ko', tapae' na' ce mhaing' Eun, “Yam peue Hparisae' na' mhawng' ce leukah' awn' a na', ce seungeueng' nyawk' na', yawng Mi a yeut aw?”

¹³ Eun top' a, “Kleum' ku' Kuiing' Ui' Cawo' ut' kuing' pang mao' na' un' jheum' Eun na', a kaw pun ri ruic ri tec ri gawm' res ri na' ku' kleum'. ¹⁴ Tae' ce reu'. Meuh ce peue teuk' va peue ngai' lec'. Peue ngai' lec' na' ka lawn teuk' va puri long hk'a' ko', kaw ka heul' hk'uic' nang hk'ok gawm' lal' peue ri.”

¹⁵ Petru' eun lah', “Hk'o' Mi lah' ye mhawng' vangdoh' ka leukah' leupong' aen' na.”

¹⁶ Yesu' Eun mhaing' ce, “Un' nang leuceng pun pe' a aw? ¹⁷ Ku' lec nang moeng peue na' lih a nang keuteul na'. Hawc' ko', a pucti heul' hk'ai' tu' peue na', un' nyu pe' a aw? ¹⁸ Daecti ku' lih neum moeng na' lih a neum hk'a'nae hpum' na'. Ceu nang aen' ce a yeuh peue un' seunga'.

¹⁹ Kamkuit rai, toh peue, len'cu, hkuit'nawng'tang', ra hk'eung, hkam' sa'hki' un' kue' un' meuh na' maeé' peusah' nyoe peue aen' ce a lih neum hpum' na'. ²⁰ Aen' ce a yeuh

[‡] 15:9 15:9 I'saya' 29:13

peue na' peue un' seunga'. Daecti un' hkuc' ti' ri hk'a ku' hk'a na' a hkuin' yeuh peue un' seunga'."

Hk'a'yum'ka beun' kuing' Hkanan

²¹ Yesu' Eun pucti heul' hk'ai' mawn' na', Eun heul' lec eung ka veng Tai'ra' mae' veng Si'don na'. ²² Beun' peue Hkanan ti peue ut' mawn' na' ka ing' klawng ri hk'o' hk'ang a ri Yesu' Eun, "Cawo', Kon' ai' eun Davit', hk'o' Mi tukyak ri ui'. Kon' beun' ui' na' pun eun ri hkam' hk'a' tukhka nyawk' na' kopti seuca' rai na' lec ka eun."

²³ Yesu' Eun hkuin' top' leukah' ka na' saec' ti moeng. Tapaé Eun na' ce ing' lah' a ri Heun, "Ra ri tec beun' awn' ka ing' reu', kopti hot' ka ri suksak e'."

²⁴ Yesu' Eun top' a, "Peucawo' cus' Eun Ui' lih pun kon'yung' rai' ce peue Isarela' na' palkoe."

²⁵ Beun' awn' ka ing' seukluin ri lah' a nanggal' Eun na', "Cawo', hk'o' Mi teum'kawm ui'."

²⁶ Yesu' Eun top' a, "Nyon ku' hk'a ce kon' nyom na' ri so' na' hpaw a ca' cawp'."

²⁷ Beun' na' ka lah', "Cawo', ku' lah' Mi na' cawp' ka yeut. Daecti so' na' pun a ri hk'a ku' hk'a peuc' hk'uic' hk'a' ruim hpuin' eun cawo' ri na'."

²⁸ Yesu' Eun top' a, "Beun', hk'a' yum' pa' na' keuting nyawk' ka, kah a meuh seun' ku' hk'o' pa' na' reu'." Yam awn' na, kon' beun' ka beun' awn' eun keulawn' cuin.

Yesu' bai' Eun peue peuyhat heun' peue cuin

²⁹ Yesu' Eun pucti heul' hk'ai' mawn' na', Eun hot' keunam ka glu Galilae' na'. Hawc' ko', Eun huk' pang gong na'. Eun mok' ri ka. ³⁰ Peue cum heun' na' ce ing' ri Heun. Ce va peue ti' cung lu, peue ngai' lec', peue nga' mae' peue peuyhat heun' peue na' ce ing' uin' ce mae' cung Eun na'. Eun ku bai' ce cuin. ³¹ Yam peue cum heun' na' pun ce ri nyu peue nga' na' tang cang leukah' ce, peue ti' cung lu

na' tang cang long ce hk'a', peue ngai' lec' na' tang cang nyu ce hk'a' ri na', ce am' nyawk'. Ce suk'seun' Peucawo' ce peue I'sarela' na' Eun.

Yesu' tuil' Eun peue hpawn'heng' ce hk'asom'

³² Yesu' Eun klawng tapae' ri na' ce ing' ri ti. Eun lah', "Tukyak Ui' ri peue aen' ce, ut' ce mae' Ui' pun a loe' seunyi hawc'. Ce hkuin' kue' ku' hk'a. Ui' hkuin' sum' kah ce ing' yam kaw'n' buih sum' som' ce na'. Na' ce cang kluit' hot' lang' hk'a' ri."

³³ Tapae' Eun na' ce lah', "Vang seungai htan' awn' na, e' ci' kaw pe sok ri tuil' peue peunaw' peunheun' na' ce hk'a hkawomun' hk'o' ce hk'a tawngnhaw'?"

³⁴ Yesu' Eun mhaing' ce, "Pe' ci' kue' hkawomun' a'neng meul'?"

Ce top' a, "Kue' e' hkawomun' a' res meul' mae' ka' aet' peunaeng'."

³⁵ Eun kah peue cum heun' na' ce mok' pang keute' na'.
³⁶ Hawc' ko', Eun rap ri ti hkawomun' a' res meul' na' mae' ka' na'. Yam hawc' mun' keuting Eun ri Peucawo' Eun na', Eun ves ri tuil' a ri tapae' ri na' ce. Ce ku gvah ri tuil' a ri peue cum heun' na' ce. ³⁷ Peue pun ri hk'a ri sak' ku peue. Hawc' ko', tapae' na' ce eo' ri seut' ku' hk'a lheu' na' a pun a' res teng' nuk. ³⁸ Peue hk'a ku' hk'a na' ce kue' hpawn'heng' peue. A hkuin' sawn' beun' mae' kon' nyom na' ce. ³⁹ Hawc' Yesu' kah Eun peue cum heun' na' ce keutah ing' na', Eun pawk reu na' heul' nang eung ka veng Magadan na'.

16

Peue Hparisae' na' hk'o' ce ri nawk het' keuting

¹ Peue Hparisae' na' maeé' peue Sadu'kae' na' ce ing' long ri nawk Yesu' Eun. Ce hk'o' Eun yeuh ri nawk het' keuting lih neum kuing' pang maó' na'.

² Yesu' Eun top' a, "Yam rot a hk'a'pul na', pé' lah', 'Kopti maó' na' seurak' ka, maó' na' a kaw hklel'hklawc'."

³ Yam rot a hk'a'ngup na', pé' lah', 'Kopti maó' na' seurak' duim'lawng ka, seunyaen' kaw a guil'. Pé' keue' ri maó' na' pé' cang tamnai ku' kaw a meuh na'. Daecti het' keuting ka sa'hkat' meuyam na' pé' hkuin' cang ti vangdoh' ka na' lih.

⁴ Peue cu aen' meuh ce cat peue rai maeé' ce meuh peue fuin Peucawo' Eun. Ce hot' ri sok het' keuting na', daecti a lawn un' meuh yawo het' keuting eun Yo'na' na' ko', het' keuting seubu na' un' tuil' a ri ce saec' ti ceu." Hawc' ko', Yesu' Eun gah' heul' hk'ai' ce.

Paeng ce peue Hparisae' maeé' peue Sadu'kae'

⁵ Yam tang ce glu na' heul' hk'a'teh' na', tapae' na' ce pil kaw ri pin' hkawomun' heul'. ⁶ Yesu' Eun lah' a ri ce, "Uin' sati ri ri paeng ce peue Hparisae' maeé' peue Sadu'kae' na' reu'."

⁷ Tapae' na' ce lah' a ri puri, "Kopti un' pin' e' hkawomun' heul' na', Eun lah' a yeuh keutit'."

⁸ Kopti Yesu' yawng Eun ku' lah' ce ri puri na', Eun mhaing' ce, "Peue kue' hk'a' yum' leng na' pé', a cí' meuh kop keunhaw' pé' vaeé' lah' puri mhawng' lawng un' kue' ri hkawomun' na'? ⁹ Un' nang leuceng pun pé' a aw? Lawng ka hkawomun' hpawn' meul' tuil' peue hpawn'heng' peue na' ce hk'a a hawc' ko' pé' cí' tang seut' pun ku' lheu' ka na' a'neng teng' na', ¹⁰ a'ko' lawng ka hkawomun' a' res meul' tuil' peue hpawn'heng' peue na' ce hk'a a hawc' ko' pé' cí' tang seut' pun ku' lheu' ka na' a'neng teng' na', un' laee pawn pé' a aw? ¹¹ A cí' meuh kop keunhaw' pé' vaeé' un' yawng un' lah' Uí' lawng ka hkawomun' na'? Daecti kah Uí' pé' uin' sati ri ri paeng ce peue Hparisae' na' maeé' peue

Sadu'kae' na'." ¹² Hawc' ko', ce kaw'n leuceng pun un' kah Eun ce uin' sati ri ri paeng seué' ri nang hkawomun' na', daecti Eun kah ce uin' sati ri ri leukah' sangsawn' ce peue Hparisae' na' maeé' peue Sadu'kae' na'.

Petru' rap eun ri ti Yesu' meuh Eun Hkrit

¹³ Yam heul' rot ce nang eung ka veng Kae'sari' Hpi'li'pi' na', Yesu' Eun mhaing' tapae' ri na' ce, "Peue ci' lah' Kon' ai' peue na' Eun meuh a'nhaw'?"

¹⁴ Ce top' a, "Ngon' lah' peue Mi meuh Yo'han cawo' tuil' hk'a' cum' na' eun, ngon' peue lah' Mi meuh E'li'ya eun, ngon' peue lah' Mi meuh Yeramí' eun, a'ko' peue suip leukah' Eun Peucawo' ti ri peue na' eun."

¹⁵ Yesu' Eun mhaing' ce, "Pe' ri sae, pe' ci' lah' Uí' meuh a'nhaw'?"

¹⁶ Sí'mon Petru' eun top' a, "Meuh Mi Hkrit. Mi meuh Kon' ai' Eun Peucawo' Cawo' a'yu im' na' Eun."

¹⁷ Yesu' Eun lah' a ri heun, "Sí'mon kon' me eun Yo'na' na' mi, kah mi pun mun' reu'. Kopti peue hpaw peue ca' tuh' mi nyu yawng lawng aen' na, daecti Kuing' Uí' ut' nang kuing' pang maó' na' tuh' Eun mi nyu yawng a. ¹⁸ Uí' lah' a ri mi, meuh mi Petru'*. Hk'a'pang seumu aen' a, Uí' kaw tang' muk kon' Hkrit ri na' ri ka. Leuva' ka kuing' yeum† na' a hkuin' kaw laee cang pe muk kon' Hkrit aen' na. ¹⁹ Kaw Uí' tuil' pakhkeucaé' ka kuing' pang maó' na' ri mi. Ku' un' kah mi yeuh pang bhen' keute' na', a ku kaw un' cang yeuh ri nang kuing' pang maó' na'. Ku' kah mi yeuh ri pang bhen' keute' na', a ku kaw cang yeuh ri nang kuing' pang maó' na' yeut." ²⁰ Hawc' ko', Yesu' Eun tuil' leukah' ri tapae' ri na' ce, un' kah ce lah' peue mhawng' meuh ri Hkrit na'.

* **16:18** 16:18 Vangdoh' ka na' a lah', seumu. † **16:18** 16:18 A'ko' keutong'nyarok

Yesu' lah' Eun ce mhawng' lawng kaw ri pun ri yeum

²¹ Tang' ri yam awn' na, Yesu' Eun tang' ri ris tapae' ri na' ce mhawng' lawng ku' kaw Eun kah ri huk' nang veng Yerú'salaem na' Eun kaw kah ri pun ri hkam' ku' tukhka na' heun' ceu ri nang kawt, ro' peue jhawp' rit na' mae' peue guil leukah' ritroe na' ce. Eun kaw pun ri hkam' toh peue ri. Loé seunyi ti seunyi na', Eun na' tang kuh' im'.

²² Petru' eun yat Yesu' Eun heul' hk'a' ti plak' na', eun is' Yesu' Eun, "Cawo', ca' kaw a duing meuh. Ku' yeuh keutit' na' hpaw a ca' kaw duing meuh ri Mi." ²³ Yesu' Eun hpawt' ri keue' lah' a ri Petru' eun, "Satan, hton' mi ing' hk'a' kui' reu'. Meuh mi seumu kaw yeuh Ui' seuduih ri htang' meul. Hpaw mi ca' kuit seun' ku' kuit Eun Peucawo' na', daecti kuit mi seun' peue ko'."

²⁴ Hawc' ko', Yesu' Eun lah' a ri tapae' ri na' ce, "A'nhaw' lawn sum' hot' Ui' ko', eun kaw pun ri tec alo ri, klawm' kleum' rawng'tawp' ri na'. Hawc' ko', hot' Ui' heul'.

²⁵ Kopti a'nhaw' lawn sum' a'yu pon ko', eun kaw pun ri sum' a'yu ri. Daecti a'nhaw' lawn sum' a'yu ri na' pun Ui' ko', eun kaw pun a'yu pon. ²⁶ Kopti saec' meuh a'nhaw', eun saec' na' pun ku' kue' pang bhen' keute' na' meuh is' ti gawm'euc' ka, daecti eun lawn sum' a'yu ri na' ko', a ci' kaw kue' mun' keunhaw' pun eun? A'ko', a'nhaw' ci' kaw cang ti keunhaw' a leuploh' civit ri na'? ²⁷ Kopti Kon' ai' peue na' kaw Eun lih hk'a'naee munhpung' Eun Kuing' ri na' mae' in'hpom ri na' ce tiduih'. Yam awn' na, Eun kaw tuil' lapsawng' na' ri peue hot' seun' ku' sawng' yeuh meun peue na'. ²⁸ Kaw Ui' lah' a ri pe' neumneum, peue cawng maen' na' ce ngon' nanggal' yam un' nang yeum ce na', ce kaw pun ri nyu Kon' ai' peue na' lih Eun nang kuing' ri na'."

17*Yesu' plin' Eun ruprang ri*

¹ Hawc' ka les seunyi na', Yesu' Eun va Petru', Yakop' mae' Yo'han awng' eun Yakop' na' ce huk' pang gong lhung' vang cang ut' koe ce ri ka na'. ² Yam awn' na, ruprang Eun na' a plin' ri nanggal' ce na'. Buh Eun na' a ceng' seun' ceng' ka seunyi na'. Hk'eung Eun na' a paing hk'ae'seun' ku' ceng' na'. ³ Mo'se eun mae' E'li'ya eun ka ku pucti nanggal' ce na', ka u Yesu' Eun.

⁴ Hawc' ko', Petru' eun lah' a ri Yesu' Eun, "Cawo', ut' e' maen' na' chak' ka. A lawn cawp' alo Mi ko', kaw u' pleng' tup' loe' lhang', pun Mi ti lhang', pun Mo'se ti lhang', pun E'li'ya ti lhang'."

⁵ Yam buih leukah' eun na', putum' ceng' na' a lih ghuim' ce. A kue' seng' laws' lih neum putum' na', "Peue aen' meuh Eun Kon' ai' leumeus' Ui' nyawk'. Eun hit' ri hpum' Ui' nyawk'. Leuceng ri ti leukah' Eun na' reu."

⁶ Yam tapae' na' pun ce ri mhawng' a na', ce lhat' nyawk'. Ce nghup' buh ri na' pang keute' na'. ⁷ Daecti Yesu' Eun ing' paic' ce. Eun lah', "Kuh' reu'. Pawlae lhat'." ⁸ Na' ce vuh ri keue' ko', ce hkuin' laee nyu peue seubu, ce nyu yawo Yesu' Eun koe.

⁹ Yam buih lih ce neum pang gong na', Yesu' Eun tuil' leukah' ri ce, "Pawlae lah' a'nhaw' mhawng' lawng ku' pun pe' ri nyu na' saec' ti peue rot ti yam Kon' ai' peue na' tang kuh' im' Eun hk'ai' vang yeum ri na'."

¹⁰ Tapae' na' ce mhaing' Eun, "A ci' meuh kop keunhaw' peue guil leukah' ritroe na' ce vae' lah' E'li'ya eun kaw kah ri lih nanggal'?"

¹¹ Yesu' Eun top' a, "Meuh ka neum, E'li'ya lih mhe' eun ri pleng' ku ceu na' gawm'euc' ka. ¹² Daecti Ui' lah' a ri pe', E'li'ya* lih eun hawc'. Peue na' peue un' yawng eun. Ce yeuh ku' sum' yeuh ri na' ri heun hawc'. Saec' meuh Kon' ai' peue na' Eun ku kaw pun ri hkam' hk'a' tukhka na' nang

* 17:12 17:12 Mahtae 11:14

dak tí ce ná yeut.” ¹³ Hawc’ kó, tapae’ ná ce leuceng pun buih lah’ Eun lawng eun Yo’han cawó tuil’ hk’a’ cum’ ná eun.

Yesu’ bai’ Eun kon’ nyom me seuca’ rai a lec eun

¹⁴ Yam lih rot ce ri peue cum heun’ ná ce ná, a kue’ peue ti peue eun ing’ seukluin ri nanggal’ Eun Yesu’ ná. ¹⁵ Eun lah’, “Cawó, hk’o’ Mi tukyak ri kon’ me uí’ ná eun. Kue’ eun peuyhat lom, eun tukhka nyawk’. Eun keucu hk’uic’ nang leuum’ hk’uic’ nang ngawl. ¹⁶ Uí’ va eun heul’ ri tapae’ Mi ná ce, daecti ce bai’ eun ce hkuin’ pun eun cuin.”

¹⁷ Yesu’ Eun top’ a, “Ah’, peue un’ kue’ hk’a’ yum’ cang lho’lhe’ cu aen’ pé, Uí’ cí kawn’ kaw ut’ ling’ maeé pé a’neng? Uí’ cí kawn’ kaw yeun’hkam pun pé a’neng? Va kon’ nyom ná eun ing’ maen’ reu’.” ¹⁸ Hawc’ kó, Yesu’ Eun is’ seuca’ rai ná. A ku pucti heul’ hk’ai’ kon’ nyom me awn’ eun. Kon’ nyom awn’ eun keulawn’ cuin.

¹⁹ Yam Yesu’ ut’ Eun ti peue koe ná, tapae’ ná ce ing’ mhaing’ Eun, “A cí meuh kop keunhaw’ ye vaeé un’ cang ra ri tec seuca’ awn’ a pun?”

²⁰ Eun top’ a, “Meuh a kopti kue’ pé hk’a’ yum’ leng ná. Uí’ lah’ a ri pé neumneum, pé lawn kue’ hk’a’ yum’ keuteul seumal ka hpapu ná kó, pé kaw cang lah’ a ri gong aen’ a, ‘Sat ri heul’ teh’ reu’.’ A ku kaw sat ri heul’ yeut. A hkuin’ kaw kue’ ku’ kaw pé yeuh un’ pun ná saec’ ti ceu.

²¹ Seuca’ yeuhki’ ná a lawn un’ meuh yawo eut’ ku’ hk’a’ ri hk’o’ mun’ ra ri tec a ná kó, ra ri tec un’ pun a.”†

Yesu’ tang lah’ Eun lawng kaw ri pun ri yeum ná

²² Yam ut’ ce tiduih’ nang kuing’ Galilae’ ná, Yesu’ Eun lah’ a ri tapae’ ri ná ce, “Kon’ aí peue ná kaw Eun pun ri

† 17:21 17:21 Nang htawm Seunga’ ná ngon’, un’ kue’ a nambat aet’ 21.

hkam' hk'a' fuin ap peue ri nang ti' peue. ²³ Peue na' toh Eun. Loé seunyi ti seunyi na', Eun na' tang kuh' im'."

Seue' hkawn' ka nya hk'o' mun' keuting

²⁴ Hawc' ka yam rot ce nang veng Kapeni'um na', peue cep' hkawn' ka nya hk'o' mun' keuting na' ce ing' mhaing' Petru' eun, "Seura' mi na' kaw Eun un' seue' hkawn' ka nya hk'o' mun' keuting[‡] na' aw?"

²⁵ Petru' eun top' a, "Kaw Eun seue' a yeut."

Yam Petru' ing' lec eun nang nya na', Yesu' Eun lah' a nanggal', "Si'mon, mi ci' kuit a yeuh sa'nhaw', hkun'haw' hkam' ka bhen' keute' na' ce ci' cep' hkawn' ri a'nhaw'? Cep' ce ri kon' ri na' ce aw? A'ko' cep' ce ri peue kuing' na' ce aw?"

²⁶ Petru' eun top' a, "Cep' a ri peue kuing' na' ce yeut."

Yesu' Eun lah' a ri heun, "Yeuh keutit' ko', kon' ce na' na' ce un' pun ri seue'. ²⁷ Daecti punta kaw e' un' cang yeuh ce seungeueng' ri ti na', mi na' heul' met' ka' nang glu na' reu'. Ka' la mi ri pun nanggal' na' vas mi nawk moeng ka na', mi na' nyu paec pun' htaep'. Mi na' ti ri heul' seue' a meuh hkawn' ka nya hk'o' mun' keuting na' pun mi maeé pun Ui' reu'."

18

A'nhaw' ci' keuting hk'ai' peue

¹ Yam awn' na, tapae' na' ce ing' mhaing' Yesu' Eun, "Nang kuing' pang mao' na' a'nhaw' ci' keuting hk'ai' peue?"

² Eun klawng kon' nyom aet' ti peue uin' eun cawng nang ngon' ce na'. ³ Eun lah', "Kaw Ui' lah' a ri pé neumneum, pé lawn un' leuploh' hpum' ri seun' kon'

[‡] 17:24 17:24 Hk'a'naee leukah' Helasa' na', hkawn' lah' ka na' a meuh pun' htaep'.

nyom aet' na' ce ko', pe' hkuin' kaw duing pun ri lec nang kuing' pang maó' na'. ⁴ Kop awn' na, a'nhaw' lawn yeuh hpum' ri onawn' seun' kon' nyom aet' aen' eun ko', eun kaw meuh nang keuting hk'ai' peue nang kuing' pang maó' na'.

⁵ A'nhaw' lawn rap ri ti kon' nyom seun' aen' eun hk'a'naee muis Ui' na' ko', eun ku rap ri ti Ui' yeut. ⁶ Daecti kon' nyom aet' yum' Ui' ti ri peue na' a'nhaw' lawn yeuh eun yeuh map' na' ko', mawt seumu maw' meul' keuting na' pit ngok eun na' ploé' eun lec vang rui' ka mha'seumut' na', a na' jaen chak'.

⁷ Kopti meuh a ceu nang aen' yeuh a peue na' peue yeuh map' na', bhen' keute' na' a pun ri hkam' hk'a' jha' na'. Daecti peue yeuh ceu nang aen' ce keut' meuh pucti lih na', kaw ce pun ri hkam' hk'a' jha' na'. ⁸ Ti' mi na', a'ko' cung mi na' a lawn yeuh mi yeuh map' na' ko', reng' ri tec a reu'. Mi saec' na' ti' cung lut' pun ri lec vang a'yu im' cot'cu na', a na' jaen chak' hk'ai' kue' mi ti' cung lal' plak' mi pun ri lec vang ngawl ha' cot'cu na'. ⁹ Ngai' mi na' a lawn yeuh mi yeuh map' na' ko', koc ri tec a reu'. Mi saec' na' kue' yawo ngai' ti' plak' pun ri lec vang a'yu im' cot'cu na' ko', a na' jaen chak' hk'ai' kue' mi ngai' lal' plak' mi pun ri nyon ri lec nang keutong'nyarok ngawl na'.

Leukah' leupong' lawng kon'yung' rai'

¹⁰ Uin' sati pe' meulamlam ri reu'. Pawlaee va ri un' nawpsang ri kon' nyom aet' aen' ce saec' ti peue. Kaw Ui' lah' a ri pe' neumneum, sawng' kue' ce ri is' in' hpom meun ut' nanggal' Eun A'kuiing' Cawo' ut' nang kuing' pang maó' na' Eun. In' hpom ce na' ce buih nom' nawk ce laleung.*

* **18:10** 18:10 Htawm Seungá' na' ngon', kue' a nambat aet' 11. A lah', "Kon' ai' peue na' lih Eun punta kaw Eun teum'kawm peue rai' heul' na' ce lawtpon."

¹² Pe' cí kuit a yeuh sa'nhaw'? Peue ti ri peue eun lawn kue' kon'jung' tipak' tu' daecti a na' rai' ti tu' ko', kaw eun un' hk'ah' ku' seudim'kul' seudim' tu' na' pang gong na', hawc' ko', eun na' un' eo' sok ri nyu ku' rai' heul' ti tu' na' aw? ¹³ Kaw Ui' lah' a ri pe' neumneum, eun lawn tang nyu kon'jung' rai' awn' a ko', eun na' ren'kawn nyawk' mae' ku' rai' heul' ti tu' na' lheu' ku' seudim'kul' seudim' tu' un' rai' na' ce. ¹⁴ Seun' awn' a ko', Kuiing' pe' Cawo' ut' nang kuing' pang mao' na' Eun ku un' sum' kah kon' nyom aet' aen' ce rai' heul' saec' ti peue.

Ec'awng' yeuh ku' kleuc' ri e'

¹⁵ Ec'awng' mi na' eun ti ri peue eun lawn yeuh ku' kleuc' na' ri mi ko', yam meuh a pa' ri koe na' mi na' heul' hkop eun mhawng' ku' kleuc' eun na' ri heun. Eun lawn leuceng ri ti leukah' mi na' ko', mi na' tang pun eun keutah meuh ec'awng' ri bae. ¹⁶ Daecti eun lawn un' leuceng ri ti leukah' mi na' ko', punta leukah' lah' ri ku moeng na' kaw a kue' nang meuh sa'hki' ka lal' loe' moeng na'†, va mi is' pu nang meuh sa'hki' ka ti peue, a'ko' lal' peue reu'. ¹⁷ Eun lawn kawn' un' leuceng leukah' ce na' ko', lah' muk kon' Hkrit na' ce mhawng' a reu'. Saec' meuh leukah' ce muk kon' Hkrit na' eun lawn kawn' un' leuceng a ko', yeuh ri sawn' eun meuh seun' peue un' meuh peue ceu Yu'da na' ce, a'ko' seun' meuh eun peue cep' hkawn' na' ce reu'.

¹⁸ Ui' lah' a ri pe' neumneum, ku' un' kah mi yeuh pang bhen' keute' na', a ku kaw un' cang yeuh ri nang kuing' pang mao' na'. Ku' kah mi yeuh pang bhen' keute' na', a ku kaw cang yeuh ri nang kuing' pang mao' na' yeut.

¹⁹ Ui' kaw tang lah' a ri pe' bae, pang bhen' keute' na' peue lal' peue na' pa' lawn hpum' hkaw puri hk'o' ku' ti ri ceu ko', Kuiing' ut' nang kuing' pang mao' na' Eun kaw

† 18:16 18:16 Sawn' leukah' mun' 19:15

yeuh ri tuil' seun' ku' hk'o' pa' na' ri pa' yeut. ²⁰ Kopti a saec' na' meuh tawngnhaw' na' peue lal' loe' peue na' ce lawn hk'om puri hk'a'naee muis Ui' na' ko', Ui' kaw ut' mae' ce mawn' yeut."

Leukah' leupong' lawng mhai' un' cang tukyak

²¹ Hawc' ko', Petru' eun ing' mhaing' Yesu' Eun, "Cawo', ec'awng' ui' na' ce lawn yeuh map' na' ri ui' ti pok hawc' ti pok ko', ui' ci' na' kah ri plo'e' map' ce na' a'neng pok? Rot a' res pok aw?"

²² Yesu' Eun top' a, "Ui' lah' a ri pe' a hkuin' kaw nang meuh a' res pok koe, daecti a' res pok a' reskul' pok.

²³ Kop awn' na, kuing' pang mao' na' seun' a hkun'haw'hkam' ti peue na' sum' sawn' eun ca'lang' ri na' hawc' euc' ri mhai' ri na' ce. ²⁴ Yam buih tang' eun ri sawn' ca'lang' na', peue va mhai' kue' ku' ma kul' lan htaep'† ri heun na' eun ing' ri heun. ²⁵ Peue awn' kopti sai' un' laee pun eun ku' ma ri na', hkun'haw'hkam' na' eun tuil' leukah' ri kah mhai' ri na' eun heul' ti ri paing' tu' eun hkawn' a bae' beun' kon' eun mae' hk'eung vahtu' ku' kue' eun na' ce gawm'euc' sai' ku' ma eun na' ri ka.

²⁶ Mhai' awn' eun seukluin ri hk'o'hk'ang a nanggal' eun hkun'haw'hkam' na', 'Cawo', hk'o' mi yeunyang' a ri ui'. Kaw ui' sai' ku' ma ri na' gawm'euc' ka yeut.'

²⁷ Hkun'haw'hkam' eun tukyak ri heun. Eun a' nuyat ku' ma eun na' hawc' ri heun. Hawc' ko', eun plo'e' eun.

²⁸ Daecti yam mhai' awn' puc eun ri heul' hk'ai' mawn' na' eun pun ri nyu mhai' pu eun ku' seubu ku' kue' ku' ma tipak' htaep' ri ti na' eun na', eun yat ri met' ri rui' rah' ngok eun na' eun lah', 'Sai' ku' ma mi ri ui' na' vae'vae' reu.'

† 18:24 18:24 A'ko' leskul'lan denarian, ti denarian na' a meuh ngos reng na' ti seunyi.

²⁹ Mhai' pu eun awn' eun seukluin ri hk'o'hk'ang a ri heun, 'Hk'o' mi yeunyang' a ri ui'. Kaw ui' sai' ku'ma ri na' gawm'euc' ka yeut.'

³⁰ Daecti eun hkuin' yawm' ri ri heun. Eun ti ri heul' seue' hkawn' eun nang htawng' na' rot ti yam sai' eun ku'ma ri na' gawm'euc' ka na'. ³¹ Yam mhai' ku' seubu na' nyu ce ku' yeuh eun na', ce nyu a chat nyawk'. Ce va puri heul' ri hkun'haw'hkam' eun. Ce ris eun mhawng' lawng ku' mhai' awn' yeuh eun na' ce gawm'euc' ka.

³² Hawc' ko', hkun'haw'hkam' na' eun klawng mhai' awn' eun ing' ri ti. Eun lah' a ri heun, 'Mhai' rai na' mi, kopti hk'o'hk'ang mi a ri ui' na', ui' a'nyat ku'ma mi na' hawc' gawm'euc' ka ri mi. ³³ Seun' tukyak ui' ri mi na', kaw mi un' htuk' ri tukyak ri mhai' pu mi na' eun yeut aw?' ³⁴ Hkun'haw'hkam' na' eun seungeueng' nyawk'. Eun ap peue awn' eun ri ro' ka htawng' na' eun, kah eun keunhap' eun rot ti sai' eun ku'ma ri na' hawc' euc' ka.

³⁵ Seun' awn' na, pe' ri ku peue pe' lawn un' ploé' map' ce ec'awng' ri na' ri hpum' ri na' ko', Kuing' ui' ut' nang kuing' pang mao' na' Eun ku kaw yeuhko' ri pe' yeut."

19

Hk'a' tec puri

¹ Yam Yesu' hawc' Eun lah' ri leukah' aen' ce na', Eun pucti heul' hk'ai' kuing' Galilae' na'. Eun heul' rot kuing' Yu'da hk'a' teh' ka klong' Yaw'dan na'. ² Peue cum heun' na' ce hot' Eun heul'. Eun bai' ce cuin teh'.

³ Peue Hparisae' na' ce ngon' ce ing' long ri nawk Eun. Ce mhaing' Eun, "A saec' na' meuh lawng keunhaw' na' un' lah', me tec beun' ri na' kleuc' ka ritroe na' aw?""*

⁴ Yesu' Eun top' a, "Un' duing lip pe' a aw, 'Tang' neum yam bhen' keute' na' hpanpleng' a ri na', Peucawo'

* 19:3 19:3 Yamla 1:27

hpanpleng' Eun me maeé' beun.' ⁵ Eun lah', 'Kop awn' na, me na' eun kaw gah' hk'ai' makuiing' ri ka. Eun heul' kui' ri maeé' beun' ri na' eun. Ka kaw meuh nham' keune keuhti.'† ⁶ Kop awn' na ka hkuin' kaw laee meuh lal' peue, daecti ka meuh yawo ti peue. Kop awn' na, ku' Peucawo' kui' Eun ka meuh tiduih' hawc' na', a'nhaw' pawlaee yah ka hk'ai' puri."

⁷ Ce tang mhaing' Eun, "Yeuh keutit' ko', a ci' meuh kop keunhaw' Mo'se eun vaeé' tuil' leukah' lah', 'Me na' eun lawn tem' ri tuil' licmat tec puri ko', cang tec eun beun' ri yeut.' "

⁸ Yesu' Eun lah' a ri ce, "Mo'se tuil' eun ahkvang kah pé' cang tec beun' ri na' a meuh kopti hpum' cen' pé' na'. Daecti yamla ka na' hpaw a ca' yeuh keutit'. ⁹ Uí' lah' a ri pé', 'Pon hk'ai' meuh a kopti len'cu na' a'nhaw' lawn tec beun' ri na' eun heul' ti ri is' beun' seubu ko', me awn' meuh eun peue len'cu.' "

¹⁰ Tapaé' na' ce lah', "Ti ri is' beun' ti ri is' me na' a lawn kaw yeuh keutit' ko', un' mak' ti yawo na' a jaen chak'."

¹¹ Yesu' Eun top' a ri ce, "Leukah' sangsawn' aen' a lawn un' meuh yawo ku' Peucawo' yeuh Eun peue yeuh pun a na' ko', hpaw peue ca' kaw pe hot' ri yeuh pun a ku peue. ¹² Kopti peue ngon' na' meuh ce peue tawn' ri tang' neum yam keut' ri na'. Ngon' peue meuh peue tawn' ri kopti peue ngon' na' yeuh peue a. Ngon' peue meuh peue tang' nha' ri un' sang' nya‡ ri kopti pun kuing' pang maó' na'. A'nhaw' lawn kaw pe hot' ri yeuh ceu nang aen' a pun ko', yeuh a reu'."

Yesu' nap Eun mun' ri kon' nyom aet'

† 19:5 19:5 Yamla 2:24 ‡ 19:12 19:12 A'ko' yeuh meun ri meuh peue tawn'

¹³ Hawc' ko', peue va kon' nyom aet' na' ce ing' tuil' Yesu' Eun tang' ti' ri hk'o' mun' pun ce. Daecti tapae' na' ce is' ku' va kon' nyom ing' na' ce.

¹⁴ Daecti Yesu' Eun lah', "Tae' kon' nyom aet' na' ce ing' ri Ui' reu', pawlaee ham' ce. Kopti kuing' pang ma' na' meuh a kuing' ce peue ku' seun' kon' nyom aet' aen' ce."

¹⁵ Hawc' Yesu' tang' Eun ti' ri hk'a' pang ce na', Eun pucti heul' hk'ai' mawn' na'.

Nang nhum' meuneum

¹⁶ Peue ti peue ing' mhaing' eun Yesu' Eun, "Seura', ui' ci' kaw kah ri yeuh ku' chak' ceu nangnhaw' na' ui' na' pun ci' tip a'yu tip co'cu na'?"

¹⁷ Yesu' Eun top' a ri heun, "A ci' meuh kop keunhaw' mi vae' mhaing' ui' ri lawng ku' chak' na'? Cawo' chak' na' kue' a ti peue yawo. Mi lawn sum' pun ci' tip a'yu tip co'cu na' ko', leuceng ri ti leukah' ritroe tuil' Eun na' reu'."

¹⁸ Eun mhaing' Yesu' Eun, "Leukah' ritroe nangnhaw' na'?"

Yesu' Eun lah', " 'Pawlaee toh peue, pawlaee len'cu, pawlaee rabaw' peue, pawlaee hkam' sa'hki' un' kue' un' meuh na', ¹⁹ hkopyawm' yumyam' ri makuiing' mi ka'[§] mae' 'leumeus' peue ut' keunam caona' mi na' ce seun' leumeus' mi tu' ri na' yeut reu'.* "

²⁰ Nang nhum' na' eun lah', "Aen' ce gawm'euc' leuceng ui' ri yeuh a hawc'. Ui' ci' kaw' cut ri keunhaw'?"

²¹ Yesu' Eun top' a, "Mi lawn sum' meuh peue chak' htonnuk ko', heul' paing' ku' kue' mi na' gawm'euc' ka, gvah ri tuil' peue hk'o'tukyak na' ce is' a reu'. Mi kaw kue' sin' ngos heun' nang kuing' pang ma' na'. Hawc' ko', mi na' ing' hot' Ui' reu'."

§ 19:19 19:19 Pucti heul' 20:12-16; Saw'n leukah' mun' 5:16-20 * 19:19 19:19 Fae' 19:18

²² Yam nang nhum' na' pun eun ri mhawng' leukah' aen' a na', eun kuit nyhap' mhong' mhill' ing'. Kopti meuh eun peue meuneum nyawk' na'.

²³ Yesu' Eun lah' a ri tapae' ri na' ce, "Ui' lah' a ri pe' neumneum, 'Peue meuneum na' kaw ce lec nang kuing' pang ma' na' a nyhap' nyawk'." ²⁴ Kaw Ui' lah' a ri pe' bae, 'Kalaok' ti tu' na' kaw a lec muis peunye na' kaw' sam' ran a hk'ai' peue meuneum na' kaw eun lec nang kuing' Eun Peucawo' na'."

²⁵ Yam tapae' na' pun ce ri mhawng' leukah' awn' a na', ce am' nyawk'. Ce mhaing' Eun, "Yeuh keutit' ko', a'nhaw' ci' kaw cang pun hk'a' htut lawtpon na'?"

²⁶ Yesu' Eun keue' ri ce. Eun lah', "Pun peue na', aen' hpaw a ca' cang meuh. Daecti pun Peucawo' Eun na', cang meuh a ku ceu ka."

²⁷ Hawc' ko' Petru' eun lah', "Tec ye ku ceu gawm'euc' na', ye hot' Mi. Ye ci' kaw pun keunhaw'?"

²⁸ Yesu' Eun top' a, "Kaw Ui' lah' a ri pe' neumneum, yam bhen' keute' na' tang mhe' hk'u' a ri yam Kon' ai' peue na' mok' Eun pang tenceo' kue' munhpung' ri na', peue hot' Ui' na' pe' kaw pun ri mok' pang ten kul'leual' na' taws' a mu ri peue I'sarela' kul'leual' ceu na' ce. ²⁹ A'nhaw' lawn tecla nya ri, a'ko' ec'awng' ri, a'ko' makuiing' ri, a'ko' kon' hk'i ri, a'ko' mal' na ri kopti pun muis Ui' na' ko', eun kaw pun nammaet ka tipak' pun mae'e eun ku kaw pun cit' tip a'yu tip cot' cu ri. ³⁰ Daecti peue ut' nanggal' heun' peue na' kaw ce meuh peue ut' hk'a' to'. Peue ut' hk'a' to' heun' peue na' kaw ce meuh peue ut' nanggal'.

20

Leukah' leupong' lawng nang yeuh kan' nang val pli' bui

¹ Kuing' pang ma' na' seun' a cawo' val ti peue puc eun ri heul' peunngup cawo heul' sok peue kaw yeuh kan' nang

val plí' bui ri ná'. ² Yam hawc' eun sa'lit ri kaw tuil' seunyi ce ná' seunyi ka ti htaep' ná', eun kah ce heul' yeuh kan' nang val plí' bui ri ná'.

³ Yam meuh a hk'ao ri seudim' nali peunngup ná', eun pucti heul' nyu peue yeng ri cawng hk'o'hk'awng' nang keulas ná'. ⁴ Eun lah' a ri ce, 'Pawh, heul' yeuh kan' nang val plí' bui uí' ná'. Kaw uí' tuil' seunyi pé' ná' kuing'hpaw yeut.' ⁵ Kop awn' na, ce ku heul' yeut.

Yam meuh a maeé' som' nyi ná' maeé' yam meuh a hk'ao ri loe' nali hk'a'pul ná', cawo' val ná' eun tang pucti heul' yeuh seun' awn' a baeé' yeut. ⁶ Yam meuh a hk'ao ri hpawn' nali hk'a'pul ná', eun pucti heul' nyu peue tit' cawng ce ri cu ri mawn'. Eun mhaing' ce, 'A ci' yeuh keunhaw' pé' vaeé' cawng hk'o'hk'awng' mawn' gawm' seunyi?'

⁷ Ce top' a, 'Kopti a'nhaw' un' cang' a ye saec' ti peue ná':

Eun lah' a ri ce, 'Pawh, heul' yeuh kan' nang val plí' bui uí' ná'.

⁸ Yam rot a hk'a'pul ná', cawo' val ná' eun klawng ro' ce ku' yeuh kan' ná' eun ing' ri ti. Eun lah' a ri heun, 'Klawng peue yeuh kan' ná' ce ing' ti seunyi ri ná' tang' ri ku' heul' hot' ná' ce rot ti ku' heul' nanggal' ná' ce.'

⁹ Ku' kaw'n tang' ri yeuh kan' hpawn' nali ná' ce pun peue ri ti htaep'. ¹⁰ Kop awn' na, ku' tang' ri yeuh kan' nanggal' ná' ce hteum' ri kaw pun heun' hk'ai' ku' seubu ná' ce. Daecti ce pun peue ri ti htaep' seun' puri euc'. ¹¹ Yam pun ce ri ti seunyi ri ná' hawc' ná', ce buicbuic lah' cawo' val ná' eun, ¹² 'Ku' heul' yeuh kan' hot' ná' gup pun ce ri yeuh kan' ti nali yawo, ce pun seunyi ri ná' keuteul ku' hawk' ri ri kuc' sae'caeé' yeuh kan' gawm' seunyi ná' e'.

¹³ Daecti cawo' val ná' eun lah' a ri peue hk'a'naee ce ná' eun ti peue, 'A'mawo, hpaw uí' ca' to' ri chí'lai ri hk'a pé'. Lah' deut uí' a kaw meuh seunyi ti htaep', un' meuh

ka aw? ¹⁴ Ti seunyi mi na' heul' reu'. Lak' sahpaw' ui' ri tuil' seunyi ce ku' heul' yeuh kan' hot' na' keuteul is' mi na' yeut. ¹⁵ Kaw ui' lo' leumuil ri na' hot' ku' sum' yeuh ri na', kaw a un' cang aw? A ci' meuh kop keunhaw', mi vae' hko'e mang' hk'a' hpum' vah ui' na'?

¹⁶ Kop awn' na, peue ut' hk'a' to' na' kaw ce meuh peue ut' nanggal'. Peue ut' nanggal' na' kaw ce meuh peue ut' hk'a' to'."

Yesu' tang lah' Eun lawng kaw ri pun ri yeum na' bae

¹⁷ Yam Yesu' buih huk' Eun nang veng Yeru'salaem na', Eun va yawo tapae' kul'leual' peue ri na' ce gveh' hk'a' na koe. Eun lah' a ri ce, ¹⁸ "Buih huk' e' nang veng Yeru'salaem. Kon' ai' peue na' kaw Eun pun ri hkam' hk'a' fuin ap peue ri nang dak ti' ce ro' peue jhawp' rit na' mae' peue guil leukah' ritroe na' ce. Ce kaw taws' a' mu tut yeum na' ri Heun. ¹⁹ Hawc' ko', ce kaw ap Eun ri peue un' meuh peue ceu Yu'da na' ce. Peue awn' ce kaw lah' ku' pleh ku' jaing, ta'faet' Eun. Hawc' ko', ce kaw tawk' Eun yeum pang kleum' rawng'tawp' na'. Yam meuh a loe' seunyi ka na', Eun na' tang kuh' im'."

Leukah' hk'o' ka a'ma ti peue

²⁰ Hawc' ko', beun' eun Yebedae' na' ka va kon' me ri lal' peue na' ka ing' ri Yesu' Eun. Ma na' ka seukluin ri hk'o' ku' ti ri ceu ri Heun.

²¹ Yesu' Eun mhaing' ka, "Pa' ci' sum' hk'o' keunhaw'?"

Ka top' a, "Hk'o' Mi tuil' leukah' ri kah kon' me ui' lal' peue aen' ka mok' hk'a' a'tawm' Mi ti peue mae' hk'a' a've' Mi ti peue nang kuing' Mi na'."

²² Daecti Yesu' Eun lah' a ri kon' lal' peue na' ka, "Hpaw pa' ca' yawng buih hk'o' ri keunhaw'. Kawk' kaw Ui' nyui na' lak' kaw pa' cang nyui a aw?"

Ka top' a, "Kaw ya cang nyui a yeut."

²³ Yesu' Eun lah' a ri ka, "Kaw pa' kah ri nyui kaw' Ui' na' neumneum yeut. Daecti ku' kaw tuil' a'nhaw' mok' hk'a' a'tawm' hk'a' a've' Ui' na', a hkuin' meuh Ui' ri. Daecti vang mok' awn' meuh a is' ce peue ku' Kuing' Ui' rangraen Eun ri uin' pun ce na'."

²⁴ Yam tapae' seubu kul' peue na' mhawng' ce lawng aen' a na', ce seungeueng' ri awng'ec' lal' peue awn' ka.

²⁵ Yesu' Eun klawng tapae' na' ce ing' cu ri tiduih'. Eun lah', "Peue pun an'nya meuh cawo' u' peung peue na' meuh eun cawo' hk'a' pang ce, cawo' hk'a' ruim eun na' ce ku meuh cawo' hk'a' pang ce yeut, pe' ku yawng a. ²⁶ Daecti pun pe' ri na' a hkuin' yeuh keuti'. A lak' meuh ri is' ti hk'a'. A'nhaw' lawn sum' meuh peue keuting ri pe' ko', eun kaw pun ri yeuh mhai' pe'. ²⁷ A'nhaw' lawn sum' meuh peue nambat keuthi ko', eun kaw pun ri meuh mhai' pe' na'.

²⁸ A seun' Kon' ai' peue na' hpaw Eun ca' lih pun kaw peue yeuh mhai' Eun, daecti lih Eun pun kaw Eun yeuh mhai' peue mae' kaw Eun tuil' a'yu ri na' meuh ngos ka hk'a' htut lawtpon pun peue heun' na' peue."

Yesu' bai' Eun peue ngai' lec' lal' peue cuin

²⁹ Yam Yesu' Eun mae' tapae' na' kaw ce buih pucti heul' hk'ai' veng Yeri'hko' na', peue cum heun' na' ce hot' ce heul'. ³⁰ Peue ngai' lec' lal' peue na' ka mok' keunam hk'a' na'. Yam mhawng' ka Yesu' buih hpai Eun keunam ri na' heul' na', ka ta'ul' ri lah', "Cawo', Kon' ai' Davit', hk'o' Mi tuckyak ri ya."

* **20:22** 20:22 Vangdoh' ka "kaw' kaw Ui' nyui na'" a meuh "pun ri hkam' ku' tuhkan' na'".

³¹ Peue cum heun' na' ce saec' is' ka, kah ka dit' ti. Daecti ka gawm klawng ri lah' laws' a, "Cawo', Kon' ai' Davit', hk'o' Mi tuckyak ri ya."

³² Yesu' Eun kuit'. Eun klawng ka ing' ri ti. Eun mhaing' ka, "Pa' ci' sum' kah Ui' yeuh keunhaw' ri ti?"

³³ Ka lah', "Cawo', sum' nyu ya hk'a' ri."

³⁴ Yesu' Eun tuckyak ri ka. Eun paic' ngai' ka na', ka keulawn' cang nyu hk'a' ri. Ka hot' Yesu' Eun heul'.

21

Cawo' pe lec Eun veng Yeru'salaem

¹ Yam huk' rot ce keunam veng Yeru'salaem nang yung' Bethpage' pang gong Sanlon na', Yesu' Eun cus' tapae' lal' peue na' ka heul'. ² Eun lah' a ri ka, "Heul' ri yung' ut' nanggal' teh' a reu'. Pa' kaw keulawn' pun ri nyu rawngla aet' na' mawt a ri mae' ma ri na' tiduih' teh'. Pa' na' kah' ri teuk' a heul' maen'. ³ Peue ti ri peue eun lawn na' lhon' ri mhaing' pa' ri ku' ti ri ceu ko', pa' na' lah', 'Cawo' lo' Eun a.' Peue awn' eun kaw keulawn' kah' ri tuil' a ri pa'."

⁴ Aen' meuh a neumneum hot' seun' ku' peue suip leukah' Eun Peucawo' na' lah' eun ri uin' na'. A lah', ⁵ "Lah' a ri peue veng Yi'on na' ce yeuh keutit' reu',

'Keue' reu', Hkun'haw' hkam' pe' na' buih ing' Eun. Eun hpum' onawn', Eun pawk rawngla na',

Eun pawk rawngla aet' na' ing'.' **

⁶ Tapae' lal' peue na' ka ku heul' hot' ri yeuh seun' ku' Yesu' tuil' Eun leukah' ri na'. ⁷ Ka teuk' rawngla ma na' mae' kon' ka na' ing'. Ka lhup' hk'o dal' ri na' pang kui' ka na'. Yesu' Eun pawk a. ⁸ Peue cum heun' na' ce ti ri tawm hk'o ri na' nang gon' hk'a' na'. Ngon' ce taws' yuim na', ce tawm a nang gon' hk'a' na'. ⁹ Peue cum heun' heul'

* 21:5 21:5 Yahkari' 9:9

nanggal' maeé' peue heul' hk'a'kui' Eun na' ce klawng ri lah',

“Hosana,† ri Kon' ai' eun Davit' na' Eun.

Nap mun' ri Cawo' ing' hk'a'ruim muis Eun Peucawo' na' Eun.‡

Hosana, ri ku' lhung' hk'ai' peue na' Eun.”

¹⁰ Yam Yesu' huk' lec' Eun nang veng Yeru'salaem na', peue veng na' ce tuin'tung seutu in seutan. Ce mhaing', “Hkawn' Eun ci' meuh a'nhaw'?”

¹¹ Peue cum heun' na' ce top' a, “Hkawn' meuh a Yesu' Eun. Eun meuh peue suip leukah' Eun Peucawo' ing' neum veng Nasaraet' kuing' Galilae' na'.”

Yesu' yeuh Eun nya hk'o' mun' keuting na' seunga' chak'

¹² Yesu' Eun ing' lec' nang kang' hkung' ka nya hk'o' mun' keuting na'. Eun ra ri tec peue paing' hk'eung maeé' peue leuvaee hk'eung mawn' na' ce pucti heul'. Eun seukleup' hpuin' ce peue leuploh' leumuil na' maeé' pang' mok' ce peue paing' gui' na'. ¹³ Eun lah' a ri ce, “Kue' a leukah' tem' ri yeuhki, ‘Nya Ui' na' meuh a vang hk'o' mun’§, daecti pé' yeuh a meuh vang hk'on'ro con’.”*

¹⁴ Peue ngai' lec' maeé' peue ti' cung lu na' ce ing' ri Heun nang kang' hkung' ka nya hk'o' mun' keuting na'. Eun ku bai' ce cuin. ¹⁵ Daecti yam peue jhawp' rit keuting maeé' peue guil leukah' ritroe na' pun ce ri nyu ku' hk'o'am' yeuh Eun na' ce maeé' pun ce ri mhawng' kon' nyom na' klawng ce ri lah', “Hosana ri Kon' ai' eun Davit'

† 21:9 21:9 Hosana na' meuh leukah' Hebrae'. Vangdoh' ka na' a meuh “htut”, a keut' ri meuh leukah' suk'seun', a seun' 21:15. ‡ 21:9 21:9 Suk'seun' 118:26 § 21:13 21:13 Ísaya' 56:7 * 21:13 21:13 Yerami' 7:11

na' eun", nang kang' hkung' ka nya hk'o' mun' keuting na', ce seungeueng' nyawk'.

¹⁶ Ce mhaing' Yesu' Eun, "Un' mhawng' Mi ku' kon' nyom aen' klawng ce ri lah' na' aw?"

Yesu' Eun top' a, "Mhawng' Ui' a yeut. Ku' tem' ri yeuhki' na' un' duing lip pe' a aw? A lah',

'Yeuh Mi leukah' suk'seun' na'

pucti lih hk'ai' moeng ce kon' nyom mae' o'ngak na' ce hawc'."†

¹⁷ Hawc' ko', Eun gah' hk'ai' ce pucti heul' hk'ai' veng na'. Eun heul' keului' ri nang yung' Betani' na'.

Yesu' Jha' Eun kleum' pli' keutuic

¹⁸ Peunngup cawo yam ceng' ka na', yam Yesu' tang buih huk' Eun nang veng na' bae na', Eun sum' som'.

¹⁹ Yam pun Eun ri nyu kleum' pli' keutuic ut' keunam hk'a' ti kleum' na', Eun heul' ri keunam ka na'. Daecti Eun nyu pal lha' ka a un' kue' pli' na', Eun lah' a ri kleum' pli' keutuic na', "Na' mi pawlae pli' bae." Kleum' pli' keutuic awn' a keulawn' fit' hk'oh' hk'oeng' heul'.

²⁰ Yam tapae' na' pun ce ri nyu yeuh a keutit' na', ce am'. Ce lah', "A ci' cang meuh yeuh sa'nhaw' kleum' pli' keutuic aen' a vae' keulawn' fit' hk'oh' hk'oeng' heul'?"

²¹ Yesu' Eun top' a, "Kaw Ui' lah' a ri pe' neumneum, pe' lawn kue' hk'a' yum' un' kangkae ko', gup kaw pe' cang yeuh yawo ku' meuh ri kleum' pli' keutuic ti lhem' aen' a koe na' a hkuin' meuh, daecti kaw pe' cang tuil' leukah' ri gong aen' na, 'Sat ri heul' hk'uic' lec nang mha'seumut' na' reu", a ku na' meuh yeuh keutit' yeut. ²² Hk'a'nae hk'a' yum' pe' na' pe' lawn hk'o' mun' hk'o' ko', kaw pe' pun ku' hk'o' ri na' gawm'euc' ka."

Mhaing' peue lawng Yesu' pun Eun ti'ca

† 21:16 21:16 Suk'seun' 8:2

²³ Yesú lec Eun nang kang' hkung' ka nya hk'o' mun' keuting ná. Yam buih sangsawn' Eun ná, ro' peue jhawp' rit, peue guil leukah' ritroe maeé nang kawt ná ce ing' mhaing' Eun, "Mi yeuh ceu nang aen' ce, Mi cí cu tíca keunhaw' yeuh a? A'nhaw' cí tuil' tíca aen' a ri Mi?"

²⁴ Yesú Eun top' a, "Uí ku kaw mhaing' pé ti moeng yeut. Pé lawn lah' Uí mhawng' a ko', Uí ná kawn' lah' pé mhawng' Uí cí pun tíca aen' a ri a'nhaw' Uí yeuh ceu nang aen' ce. ²⁵ A'nhaw' cí tuil' tíca tuil' hk'a' cum' ná ri Yo'han eun, neum kuing' pang maó aw, a'ko' neum peue aw?"

Ce sa'lit puri lah', "E' lawn top' lih a neum kuing' pang maó ko', Eun kaw tang cang mhaing' e', 'A cí yeuh keunhaw' pé vaeé un' yum' eun?' ²⁶ Daecti e' lawn top' lih a neum peue ko', e' ku lhat' ri peue cum heun' ná ce. Kopti yum' ce Yo'han meuh eun peue suip leukah' Eun Peucawó ná."

²⁷ Kop awn' na, ce top' a ri Heun, "Un' yawng ye a."

Yesú Eun lah' a ri ce, "Yeuh keutit' ko', Uí ku hkuin' kaw lah' pé mhawng' cu Uí tíca keunhaw' Uí yeuh ceu nang aen' ce yeut.

Leukah' leupong' lawng kon' me lal' peue

²⁸ Daecti, pé cí kuit a yeuh sa'nhaw'? Peue ti peue kue' eun kon' me lal' peue. Eun heul' lah' a ri nang ec' ná eun, 'Kon', heul' yeuh kan' nang val plí' bui ná seunyaen' aw?"

²⁹ Kon' ná eun lah', 'Uih', hpaw uí' ca' kaw heul'. Daecti hawc' ka ná eun plin' hpum' ri ná, eun heul'.

³⁰ Hawc' ko', kuiing' ná eun tang heul' lah' a ri nang awng' ná eun seun' awn' a yeut. Nang awng' ná eun top' a, 'Kaw uí' heul' yeut. Daecti eun hkuin' heul'.

³¹ Kon' me lal' peue awn' ka nangnhaw' eun cí hot' ri yeuh alo eun kuiing' ri ná?"

Ce top' a, "Meuh a nang ec' ná eun."

Yesu' Eun lah', "Ui' lah' a ri pe' neumneum, peue cep' hkawn' mae' beun' paing' tu' ri na' kaw ce va puri heul' lec nang kuing' Eun Peucawo' na' nanggal' pe'. ³² Kopti Yo'han lih seuji eun pe' nawk hk'a' leupaws seumeu' na', pe' hkuin' yum' eun, daecti peue cep' hkawn' mae' beun' paing' tu' ri na' ce yum' eun. Pe' saec' na' pun ri nyu ceu nang aen' ce hawc' ko', pe' hkuin' taws' hpum' fuin map' ri yum' eun.

Leukah' leupong' lawng sang' hpa' val pli' bui

³³ Leuceng leukah' leupong' seubu na', cawo' val ti peue na' sang' eun val pli' bui. Eun ru a rop. Eun kung' a is' keutui' vang bet' pli' bui. Eun pleng' a is' tup' lhung' vang ko'. Hawc' ko', eun tuil' peue sang' val na' ce sang' hpa' a. Hawc' ko', eun heul' nang kuing' tawk seubu. ³⁴ Yam rot a yam poc' pli' bui na', punta kaw eun ti pli' ku' kaw eun htuk' ri pun na', eun kah mhai' ri na' ce heul' ri peue sang' hpa' val na' ce.

³⁵ Daecti peue sang' hpa' val na' ce mheut' mhai' awn' ce. Ku' ti peue na' eun ce peum' eun, ku' ti peue na' eun ce toh eun, ku' seubu ti peue na' eun ce dhim' eun yeum ri meul' seumu na'. ³⁶ Cawo' val na' eun tang kah mhai' seubu heun' hk'ai' ku' nanggal' na' ce heul' ri ce bae. Daecti peue sang' hpa' val na' ce ku yeuh ce seun' ku' nanggal' na' ce yeut. ³⁷ Pok tisu' ka na', eun kah kon' me ri na' eun heul' ri ce. Eun lah', 'Na' ce chak' ri hkopyawm' ri kon' me ui' na' eun.'

³⁸ Daecti yam peue sang' hpa' val na' nyu ce kon' me eun cawo' val na' eun na', ce sa'lit puri lah', 'Peue aen' meuh eun peue pun sin'. Pawh, e' toh eun. E' na' rim' ri ti sin' eun na'. ³⁹ Kop awn' na, ce mheut' ri jong' ri tec eun hk'a' nok ka val na'. Hawc' ko', ce toh eun yeum.

⁴⁰ Kop awn' na, yam cawo' val na' ing' eun nang val na', eun ci' na' kaw yeuh sa'nhaw' ri peue sang' hpa' val awn' ce?"

⁴¹ Ce top' a, "Kaw eun yeuh cae' ri peue rai awn' ce. Hawc' ko', yam rot a yam ti ku' seumal na' nang seubu ku' kaw tuil' pun pun eun cawo' val na' ce, eun kaw tuil' ce sang' hpa' val awn' na."

⁴² Yesu' Eun mhaing' ce, "Un' duing lip pe' htawm Seunga' ton aen' a aw? A lah', 'Seumu peue go' nya na' tec ce hawc' na', maet'maen' meuh a seumu ri kleum' nang ce' ka na' hawc'.

Cawo' Peucawo' yeuh Eun kan' aen' na,
a meuh ku' hk'o'am' ri ngai' e' na':‡

⁴³ Kop awn' na, Ui' lah' a ri pe', kuing' Eun Peucawo' na' rup a ri ti ri heul' hk'ai' pe'. A kaw tuil' ri ri peue cang pli' na' ce. ⁴⁴ A'nhaw' lawn htang' meul pang seumu awn' a ko', eun kaw bet'. Daecti seumu awn' a lawn hk'ui'c' teng' a'nhaw' ko', eun kaw bet' nyai'lheo'."§

⁴⁵ Yam ro' ce peue jhawp' rit mae' peue Hparisae' na' mhawng' ce leukah' leupong' awn' a na', ce yawng Yesu' buih lah' Eun ti ri na'. ⁴⁶ Ce sok hk'a' kaw ri mheut' ri ti Eun. Daecti ce lhat' ri peue heun' na' ce, kopti peue heun' na' sawn' ce Yesu' Eun meuh peue suip leukah' Eun Peucawo' na'.

22

Leukah' leupong' lawng pawe hk'a chec'

¹ Yesu' Eun tang lah' leukah' leupong' ri ce bae. Eun lah', ² "Kuing' pang mao' na' seun' a hkun'haw'hkam' ti peue na' rangraen eun pawe hk'a chec' pun kon' me ri na' eun. ³ Eun kah mhai' ri na' ce heul' lah' a ri peue pun eun ri klawng ce hawc' ce kaw ing' hk'a chec' na', daecti ce hkuin' ing'.

‡ 21:42 21:42 Suk'seun' 118:22, 23
na' ngon', un' kue' a nambat aet' 44.

§ 21:44 21:44 Nang htawm Seunga'

⁴ Hawc' ko', eun tang kah mhai' ku' seubu ri na' ce heul' lah' a ri peue pun eun ri klawng ce hawc' ce kaw ing' hk'a chec' na' ce, 'Pun pawe na' rangraen ui' ku ceu na' euc' hawc'. Nghawm' ui' a'moe mae' sat' seubu ku' uii' ui' kleueng' na' hawc'. Ui' rangraen ku ceu na' meulamlam ri hawc'. Ing' hk'a pawe na' reu'.

⁵ Daecti ce un' ti lawng aen' a seucen, ce yeuh kan' chin ri na' heul'. Ngon' ce heul' nang mal' ri. Ngon' ce heul' ka. ⁶ Ngon' ce mheut' ri yeuh ku' hk'o'kaic mae' toh mhai' eun hkun'haw'hkam' na' ce. ⁷ Hkun'haw'hkam' na' eun seungeueng' nyawk'. Eun kah muk peue suik' ri na' ce heul' toh ku' meuh nang toh mhai' eun na' ce. Eun ku kah ce dum ri tec veng ce na' yeut.

⁸ Hawc' ko', eun lah' a ri mhai' ri na' ce, 'Rangraen ui' pawe ri na' meulamlam ri hawc', daecti peue klawng ui' kaw ing' hk'a pawe ui' na' ce hkuin' kuing' mae' pawe ui' na'. ⁹ Heul' ri gah' hk'a' keuting na' ce. Klawng peue pun pe' ri nyu na' ce ing' hk'a pawe ui' na' reu'. ¹⁰ Kop awn' na, mhai' eun hkun'haw'hkam' na' ce eo' ri heul' hot' hk'a na' ce. Peue pun ce ri nyu na' ce, peue chak' un' lah' peue rai un' lah' ce hk'on'ro ce gawm'euc'. Vang hk'a chec' na' peue chec' na' peue nuknhen' a.

¹¹ Daecti yam hkun'haw'hkam' na' ing' nom'nawk eun peue hk'a chec' na' peue, eun pun ri nyu peue un' cuip' hk'eung hk'a chec' ri ti peue. ¹² Kop awn' na, eun mhaing' eun, 'A'mawo, mi hkuin' cuip' hk'eung hk'a chec' ri, mi ci' ing' lec maen' na' pun yeuh sa'nhaw'?' Peue awn' eun klaee' ri fit', eun un' laee cang lah' keunhaw'.

¹³ Hawc' ko', hkun'haw'hkam' na' eun tuil' leukah' ri mhai' ri na' ce, 'Mawt ti' cung eun na' nyon ri tec eun vang duim'lawng ta'ul' aec'rak yam cet rang' ri hk'a' nok na' reu'.

¹⁴ Kopti peue pun ri rap hk'a' klawng na' kue' peue heun', daecti peue pun ri rap hk'a' leuk ri ti na' peue kue' leng."

Seue' hkawn' ri cawo' Kae'sa eun

¹⁵ Peue Hparisae' na' puc ce ri heul' sa'lit puri kaw tung' ri pun Yesu' leukah' kleuc' Eun na'. ¹⁶ Ce kah tapae' ri na' ce mae' peue eun Herot' na' ce heul' mhaing' Yesu' Eun, "Seura', yawng ye meuh Mi peue leupaws seumeu'. Mi sangsawn' a hot' hk'a' Eun Peucawo' na' neumneum. Mi un' meuh mae' hk'a'mawn' hk'a'maen' ri peue. Mi hkuin' keue' ri buh a'nhaw'. ¹⁷ Mi ci' kuit a yeuh sa'nhaw', hk'o' Mi lah' a ri ye, seue' ye hkawn' ri cawo' Kae'sa eun na' cawp' ka aw, un' cawp' ka aw?"

¹⁸ Daecti Yesu' yawng Eun kamkuit rai ce na', Eun lah' a ri ce, "Peue leukah' seunga' hpum' vok' na' pe', a ci' yeuh keunhaw', pe' vae' ing' long ri nawk Ui'? ¹⁹ Tuil' Ui' nawk paec seue' hkawn' pe' na' ti htaep' reu'." Ce ku ti ri tuil' htaep' na' ri Heun. ²⁰ Eun mhaing' ce, "Htaep' na' a ci' kue' rup a'nhaw', muis a'nhaw'?"

²¹ Ce top' a, "Meuh a cawo' Kae'sa eun."

Hawc' ko', Yesu' Eun lah' a ri ce, "Hk'eung eun cawo' Kae'sa na' tuil' a keutah ri cawo' Kae'sa eun, hk'eung Eun Peucawo' na' tan a keutah ri Peucawo' Eun reu'."

²² Yam pun ce ri mhawng' leukah' awn' a na', ce ku am' nyawk' ri Heun. Ce puc yawo ri heul'.

Lawng tang kuh' im'

²³ Hk'a'naee seunyi awn' na, peue Sadu'kae' lah' tang kuh' im' a un' kue' na' ngon' ce ing' mhaing' Yesu' Eun, ²⁴ "Seura', Mo'se tem' eun ri tawm' ri uin' a pun ye yeuhki', 'Peue ti peue eun lawn yeum yam un' nang kue' ri kon' ko', punta kaw eun kue' kon' suip' ceucat ri na', ec' eun a'ko' awng' eun na' eun kaw kah ri tang ti beun' awn' eun."

²⁵ Kue' a awng'ec' a' res peue. Nang ec' na' eun ti ri is' beun', daecti eun yeum yam un' nang kue' ri kon'. Kop awn' na, eun hk'ah' beun' ri na' eun ri awng' ri na' eun. ²⁶ Lal' peue ti peue na' eun mae' loe' peue ti peue na' eun ka ku seun' awn' a yeut, rot ti a' res peue ti peue na' eun ce ku seun' awn' a. ²⁷ Vang tisut' ka na', beun' awn' eun ku yeum heul'. ²⁸ Yam tang kuh' im' na', beun' awn' eun ci' na' meuh beun' a'nhaw' ri awng'ec' a' res peue awn' ce, kopti ti ce beun' awn' eun meuh beun' ri ku peue ri na'?"

²⁹ Yesu' Eun top' a, "Kleuc' pe' hawc', kopti un' yawng pe' htawm Seunga' na' mae' ti'ca Eun Peucawo' na'. ³⁰ Yam peue yeum na' tang kuh' im' ce na', ti puri mae' kui' puri na' a hkuin' kaw laee kue', kaw ce keut' ri seun' in'hpom kuing' pang mao' na' ce ko'. ³¹ Daecti ku' to' ri lawng tang kuh' im' na' un' duing lip pe' a aw? Peucawo' lah' Eun a ri pe', ³² 'Meuh Ui' Peucawo' eun Abraham, Peucawo' eun I'cak' mae' Peucawo' eun Yakop'."* Peucawo' hpaw Eun ca' meuh Peucawo' ce peue yeum na', daecti meuh Eun Peucawo' ce peue a'yu im' na'."

³³ Yam peue heun' na' mhawng' ce leukah' sangsawn' Eun na', ce am' ri ka.

Leukah' ritroe a'ye' keuting hk'ai' peue na'

³⁴ Yam peue Hparisae' na' pun ce ri mhawng' lawng Yesu' yeuh Eun peue Sadu'kae' na' ce dit' ti na', ce ing' hk'om puri tiduih'. ³⁵ Hk'a'naee muk ce na' a kue' peue yawng leukah' ritroe ti peue na' eun ing' long ri nawk Yesu' Eun. Eun mhaing' Eun, ³⁶ "Seura', hk'a'naee leukah' ritroe na' nangnhaw' na' a ci' a'ye' keuting hk'ai' ka?"

³⁷ Yesu' Eun top' a, " 'Leumeus' Peucawo' mi na' Eun sut' hpum' ri, sut' civit ri mae' sut' kamkuit ri na' gawm'euc' ka reu'."† ³⁸ Aen' a meuh leukah' ritroe a'ye' keuting hk'ai'

* 22:32 22:32 Pucti heul' 3:6 † 22:37 22:37 Saw'n' leukah' mun' 6:5

ka ti moeng ka ná. ³⁹ Lal' moeng ka ná a ku seun' ti moeng ka ná yeut. A meuh, 'Leumeus' peue ut' keunam caonaó mi ná ce seun' leumeus' mi tú ri ná yeut reu'.[‡] ⁴⁰ Leukah' lal' moeng aen' meuh a kleum' ka leukah' ritroe ná maeé leukah' ce peue suip leukah' Eun Peucawó' ná gawm'euc' ka."

Hkrit Eun cí meuh kon' a'nhaw'?

⁴¹ Yam peue Hparisae' ná buih hk'om ce puri ná, Yesu' Eun mhaing' ce, ⁴² "Pé cí kuit lawng Eun Hkrit[§] ná yeuh sa'nhaw'? Eun cí meuh Kon' aí a'nhaw'?"

Ce top' a, "Meuh Eun Kon' aí eun Davit'."

⁴³ Eun lah', "Yeuh keutit' kó, a cí meuh kop keunhaw' Davit' eun vaeé lah' a hk'a'naee cu ri Cit' seunga' chak' ná eun klawng Eun, 'Cawó'? Davit' eun lah',

⁴⁴ 'Peucawó' lah' Eun a ri Cawó' uí' ná Eun,

"Mok' hk'a' a'tawm' Uí' ná
rot ti uin' Uí' ransu Mi ná ce

hk'a'ruim dak cung Mi ná reu.'"*

⁴⁵ Davit' eun ku vaeé klawng Eun meuh Cawó', Eun cí kaw cang meuh kon' eun Davit' yeuh sa'nhaw'?" ⁴⁶ A'nhaw' hkuin' laee cang top' leukah' mhaing' Eun Yesu' ná saec' ti peue. Tang' neum yam awn' na, a'nhaw' hkuin' laee hat' ri mhaing' Eun bae saec' ti peue.

23

Yesu' ram Eun ri peue guil leukah' ritroe maeé' peue Hparisae'

¹ Hawc' kó, Yesu' Eun lah' a ri peue cum heun' ná ce maeé' tapae' ri ná ce, ² "Peue guil leukah' ritroe maeé' peue Hparisae' ná mok' ce ri vang mok' eun Mó'se ná. ³ Kop awn' na, pé kaw kah ri leuceng ri yeuh ku' sangsawn'

‡ 22:39 22:39 Faeé' 19:18 § 22:42 22:42 A'ko' Mesí'ya * 22:44 22:44
Suk'seun' 110:1

ce na' ku ceu ka, daecti pawlaee yeuh seun' ku yeuh ce na'. Kopti un' hot' ce ri yeuh seun' ku sangsawn' ri na'. ⁴ Mawt ce beus seucen na' pang seuplang' peue na'. Daecti ce ri ko', geun' ti' ce na' ti geun' yawo, ce hkuin' teum'kawm peue yuk beus na' ri ka.

⁵ Ku' yeuh ce na' gawm'euc' ka ce yeuh a maeé' sum' kah ce peue nyu ri hk'o'cuin. Ce ti tep keuting vang seue' ton leukah' htawm Seunga' na' ce mawt a pit rel' ri na', a'ko' ri plong' ti' ri na'. Ce pleng' sawe ka hk'o' ri na' lang'. ⁶ Ce sum' mok' ri vang kue' munhpung' vang hk'asom' na' maeé' sum' mok' ri vang mok' a'ye' keuting hk'ai' peue hk'a'naee sa'la vang hk'o' mun' na'. ⁷ Ce sum' kah peue luisa ri nang keulas na'. Ce sum' kah peue klawng ri meuh 'seura'*

⁸ Daecti pe' na' pawlaee kah a'nhaw' klawng ri meuh 'seura'. Kopti kue' pe' seura' ti peue yawo. Pe' ri, meuh pe' ec'awng' puri gawm'euc'. ⁹ Pang bhen' keute' na' pawlaee klawng a'nhaw' meuh 'a'kuing' saec' ti peue, kopti kue' pe' A'kuing' ti peue yawo. Eun ut' nang kuing' pang maó' na'. ¹⁰ Pawlaee kah a'nhaw' klawng ri meuh 'cawo', kopti kue' pe' Cawo' ti peue yawo. Eun meuh Hkrit†. ¹¹ Peue keuting hk'ai' peue hk'a'naee pe' na' kaw eun kah ri yeuh mhai' pe'. ¹² Kopti saec' meuh a'nhaw' eun lawn ti ri keuting lhung' meun ko', eun kaw hkam' hk'a' nuic ri tem na'. Daecti saec' meuh a'nhaw' eun lawn tang' hpum' ri tem ko', eun kaw pun ri rap ri ti hk'a' yuk ri lhung' na'.

¹³ Peue guil leukah' ritroe maeé' peue Hparisae' meuh peue leukah' seunga' hpum' vok' na' pe', kaw pe' pun ri hkam' hk'a' jha' na'. Kopti sawng' pe' leuva' ka kuing' pang maó' na' ri peue. Pe' ri meun, pe' hkuin' lec a. Na' peue kaw

* **23:7** 23:7 Nang htawm Seunga' na' ngon', a lah' "Rabi'", a meuh leukah' Arame', vangdoh' ka na' a lah', seura'. † **23:10** 23:10 A'ko' Mesí'ya

lec a, pe' tang un' kah peue lec a. ¹⁴Peue guil leukah' ritroe maeé' peue Hparisae' meuh peue leukah' seunga' hpum' vok' na' pe', kaw pe' pun ri hkam' hk'a' jha' na'. Kopti rim' pe' ri ti nya ce a'ya seunao na'. Pe' hk'awng guil ri hk'o' mun' ling'lang'. Kop awn' na, pe' kaw pun ri hkam' hk'a' ciyang na' lheu' peue ri. ‡

¹⁵ Peue guil leukah' ritroe maeé' peue Hparisae' meuh peue leukah' seunga' hpum' vok' na' pe', kaw pe' pun ri hkam' hk'a' jha' na'. Kopti punta kaw pe' sangsawn' ri pun peue ti ri peue eun ing' lec ritroe pe' peue Yu'da na', pe' co'ca' ri heul' pang bhen' keute' na' maeé' nang mha'seumut' na' ti duih' hawc' ti duih'. Daecti yam pun pe' peue awn' eun na', pe' yeuh eun pun ri lec nang keutong'nyarok na' lheu' pe' ri lal' pun.

¹⁶ Peue teuk' va peue ngai' lec' na' pe', kaw pe' pun ri hkam' hk'a' jha' na'. Kopti lah' pe', 'A'nhaw' lawn cu nya hk'o' mun' keuting na' hkam' a ko', eun saec' na' un' yeuh seun' ku' hkam' ri na', a hkuin' yeuh keunhaw'. Daecti eun lawn cu hk'il' ka nya hk'o' mun' keuting na' hkam' a ko', eun kaw kah ri hot' ri yeuh a seun' ku' hkam' ri na'.

¹⁷ Peue nga' ngai' lec' na' pe', a ci' meuh nangnhaw' ku' ca ri kue' a'ye' keuting hk'ai' ka na'? Hk'il' na' aw, a'ko' nya hk'o' mun' keuting ku' yeuh hk'il' na' seunga' chak' na' aw?

¹⁸ Pe' ku tang lah', 'A'nhaw' lawn cu vang dum ri tan ku' tan na' hkam' a ko', eun saec' na' un' yeuh seun' ku' hkam' ri na', a hkuin' yeuh keunhaw'. Daecti eun lawn cu ku' tan uin' ri hk'a' pang vang dum ri tan awn' a hkam' a ko', eun kaw kah ri hot' ri yeuh a seun' ku' hkam' ri na'. ¹⁹ Peue ngai' lec' na' pe', a ci' meuh nangnhaw' ku' ca ri kue' a'ye' keuting hk'ai' ka na'? Ku' tan na' aw, a'ko' vang dum ri tan ku' yeuh ku' tan na' seunga' chak' na' aw? ²⁰ Kop awn' na,

‡ 23:14 23:14 Nang htawm Seunga' na' ngon', a un' kue' nambat aet' 14 na'.

peue cu vang dum ri tan ná hkam' a ná eun ko', eun ku hkam' ri cu vang dum ri tan ná maeé' ku uin' ri hk'a' pang vang dum ri tan ná ku ceu ka yeut. ²¹ Peue cu nya hk'o' mun' keuting ná hkam' a ná eun ko', eun ku hkam' ri cu nya hk'o' mun' keuting ná maeé' Cawo' ut' hk'a' naee ka ná Eun yeut. ²² Peue cu kuing' pang mao' ná hkam' a ná eun ko', eun ku hkam' ri cu tenceo' Eun Peucawo' ná maeé' Cawo' mok' hk'a' pang ka ná Eun yeut.

²³ Peue guil leukah' ritroe maeé' peue Hparisae' meuh peue leukah' seunga' hpum' vok' ná pé', kaw pé' pun ri hkam' hk'a' jha' ná. Kopti a'lhuing', in' hk'im ná maeé' hk'eung hom' seue' nang ku' hk'a' ná ku ceu ka pé' tan a kul' pun ti pun ri Peucawo' Eun. Daecti ku' kue' hk'a' naee leukah' ritroe ku' a'ye' keuting hk'ai' ceu nang awn' ce ná pé' tecla a. Aen' ce a meuh hk'a' leupaws seumeu', hk'a' tukyak maeé' hk'a' kati keutawn' ná. Pé' htuk' ri yeuh ku' hk'a' nanggal' ná, maeé' ku' hk'a' kui' ná pé' ku ná htuk' ri un' tecla a. ²⁴ Peue teuk' va peue ngai' lec' ná pé', to' rong' pé' vakvoc ná daecti pé' gleut jawng tu' ka kalaok' ná.

²⁵ Peue guil leukah' ritroe maeé' peue Hparisae' meuh peue leukah' seunga' hpum' vok' ná pé', kaw pé' pun ri hkam' hk'a' jha' ná. Kopti hpak' pé' pal hk'a' nok ka paen' kaw' ná, daecti hk'a' naee ka ná hk'a' law' hpa ná maeé' hk'a' hkuin' awng' tang' ná a nuknhen' a. ²⁶ Peue Hparisae' ngai' lec' ná pé', hpak' hk'a' naee ka paen' kaw' ná nanggal' reu', hk'a' nok ka ná a ku ná seungawm yeut.

²⁷ Peue guil leukah' ritroe maeé' peue Hparisae' meuh peue leukah' seunga' hpum' vok' ná pé', kaw pé' pun ri hkam' hk'a' jha' ná. Kopti seun' pé' leumuic pok ri paing ri pun' ná. Hk'a' nok ka ná a saec' ngam nyawk', daecti hk'a' naee ka ná seuang' peue yeum ná maeé' ku' hk'aw' jeuk ná gawm' euc' a nuknhen' a. ²⁸ Seun' awn' na, peue nyu hk'a' nok pé' ná seun' meuh pé' peue leupaws

seumeu' ko', daecti hk'a'naee pé na' hk'a' leukah' seunga' hpum' vok' na' maeé ku' rai na' a nuknhen' a.

²⁹ Peue Guil leukah' ritroe maeé peue Hparisae' meuh peue leukah' seunga' hpum' vok' na' pé, kaw pé pun ri hkam' hk'a' jha' na'. Kopti go' pé leumuic ce peue suip leukah' Eun Peucawo' na' maeé yong' pé leumuic ce peue leupaws seumeu' na'. ³⁰ Pé lah', 'A lawn meuh ku' áyu im' ut' e' cu ce yam ceucat e' na' ce ko', e' hkuin' kaw pawng' ri maeé ku' toh peue suip leukah' Eun Peucawo' na' ce.' ³¹ Lah' pé a yeuh keutit' na' lak' meuh a hkam' meun pé sa' hki' meuh ri kon' hk'i ce peue toh peue suip leukah' Eun Peucawo' na' ce. ³² Kop awn' na, kah pé suip ri yeuh map' ku' yeuh ce ceucat pé na' heul' rot tisut' ka reu'.

³³ Kon' hk'i ka seueueng' sa' hao' na' pé, pé cí kaw cang pon hk'a' taws' ámu kaw kah pé lec keutong' nyarok na' yeuh sa' nhaw'? ³⁴ Uí cus' peue suip leukah' Eun Peucawo', peue kue' cúyi maeé peue Guil leukah' ritroe na' ce ri pé. Ngon', pé toh ce, tawk' ce pang kleum' rawng' tawp'. Ngon', pé ta' faet' ce nang sa' la vang hk'o' mun' na' maeé pé heul' keunhap' nokneh ce ti veng hawc' ti veng. ³⁵ Kop awn' na, nham' ce peue leupaws seumeu' hk' uic' pang bhen' keute' na' tang' neum ri nham' eun Abela' peue leupaws seumeu' na' rot ti nham' eun kon' eun Berehkeya' muis Yahkari' ku' toh pé eun nang seuna' ka nya hk'o' mun' keuting maeé vang dum ri tan ku' tan na' a kaw hk' uic' hk'a' pang pé. ³⁶ Kaw Uí lah' a ri pé neumneum, ceu nang aen' ce gawm' euc' kaw a keut' meuh ri peue cu aen' ce.

Yesu' leumeus' Eun veng Yeru' salaem

³⁷ O', veng Yeru' salaem, veng Yeru' salaem, toh mi peue suip leukah' Eun Peucawo' na' ce maeé dhim' mi peue cus' ri lih ri mi na' ce yeum ri seumu laleung. Uí saec' sum'

hk'on'ro kon'hk'i mi na' ce seun' el' ma na' ngom a kon' ri na' hk'a'ruim hk'ec' ri na' laleung ko', daecti mi un' kah Uí' yeuh a. ³⁸ Keue' reu', nya mi na' tec a ri rang' hawc'. ³⁹ Kopti lah' Uí' a ri mi, hpaw mi ca' kaw nang pun ri nyu Uí' rot ti kaw mi lah', 'Suk'seun' Cawo' ing' hk'a'ruim muis Eun Peucawo' na' Eun.'§ ”

24

Het'kaw hk'aws' rot yam tisut'

¹ Yam Yesu' puc Eun ri lih neum nya hk'o' mun' keuting na', tapae' na' ce ing' ri Heun. Ce hak' Eun eo' ri nawk nya hk'a'naee kang' hkung' ka nya hk'o' mun' keuting na' ce. ² Yesu' Eun lah' a ri ce, “Pun pe' ri nyu ceu nang aen' ce gawm'euc' hawc', un' meuh ka aw? Uí' lah' a ri pe' neumneum, seumu aen' kaw ce un' laee po ri pang puri saec' ti meul'. A kaw pun ri seut' ri tec ri ku meul' ri.”

³ Yam Yesu' mok' Eun pang gong Sanlon na', tapae' na' ce ing' mhaing' koe Eun, “Hk'o' Mi lah' ye mhawng' a, ceu nang tit' ce a ci' kaw keut' meuh yamnhaw'? Kaw Mi tang lih na' mae' kaw a hk'aws' rot yam tisut' na', a ci' kaw kue' het' keunhaw'?”

⁴ Yesu' Eun top' a, “Uin' sati ri reu'. Pawlae tuil' peue cop' pe'. ⁵ Peue heun' na' kaw ce peus muis Uí' na' ce na' ing' lah', 'Meuh uí' Hkrit Eun.*” Ce na' cop' peue heun'heun' na' ce. ⁶ Pe' kaw pun ri mhawng' lawng peuing' suik' mae' lawng suik' kaw a keut' na'. Uin' sati ri, pawlae hpum' seuyuk. Kopti lawng aen' kaw a kah ri kue' meuh yeut, daecti a hkuin' kaw nang rot yam tisut' ka. ⁷ Peue ti ceu hawc' ti ceu, kuing' ti kuing' hawc' ti kuing', peue kaw kleuc' puri. A kaw kue' in'san' mae' ut' ngeup'

§ 23:39 23:39 Suk'seun' 118:26 * 24:5 24:5 A'ko' Mesí'ya

heun' duih'. ⁸ Ceu nang aen' ce gup kaw'n kaw a meuh yawo kleum' ka ku' tukhka na' seun' sui' awng' na' ko'.

⁹ Kopti meuh a Ui' ri, peue kaw mheut' pe', peue kaw yeuh ku' tukhka na' ri pe', peue kaw toh pe' yeum. Peue gawm'euc' peue kaw nyu pe' pereng ri. ¹⁰ Yam awn' na, peue heun' peue na' peue kaw hpawt' ri tecla hk'a' yum' na'. Peue kaw fuin ri puri mae'e' peue kaw ces ri puri. ¹¹ Peue guil ri meuh peue suip leukah' Eun Peucawo' na' ce kaw pucti heun'. Ce kaw cop' peue kleuc' hk'a' ri heun' peue. ¹² Kopti ku' rai na' baet a ri kue' heun' na', hk'a' leumeus'keus peue peue heun' na' a baet ri yawm' heul'. ¹³ Daecti peue yeun' hkam a rot tisut' ka na' kaw ce pun ri lawtpon. ¹⁴ Punta kaw a meuh sa'hki' pun peue gawm'euc' na', leukah' mun' ren' kaw'n lawng kuing' Eun Peucawo' na' a kaw pun ri pao' ri hk'awp' pang bhen' keute' na'. Hawc' ko', yam tisut' na' a kaw rot.

¹⁵ Kop awn' na, yam nyu pe' ku' hk'aw'jeuk yeuh ku' lulaic na' ut' a hk'a'naee vang seunga' chak' na' hot' seun' ku' Dayela' peue suip leukah' Eun Peucawo' lah' eun ri uin' na'† (peue lip htawm aen' a na', co'ca' ri yawng a reu'), ¹⁶ peue ut' nang kuing' Yu'da na' kah ce hk'uih huk' pang gong na' reu'. ¹⁷ Peue ut' pang a'ras' na' ce pawlaee lih ti hk'eung ti ri ceu pucti lih hk'ai' nya na'. ¹⁸ Saec' meuh peue ut' nang mal' na' ce pawlaee ing' ti hk'o keuting ri na'. ¹⁹ Sa'hkat' yam awn' na kaw a meuh ku' hk'o'lhath' keuting pun a'ya nyhel' mae'e' nang kue' kon' pui na' ce. ²⁰ Yam kaw pe' pun ri hk'uih aen' punta kaw a un' keut' kue' yam kawt' na', a'ko' hk'a'naee seunyi Sin' na', pe' na' hk'o' mun' reu'. ²¹ Kopti, yam awn' kaw a meuh yam tukhka nyhap' nyawk'. Ku' keunhaw' un' laee keutec pun a ri mae'e' ka tang' neum bhen' keute' na' pun a ri hpanpleng' ri na'.

† 24:15 24:15 Dayela' 9:27; 11:31; 12:11

Saec' hk'a' nanggal' ka heul', a hkuin' kaw laee kue' bae.
²² Yam awn' a lawn un' pun ri yeuh ri dot' ko', a'nhaw' hkuin' kaw lawtpon a saec' ti peue. Daecti kopti meuh a peue pun ri leuk ri ti na' ce, meuyam awn' a pun ri yeuh ri dot'. ²³ Yam rot a yam awn' na, peue ti ri peue eun lawn lah' a ri pe', 'Keue' reu', Hkrit ut' Eun maen'', a'ko' 'Ut' Eun mawn'', pe' na' pawlaee leuceng a. ²⁴ Kopti peue guil ri meuh Hkrit Eun mae' peue guil ri meuh peue suip leukah' Eun Peucawo' na' kaw ce pucti lih. A lawn kaw cang ko', punta kaw ce cop' ri pun peue Peucawo' leuk Eun ri ti na' ce, ce kaw yeuh het' keuting mae' ku' hk'o'am' na' ce. ²⁵ Keue' reu', lah' Ui' ri uin' a ri pe' tang' neum cawo ka hawc'.

²⁶ Kop awn' na, peue lawn lah' a ri pe', 'Peue awn' ut' Eun nang vang hk'oh'hk'oeng' na.' Pe' na' pawlaee pucti heul'. Peue lawn lah', 'Ut' Eun nang hkawng hk'a'nae na'. Pe' na' pawlaee yum' a. ²⁷ Kopti seun' cak'cal' na' ceng' a hk'a'lih seunyi a cang nyu ri rot hk'a'lec seunyi na', yam Kon' ai' peue kaw Eun tang lih na' a ku kaw seun' awn' a yeut. ²⁸ Tu' yeum na' a lawn kue' tawngnhaw' ko', raeng na' a kaw cu ri ri ka.

²⁹ Yam meuyam ka seunyi ka ku' tukhka nyhap' nyawk' awn' hawc' ka na',
 'Seunyi na' a na' keulawn' duim'lawng,
 a'chi' na' a hkuin' kaw laee ceng'.
 Seumeueng' na' a na' hk'ui'c' lih neum pang mao' na',
 ti'ca ka mao' na' ku ceu ka a kaw pun ri keuyuih'
 fui'fai':‡

³⁰ Yam awn' na, het' Eun Kon' ai' peue na' a kaw pucti lih neum pang mao' na'. Peue ceu pang bhen' keute' ku ceu na' peue kaw pet yam. Peue kaw pun ri nyu Kon' ai' peue na' lih Eun hk'a'nae putum' neum pang mao' na' ri

‡ 24:29 24:29 I'saya' 13:10; 34:4

munhpung' tí'ca keuting ri ná'. ³¹Eun kaw cus' in'hpom ri ná' ce lih maeé' seng' pí'tae'rae' laws' nyawk' ná'. Ce kaw heul' hk'on'ro peue leuk Eun ri ti ná' ce tang' neum rot ri hkop' lok dal maó' pun' hon' pun' ce' ná'.

³²Rin ri ti leukah' leupong' lawng kleum' pli' keutuic ná' reu'. Yam gluh' ka ná', pé' yawng meun kaw a hk'aws' rot yam kuc'. ³³Seun' awn' na, yam pun pé' ri nyu ceu nang awn' kue' meuh ka ná', pé' kaw yawng kaw Eun hk'aws' rot, Eun rot keunam ka leuva' ná' hawc'. ³⁴Kaw Uí' lah' a ri pé' neumneum. Cu yam peue maet' maen' ná' un' nang pon ce ná', ceu nang aen' ce gawm'euc' a kaw meuh neum. ³⁵Mao' ná' maeé' bhen' keute' ná' kaw a raí', daecti leukah' Uí' ná' a hkuin' kaw raí'.

Seunyi meuyam awn' a'nhaw' hkuin' yawng a saec' ti peue

³⁶A'nhaw' hkuin' yawng seunyi meuyam awn' na saec' ti peue. Saec' meuh in'hpom kuing' pang maó' ná' ce maeé' Kon' aí' ná' Eun ku hkuin' yawng a. A'kuiing' yawng Eun a koe. ³⁷Seun' ku' meuh hk'a'naee seunyi cu eun No'ah ná', a ku kaw meuh hk'a'naee seunyi Eun Kon' aí' peue ná' yeut. ³⁸Kopti nanggal' ka yam leuum' ná' un' nang htum' ka ná', peue ná' ce hk'asom', pen'vel, ti beun' ti me rot ti seunyi No'ah lec eun nang reu ná'. ³⁹Cu yam leuum' ná' un' nang htum' a ri tec peue ná', peue hkuin' nang yawng ku' kaw kue' meuh ná' saec' ti ceu. Seunyi yam Kon' aí' peue puc Eun ri ná', a ku kaw seun' awn' a yeut. ⁴⁰Yam awn' na, me lal' peue ut' tiduih' nang na ná' ka. Ku' ti peue ná' eun kaw pun ri ti ri huk', ku' ti peue ná' eun kaw pun ri uin' ri ut'. ⁴¹Beun' lal' peue maw' moc' tiduih' ná' ka. Ku' ti peue ná' eun kaw pun ri ti ri huk', ku' ti peue ná' eun kaw pun ri uin' ri ut'.

⁴²Kop awn' na, saec' meuh yamnhaw' ko' a reu', kopti un' yawng pé' seunyi yam Cawó' ri ná' kaw Eun tang lih ná'.

⁴³Yeuh pé' leuceng pun aen' na, cawó' nya ná' eun lawn

yawng yam con' na' kaw ce ing' ri ti yamnhaw' ka peunpul na' ko', eun kaw hk'awn' ko' meulamlam ri. Eun hkuin' kaw kah a'nhaw' cang toe' ri ing' lec nya ri na'. ⁴⁴ Kop awn' na saec' pe' ri, pe' ku kaw kah ri rangraen ri meulamlam ri. Kopti Kon' ai' peue na' kaw Eun lih yam un' pawn pe' kui' ri na'.

Mhai' kati keutawn' mae' mhai' kati un' keutawn'

⁴⁵ A'nhaw' ci' meuh mhai' kati keutawn' kue' cu'yi ku' cawo' na' tuil' eun eun meuh ro' gvah ku' hk'a ri mhai' ri cawp' meu cawp' yam ri na' eun? ⁴⁶ Yam cawo' na' ing' nyu eun mhai' na' yeuh eun ko' na', mhai' awn' eun kue' mun' keuting. ⁴⁷ Kaw Ui' lah' a ri pe' neumneum, cawo' na' kaw eun kah mhai' awn' eun rokso' vahtu' hk'il' leumuil ri na' gawm'euc' ka. ⁴⁸ Daecti mhai' awn' eun lawn meuh mhai' un' chak', eun na' kuit a hk'a'naee hpum' ri yeuh keutit', 'Cawo' ui' na' kaw'n' kaw eun yak ing' rot.' ⁴⁹ Hawc' ko', eun tang' ri peum' klaee' mhai' pu ri na' ce. Eun hk'asom' nyui plai' mae' a'mawo yuic' ri plai' ri na' ce ko', ⁵⁰ yam cawo' eun na' tang ing' rot eun yam mhai' awn' un' keutui' hpum' un' pawn eun kui' ri na', ⁵¹ cawo' na' kaw eun ciyang eun reng, ra eun ut' vang ut' ce peue leukah' seunga' hpum' vok' na'. Mawn' na' a kaw kue' hk'a' ta'ul' ri yam cet rang' ri na'.

25

Leukah' leupong' lawng kon' hk'ih' plot' lon kul' peue

¹ Yam awn' na, kuing' pang mao' na' seun' a kon' hk'ih' plot' lon kul' peue ce sawng' pin' kaw' ngawl ri kaw heul' rap seula pen' na' eun ko'. ² Ku' hpawn' peue na' ce nga' suisa. Ku' hpawn' peue na' ce kue' cu'yi. ³ Ku' nga' suisa na' ce sawng' pin' kaw' ngawl ri na' heul', daecti ce hkuin' pin' lamawn ka heul'. ⁴ Ku' kue' cu'yi na' ce pin' kaw' ngawl ri na' heul', ce ku pin' ri pu lamawn nang kong'

heul'. ⁵ Seula pen' na' kopti un' pao ing' rot eun na', ce it' jing' heul' pun ri it'.

⁶ Yam rot a peunnuik' na', peue klawng ri lah', 'Seula pen' na' ing' rot eun hawc'. Pucti lih heul' rap ri ti eun reu'.

⁷ Hawc' ko', kon'hk'ih' plot'lon na' ce sawng' kuh' rangraen kaw' ngawl ri na'. ⁸ Ku' nga' suisa na' ce lah' a ri ku' kue' cu'yi na' ce, 'Hk'o' pe' gvah ri tuil' ye is' lamawn ri na' ngon', kaw' ngawl ye na' kaw a hk'aws' laic hawc'.

⁹ Ku' kue' cu'yi na' ce top' a, 'Ca' kaw a cang, lhat' ye lamawn ri na' un' kum ka ye ri mae' pe' ri. Na' pe' heul' leuvaee lamawn pun ti ri cawo' paing' lamawn na' ce, a na' chak'.

¹⁰ Yam buih heul' leuvaee ce na', seula pen' na' eun ing' rot. Kon'hk'ih' plot'lon ku' rangraen ri hawc' na' ce heul' tiduih' mae' seula pen' na' eun hk'a'naee vang hk'a' chec' na'. Hawc' ko', leuva' na' a sawng' ri.

¹¹ Hawc' ka na', kon'hk'ih' plot'lon hpawn' peue ku' heul' leuvaee lamawn na' ce ing' klawng ri lah', 'Cawo', cawo', hk'o' mi tah' leuva' na' ri ye.'

¹² Daecti eun lah' a ri ce, 'Ui' lah' a ri pe' neumneum, hpaw ui' ca' yawng pe'.

¹³ Kop awn' na, kopti un' yawng pe' seunyi meuyam awn' kaw a rot yamnhaw' na', saec' meuh yamnhaw', ko' a reu'.

Leukah' leupong' lawng mhai' loe' peue

¹⁴ Kuing' pang ma' na' seun' a peue ti peue kaw eun pucti heul', eun klawng mhai' ri na' ce, eun tawm' ap ce roksa' vahtu' hk'il' leumuil ri na' ce. ¹⁵ Eun tuil' leumuil ri ku' ti peue na' eun hpawn' talan*, ku' ti peue na' eun lal' talan, ku' ti peue na' eun ti talan hot' seun' ku' yawng

* 25:15 25:15 Leumuil ti talan na' meuh a ngos reng na' 20 neum.

ku' cang ce na'. Hawc' ko', eun pucti heul'. ¹⁶ Ku' pun hpawn' talan na' eun keulawn' heul' yeuh ka. Eun tang pun nammaet ka na' hpawn' talan. ¹⁷ Seun' awn' na, ku' pun lal' talan na' eun ku' pun nammaet ka lal' talan. ¹⁸ Daecti ku' pun yawo ti talan na' eun kung' ri puing' ri mo' leumuil eun cawo' ri na' nang keute' na'.

¹⁹ Hawc' ka na' ling', cawo' na' eun tang ing'. Eun sawn' ca'lang' leumuil na' ri mhai' ri na' ce. ²⁰ Ku' pun leumuil hpawn' talan na' eun pin' leumuil ri na' ing' mae' nammaet pun eun hpawn' talan na'. Eun lah', 'Cawo', tuil' mi leumuil ri ui' hpawn' talan. Keue', tang pun ui' nammaet ka na' hpawn' talan.'

²¹ Cawo' eun na' eun top' a ri heun, 'Chak' ka, meuh mi mhai' chak' mhai' kati keutawn'. Kopti kati keutawn' mi ri ku' aet' na', ui' kaw tang' ri uin' mi meuh nang rokso' hk'eung keuting na'. Kah mi ren'kawn tiduih' mae' cawo' ri na' eun reu'.

²² Ku' pun leumuil lal' talan na' eun ku' ing' lah', 'Cawo', tuil' mi leumuil ri ui' lal' talan. Keue', tang pun ui' nammaet ka na' lal' talan.'

²³ Cawo' eun na' eun top' a ri heun, 'Chak' ka, meuh mi mhai' chak' mhai' kati keutawn'. Kopti kati keutawn' mi ri ku' aet' na', ui' kaw tang' ri uin' mi meuh nang rokso' hk'eung keuting na'. Kah mi ren'kawn tiduih' mae' cawo' ri na' eun reu'.

²⁴ Hawc' ko' ku' pun leumuil ti talan na' eun ku' ing' lah', 'Cawo', yawng ui' meuh mi peue hkan' reng. Mi vuic ri ti vang un' jheum'. Mi hk'on'ro ri ti vang un' puin'. ²⁵ Ui' lhat' yeuh ri leumuil mi na' rai', ui' heul' puing' leumuil ti talan mi na' nang keute'. Keue', aen' meuh a leumuil mi na'.

²⁶ Cawo' na' eun top' a, 'Mhai' rai keunah na' mi, yawng mi vuic ui' ri ti vang un' jheum'. Ui' hk'on'ro ri ti vang un' puin' na'. ²⁷ Yeuh keutit' ko', mi na' htuk' ri heul' seue'

leumuil ui' na' hk'a'naee nya leumuil na'. Yam tang ing' ui' na', ui' ku na' pun leumuil ri na' mae' nammaet ka.'

²⁸ Kop awn' na, ti leumuil ti talan eun na' hk'ai' heun, tuil' a ri ku' kue' kul' talan na' eun reu'. ²⁹ Kopti, ku' kue' na' ce ko', kaw tang tuil' ce bae. Ce na' kue' lheu' buba ri. Daecti ku' un' kue' na' ce ko', kaw tang hue' ku' kawn' kue' ce na' lih hk'ai' ce. ³⁰ Nyon ri tec mhai' un' kue' peuehot' aen' eun vang duim'lawng hk'a'nok vang kaw kue' hk'a' ta'ul' ri yam cet rang' ri na' reu'.

Taws' a'mu ri peue ceu gawm'euc'

³¹ Yam Kon' ai' peue lih Eun hk'a'naee munhpung' ri na' mae' in'hpom na' ce tiduih' gawm'euc' na', Eun kaw mok' pang tenceo' ri na' hk'a'naee munhpung' ka kuing' pang mao' na'. ³² Peue ceu gawm'euc' na' peue kaw ing' cuhk'on' ri nanggal' Eun na'. Hawc' ko', Eun kaw gvah peue hk'ai' puri seun' peue go' kon'yung' na' gvah eun kon'yung' na' mae' a'pe na' ko'. ³³ Kon'yung' na' Eun kaw uin' a hk'a' a'tawm' ri. A'pe na' Eun kaw uin' a hk'a' a've' ri.

³⁴ Hawc' ko', Hkun'haw'hkam' na' Eun kaw lah' a ri peue ut' hk'a' a'tawm' ri na' ce, 'Peue pun mun' ri Kuing' Ui' Eun na' pe', ing' ti sin' pe' na' reu'. Sin' awn' meuh a kuing' ku' rangraen ri uin' ri pun pe' tang' neum yam bhen' keute' na' pun a ri hpanpleng' ri na'. ³⁵ Kopti yam sum' som' Ui' na', pe' tuil' Ui' som'. Yam sum' nyui Ui' leuum' na', pe' tuil' Ui' nyui. Yam meuh Ui' peue leuvok un' duing nyu na', pe' rap ri ti Ui'. ³⁶ Yam ut' gung'gang' ui' na', pe' tuil' Ui' is' hk'ohk'eung. Yam peuyhat Ui' na', pe' nom' nawk Ui'. Yam ut' Ui' nang htawng' na', pe' heul' glue ri Ui'.

³⁷ Yam awn' na, peue leupaws seumeu' na' ce kaw mhaing' Eun, 'Cawo', yam nyu ye sum' som' Mi ye tuil' Mi som' na', a'ko' yam nyu ye sum' nyui Mi leuum' ye tuil' Mi nyui na', a ci' meuh yamnhaw'? ³⁸ Yam nyu ye

meuh Mi peue leuvok ye rap ri ti Mi na', a'ko' yam nyu ye ut' gung'gang' mi ye tuil' Mi is' hk'ohk'eung na', a ci' meuh yamnhaw'? ³⁹ Yam nyu ye peuyhat Mi, a'ko' yam ut' Mi nang htawng' ye heul' glue ri Mi na', a ci' meuh yamnhaw'?

⁴⁰ Hk'uhaw'hkam' na' Eun kaw top' a, 'Ui' lah' a ri pe' neumneum. Ku' yeuh pe' a ri peue aet' hk'ai' peue hk'a'naee ec'awng' Ui' ti peue na' eun na', pe' ku yeuh a ri Ui' yeut.'

⁴¹ Hawc' ko', Eun kaw lah' a ri peue ut' hk'a' a've' ri na' ce, 'Peue pun ri hkam' hk'a' jha' na' pe', puc pe' heul' hk'ai' Ui' reu'. Heul' lec hk'a'naee ngawl ha' cot'cu vang pun ri rangraen ri uin' ri pun seuca' rai na' mae' tapae' ka na' ce na'. ⁴² Kopti yam sum' som' Ui' na', pe' hkuin' tuil' Ui' som'. Yam sum' nyui Ui' leuum' na', pe' hkuin' tuil' Ui' nyui. ⁴³ Yam meuh Ui' peue leuvok na', pe' hkuin' rap ri ti Ui'. Yam ut' gung'gang' ui' na', pe' hkuin' tuil' Ui' is' hk'ohk'eung. Yam peuyhat Ui' na' mae' yam ut' Ui' nang htawng' na', pe' hkuin' heul' glue ri Ui'.

⁴⁴ Hawc' ko', ce kaw mhaing' Eun, 'Cawo', yam nyu ye sum' som' Mi, a'ko' sum' nyui Mi leuum', a'ko' meuh Mi peue leuvok, a'ko' ut' gung'gang' Mi, a'ko' peuyhat Mi, a'ko' ut' Mi nang htawng' ye un' heul' yeuh mhai' ri Mi na', a ci' meuh yamnhaw'?

⁴⁵ Eun kaw top', 'Ui' lah' a ri pe' neumneum. Ku' un' yeuh pe' a ri peue aet' hk'ai' peue hk'a'naee peue aen' ce ti ri peue na' eun na', pe' ku hkuin' yeuh a ri Ui' yeut.'

⁴⁶ Hawc' ko', peue aen' ce kaw kah ri pucti heul' rap ri ti hk'a' ciyang cot'cu na'. Daecti peue leupaws seumeu' na' ce kaw pun ri lec vang a'yu im' cot'cu na'."

26

Mhe' hk'a' kan' kaw toh Yesu' Eun

¹ Yam Yesu' hawc' Eun lah' ri lawng awn' ce gawm'euc' na', Eun lah' a ri tapae' ri na' ce, ² "A lawn bae lal' seunyi ko', yawng pe' pawe vel nya na' kaw a rot. Yam awn' na, Kon' ai' peue na' Eun kaw pun ri ap ri tawk' ri pang kleum' rawng'tawp' na'."

³ Yam awn' na, ro' peue jhawp' rit keuting na' ce mae' nang kawt hk'a'naee ce peue Yu'da na' ce hk'om puri nang haw' eun peue jhawp' rit keuting muis Kayafas' na'.

⁴ Hk'a'naee vang hk'a' vok' hk'a' chi'lai na' ce sa'lit puri mhe' hk'a' kan' kaw mheut' ri toh Yesu' Eun. ⁵ Ce lah' a ri puri, "Mak' nang yeuh a hk'a'naee yam ka pawe na', peue heun' na' na' peue cang yeuh ku' suksak."

Beun' pok lamawn ri Yesu' Eun

⁶ Yam Yesu' mok' Eun nang nya eun Si'mon ku' meuh peue naw na' eun nang yung' Betani' na', ⁷ yam Yesu' buih mok' Eun ri som' na', beun' ti peue na' ka pin' lamawn hom' ngos heun' seue' ri nang kong' seumu na' ing'. Ka lhuik' lamawn hom' na' ri cing' Eun Yesu' na'.

⁸ Yam tapae' na' nyu ce a na', ce seungeueng'. Ce lah', "A ci' yeuh keunhaw', ka vae' yeuh lamawn hom' awn' a meuh ku' hk'o'hk'awng'? ⁹ Na' ka paing' lamawn hom' awn' a ka na' pun ngos ka na' heun'heun'. Ka na' htuk' ri gvah ri tuil' a ri peue hk'o'tukyak na' ce."

¹⁰ Daecti Yesu' yawng Eun ku' kuit ce na', Eun lah' a ri ce, "A ci' meuh kop keunhaw' pe' vae' suksak beun' aen' ka? Yeuh ka ku' chak' na' ri Ui' hawc'. ¹¹ Peue hk'o'tukyak na' ut' ce mae' pe' laleung. Daecti Ui' ri, Ui' hkuin' kaw ut' mae' pe' laleung. ¹² Lhuik' ka lamawn hom' ri tu' Ui' aen' a na', meuh a ku' rangraen ri uin' punta yam na' peue puing' tu' Ui' na'. ¹³ Kaw Ui' lah' a ri pe' neumneum, leukah' mun' ren'kawn aen' a saec' na' lah' ri heul' tawngnhaw' ka pang bhen' keute' na' ko', punta kaw peue kuit rot ri beun' aen'

ka na', kan' yeuh ka ri uin' aen' kaw peue suip ri ris a heul' yeut."

Yu'das' kuit deut eun ri kaw fuin Yesu' Eun

¹⁴ Hawc' awn' na, hk'a'naee tapae' kul'leual' peue na' ce ku' muis Yu'das' I'sakariot' na' eun heul' ri ro' peue jhawp' rit na' ce. ¹⁵ Eun mhaing' ce, "Ui' lawn ap fuin Yesu' Eun ri pe' ko', pe' ci' kaw tuil' ui' is' a'neng?" Kop awn' na, ce tuil' eun is' leumuil leuoekul' htaep'. ¹⁶ Tang' neum yam awn' na, eun sok yam htuk' lai ri kaw ap fuin Eun ri ce na'.

Yesu' hk'a Eun pawe vel nya na' mae' tapae' ri na' ce

¹⁷ Seunyi la ka pawe un' seue' hkawomun' is' paeng na', tapae' na' ce ing' mhaing' Yesu' Eun, "Mi ci' sum' kah ye rangraen vang kaw e' hk'asom' pawe vel nya na' tawngnhaw'?"

¹⁸ Eun lah', "Heul' lah' a ri peue nang veng ti peue na' eun yeuh keutit', 'Seura' lah' Eun, yam tang' ri uin' ri pun Ui' na' kaw a hk'aws' rot hawc'. Ui' kaw hk'a pawe vel nya na' tiduih' mae' tapae' ri na' ce nang nya mi na'." ¹⁹ Kop awn' na, tapae' na' ce heul' yeuh a hot' seun' ku' Yesu' kah Eun ce yeuh na'. Ce heul' rangraen pawe vel nya na'.

²⁰ Yam fec' ka na', Yesu' Eun mok' ri som' keunam hpuin' na' mae' tapae' kul'leual' peue ri na' ce. ²¹ Yam buih som' ce na', Yesu' Eun lah', "Ui' lah' a ri pe' neumneum, hk'a'naee pe' ri ti peue kaw eun fuin Ui'."

²² Tapae' na' ce kuit nyhap' nyawk'. Ce lah' a ri Heun ti peue hawc' ti peue, "Cawo', hkuin' a na' un' meuh ui' ri ah?"

²³ Yesu' Eun top' a, "Ku' ruim ri som' paen' mae' Ui' na' meuh eun nang kaw fuin Ui'. ²⁴ Kon' ai' peue na' Eun kaw kah ri hot' seun' ku' tem' ri uin' ri na'. Daecti peue fuin Kon' ai' peue na' eun kaw pun ri hkam' hk'a' jha' na'. Peue awn' eun lawn na' un' keut' ko', a jaen na' chak' pun heun."

²⁵ Yu'das' ku' ap fuin Eun na' eun lah', "Seura', hkuin' a na' un' meuh ui' ri ah?"

Yesu' Eun top' a, "Meuh a mi ri."

Hk'a pawe Eun Yesu'

²⁶ Yam mok' ce ri som' na', Yesu' Eun ti hkawomun' na' Eun mun' keuting ri Peucawo' Eun. Hawc' ko', Eun ves ri tuil' a ri tapae' ri na' ce. Eun lah', "Ti ri hk'a a reu'. Aen' meuh a tu' Ui'."

²⁷ Hawc' ko', Eun ti kawc' na', Eun mun' keuting ri Peucawo' Eun. Hawc' ko', Eun tuil' a ri ce. Eun lah', "Ti ri nyui a ku peue ri reu'. ²⁸ Aen' meuh a nham' Ui', a meuh nham' kati sat'ca'. A lhaee' bah pun kaw a ploee' map' pun peue heun'heun' na' peue. ²⁹ Ui' lah' a ri pe', a lawn un' nang rot ti seunyi pun Ui' ri nyui leuum' pli' bui hk'u' mae' pe' nang kuing' Eun A'kuiing' na' ko', Ui' hkuin' kaw laee nyui leuum' pli' bui na' bae."

³⁰ Yam hawc' ce lah' ri cai suk'seun' na', ce pucti heul' pang gong Sanlon na'.

Yesu' lah' Eun lawng Petru' kaw eun tecla ri

³¹ Yam awn' na, Yesu' Eun lah' a ri tapae' ri na' ce, "Bul seunyaen', pe' ri gawm'euc' kaw pe' tecla Ui'. Kopti tem' a ri yeuhki',

'Kaw Ui' toh cawo' go' kon'jung' na' eun.

Kon'jung' na' ce kaw taic'jah hk'ai' puri heul'."*

³² Daecti hawc' ka tang kuh' im' Ui' na', Ui' kaw bai heul' nang kuing' Galilae' na' nanggal' pe'."

³³ Petru' eun lah', "Peue saec' na' tecla Mi gawm'euc' ri, daecti ui' hkuin' kaw duing tecla Mi."

³⁴ Yesu' Eun lah' a ri heun, "Ui' lah' a ri mi neumneum, bul seunyaen' nanggal' el' un' nang leuo' ka na', kaw mi lah' ri un' yawng Ui' hton loe' pok."

* 26:31 26:31 Yahkari' 13:7

³⁵ Daecti Petru' eun lah', "Ui' saec' na' yeum mae' Mi, ui' hkuin' kaw lah' ri un' yawng Mi." Saec' meuh tapae' seubu na' ce gawm'euc' ce ku lah' a yeuh keutit' yeut.

Yesu' heul' hk'o' Eun mun' vang muis Gesemani'

³⁶ Hawc' awn' na, Yesu' Eun mae' tapae' na' ce heul' ri vang muis Gesemani' na'. Eun lah' a ri ce, "Yam heul' hk'o' Ui' mun' teh' na', pe' ri pe' na' mok' maen' awh." ³⁷ Eun va Petru' mae' kon' me eun Yebedae' lal' peue na' ce heul' mae' ti. Eun hpum' lu kuit nyhap' nyawk'. ³⁸ Eun lah' a ri ce, "Hpum' lu kuit nyhap' Ui' nyawk', a hk'o' Ui' kaw yeum. Ko' maen' na' mae' Ui' meulamlam ri reu'."

³⁹ Hawc' ko', Eun sat ri heul' peunaeng'. Eun nghup' buh ri na' pang keute' na'. Eun hk'o' mun' lah', "A'kuiing', a lawn kaw cang ko', hk'o' Mi ti kaw' ka hk'a' tukhka aen' na heul' hk'ai' Ui'. Daecti pawlaee kah a meuh alo Ui', kah a htonnuk hot' alo Mi na'."

⁴⁰ Yam tang ing' rot Eun mae' tapae' na' ce na', Eun pun ri nyu buih it' nyum ce. Eun lah' a ri Petru' eun, "Kaw pe' ko' mae' Ui' ti nali yawo ka un' pun aw? ⁴¹ Punta kaw mi un' pun ri hk'uic' hk'a'naee hk'a' cop'long na', hk'o' mun' ko' reu'. Civit mi na' a saec' rangraen ri, daecti tu' mi na' a kaw'n kaw'l'reng kloe."

⁴² Eun tang heul' hk'o' mun' lal' pok ti pok. Eun lah', "A'kuiing', Ui' lawn kaw pon un' pun kaw' aen' na, Ui' kaw kah ri nyui a ko', kah a htonnuk hot' alo Mi na' reu'."

⁴³ Yam tang ing' rot Eun bae' na', Eun pun ri nyu kaw'n meung ce it' nyum ri kopti un' sum' plang' ce ngai' ri na'.

⁴⁴ Eun tae' ce, Eun tang heul' hk'o' mun' bae' loe' pok ti pok seun' pok nanggal' na'.

⁴⁵ Hawc' ko', Eun tang ing' ri tapae' na' ce. Eun lah', "Kaw'n meung pe' it' ri keului' ri aw? Keue' reu', yam ka na' rot a de. Kon' ai' peue na' kaw Eun pun fuin peue ri ap

ri nang tí ce peue map' na' hawc'. ⁴⁶ Kuh', heul' pawh. Ku' fuin Uí' na' ing' rot eun hawc'."

Mheut' ri ti Yesu' Eun

⁴⁷ Yam buih leukah' Eun na', Yu'das' ku' meuh tapae' hk'a'naee tapae' kul'leual' peue na' eun ing'. Peue jang' leungawng maeé' peue jang' hku' cum heun' na' ce ku hot' eun ing'. Peue cum awn' ce meuh peue ku' cus' ce ro' peue jhawp' rit keuting maeé' ro'kan nang kawt ce peue Yu'da na' ce. ⁴⁸ Ku' fuin Eun na' eun yeuh het' ka ri ce lah', "Uí' lawn huit' a'nhaw' ko', meuh ka hkawn' Eun hawc'. Mheut' ri ti Eun awh." ⁴⁹ Yu'das' eun keulawn' ing' ri Yesu' Eun. Eun lah', "Seura'." Hawc' ko', eun huit' Eun.

⁵⁰ Yesu' Eun lah' a ri heun, "A'mawo, yeuh ku' kaw mi ing' yeuh na' reu'."

Hawc' ko', peue awn' ce ing' mheut' Yesu' Eun. ⁵¹ Peue ut' maeé' Yesu' Eun ti peue na' eun htut' leungawng ri bhat' yhuk' eun mhai' eun peue jhawp' rit keuting na' deut.

⁵² Yesu' Eun lah' a ri heun, "Tang sawm' leungawng mi na' nang bhawk' ri na' reu'. Kopti peue jhawp' leungawng na' peue gawm'euc' kaw peue pun ri yeum ri leungawng na'. ⁵³ Hteum' mi Uí' lawn hk'o' A'kuiing' Eun cus' in'hpom kul'leual' muk ce keulawn' lih ko', a kaw un' cang aw? ⁵⁴ Daecti a lawn yeuh keutit' ko', a cí kaw cang meuh hot' seun' ku' lah' ka nang htawm Seunga' na' a lah', 'kaw a kah ri meuh yeuhki', na' yeuh sa'nhaw'?"

⁵⁵ Hawc' ko', Yesu' Eun lah' a ri peue muk heun' na' ce, "Meuh Uí' peue fuin kuing' aw, pé' vaeé' jang' leungawng jang' hku' ing' mheut' Uí'? Mok' Uí' ri sangsawn' nang kang' hkung' ka nya hk'o' mun' keuting na' keuyuit, pé' hkuin' mheut' ri ti Uí'. ⁵⁶ Daecti aen' ce gawm'euc' meuh a punta kaw a htonnuk hot' seun' ku' peue suip leukah' Eun Peucawo' lah' ri hk'a'naee htawm Seunga' na'." Hawc' ko',

tapae' Eun na' ce tecla Eun gawm'euc' ri. Ce hk'uiah hk'ai' Heun.

Yesu' cawng Eun nanggal' ce muk peue hk'om kan' na'

⁵⁷ Peue mheut' Yesu' eun na' va ce Eun heul' ri nya eun Kayafas' peue jhawp' rit keuting na' eun. Mawn' na' peue guil leukah' ritroe mae' ro'kan nang kawt ce peue Yu'da na' ce ing' hk'om puri ri ka. ⁵⁸ Daecti Petru' eun ut' vang ca ri seungai na' eun hot' Eun heul' rot ti kang' hkung' ka nya eun peue jhawp' rit keuting na'. Punta kaw eun nyu yawng ku' yeuh ce na' rot ti sut' ka na', eun ing' mok' mae' peue ko' nya na' ce.

⁵⁹ Ro' peue jhawp' rit mae' muk peue hk'om kan' na' ce co'ca' ri sok sa' hki' un' kue' un' meuh ku' kaw hk'o' toh Yesu' Eun na'. ⁶⁰ Daecti ce saec' kue' nang hkam' sa' hki' un' kue' un' meuh na' heun' peue, ce hkuin' nyu sa' hki' kaw hk'o' toh Eun saec' ti ceu.

Vang tisut' ka na' a kue' peue lah' peue ⁶¹ ka pucti hkam' sa' hki' lah', "Hkawn' lah' Eun, 'Ui' ri, cang yeuh Ui' nya hk'o' mun' keuting Eun Peucawo' na' lu. Hawc' ko', Ui' kaw tang pleng' a bae hk'a' nae ka loe' seunyi na'." "

⁶² Hawc' ko', peue jhawp' rit keuting na' eun kuh' cawng ri mhaing' Yesu' Eun, "Kaw Mi un' top' a saec' ti moeng aw? A' mu tang' peue ri Mi na', Mi ci' kaw lah' a yeuh sa' nhaw'?"

⁶³ Daecti Yesu' Eun dit' ti.

Peue jhawp' rit keuting na' eun lah', "Hk'a' nae muis Eun Peucawo' a' yu im' na' Mi na' hkam' lah' e' mhawng' a, 'Meuh Mi Hkrit[†], Kon' ai' Eun Peucawo' na' Eun aw?" "

⁶⁴ Yesu' Eun lah', "Euh, meuh Ui' seun' ku' lah' mi na' yeut. Ui' lah' a ri pe', hk'a' nanggal' na' kaw pe' pun ri nyu Kon' ai' peue na' mok' Eun hk'a' ti' a' tawm' Eun Cawo' ti' ca keuting na', mae' pe' kaw pun ri nyu lih Eun hk'a' nae putum' ka kuing' pang mao' na'."

† 26:63 26:63 A' ko' Mes' ya, nambat aet' 68 na' a ku yeuhki' yeut

⁶⁵ Hawc' ko', peue jhawp' rit keuting na' eun res hk'o ri na'. Eun lah', "Lah' Eun leukah' un' nawpsang ri Peucawo' Eun. E' ci' kaw'n kaw lo' sa' hki' keunhaw' na' bae? Keue', pun pe' ri mhawng' lah' Eun leukah' un' nawpsang ri Peucawo' Eun hawc'. ⁶⁶ Pe' ci' kaw kuit a yeuh sa'nhaw'?"

Ce top' a, "Kuing' Eun ri yeum."

⁶⁷ Hawc' ko', ce htueng' buh Eun na' ri nyel' ri. Ce klae' Eun. Ngon' ce dah Eun ri ti' ri. ⁶⁸ Hawc' ko', ce lah', "Hkrit, a'nhaw' ci' klae' Mi, cop, lah' a."

Petru' tecla eun Yesu' Eun

⁶⁹ Yam Petru' mok' eun nang kang' hkung' hk'a' nok ka nya na', beun' mhai' ti peue na' ka ing' lah' a ri heun. Ka lah', "Mi ri, ut' mi mae' Yesu' peue Galilae' na' Eun yeut."

⁷⁰ Daecti Petru' eun htu'hting' lah' a nanggal' ce peue heun' na', "Hpaw ui' ca' yawng ku' lah' pa' na'."

⁷¹ Hawc' ko', eun pucti heul' ri leuva' ru na'. Beun' mhai' ku' seubu na' ka nyu eun. Ka lah' a ri peue ut' mawn' na' ce, "Hkawn' eun ku ut' mae' Yesu' peue veng Nasaraet' na' Eun yeut."

⁷² Petru' eun tang htu'hting' ka bae. Eun hkam' a lah', "Hpaw ui' ca' yawng hkawn' Eun."

⁷³ Hawc' ka na' bae ti hk'ao, peue cawng keunam mawn' na' ce lah' a ri Petru' eun, "Neum, meuh mi cum ce ti peue yeut. Pal yawo mhawng' e' seng' leukah' mi na', yawng e' a."

⁷⁴ Eun tang sae' cae' hkam' a ri ti meun, "Hpaw ui' ca' yawng hkawn' Eun."

Yam awn' na, el' na' a keulawn' leuo'. ⁷⁵ Petru' eun kuit rot ri ku' Yesu' lah' Eun ri ti yeuh keuti' na', "Nanggal' el' un' nang leuo' ka na', kaw mi guil ri un' yawng Ui' loe' pok." Petru' eun pucti heul' hpum' sic' sawng' yam hk'a' nok na'.

27

Va Yesu' Eun heul' ri cawo' Pi'lat

¹ Yam ceng' ka na', ro' peue jhawp' rit maeé ro' kan nang kawt ce peue Yu'da na' ce kuit a deut kaw ri toh Yesu' Eun.

² Ce mawt ri va ri heul' ap Eun ri cawo' Pi'lat cawo' veng na' eun.

Yu'das' seurot' eun ngok ri yeum meun

³ Yam Yu'das' ku' fuin Yesu' Eun na' pun eun ri nyu taws' peue a mu kaw toh Yesu' Eun na', eun gal' ri hkoé hpum' sui nyawk'. Eun pin' leumuil leuoé'kul' htaep' na' keutah ing' tuil' a ri ro' peue jhawp' rit maeé ro' kan nang kawt na' ce. ⁴ Eun lah', "Yeuh uí map' na' hawc' kopti fuin uí peue un' kue' ku' kleuc' na' Eun rot ri htan yeum na'."

Ce top' a, "Aen' a cí ceu' ye ri yeuh sa'nhaw'? Lak' meuh a ku' yeuh meun mi a."

⁵ Kop awn' na, Yu'das' eun nyon leumuil awn' a hk'a'naee nya hk'o' mun' keuting na'. Hawc' ko', eun pucti heul' seurot' ngok ri yeum meun.

⁶ Ro' peue jhawp' rit na' ce seut' leumuil awn' a. Ce lah', "Leumuil aen' kopti meuh a leumuil ngos nham' na', uin' a maeé leumuil tan ka nya hk'o' mun' keuting na' kleuc' a leukah' ritroe na'." ⁷ Kop awn' na, ce sa'lit a deut kaw ti leumuil awn' a heul' leuvaee bhen' keute' ce peue pleng' keutong' na'. A kaw meuh bhen' keute' leumuic vang puing' ce peue veng seubu ing' ut' mawn' na' ce. ⁸ Kop awn' na, peue lah' bhen' keute' awn' a meuh bhen' keute' nham' rot seunyaen'. ⁹ Aen' a htonnuk hot' seun' ku' Yeramí peue suip leukah' Eun Peucawo' lah' eun na'. Eun lah', "Ti ce leumuil leuoé'kul' htaep' ku' meuh ngos ka tu' Eun na' hot' seun' ngos ku' peue Ísarela' ngon' na' tang' ce ri uin' a na' ¹⁰ a heul' leuvaee bhen' keute' ce peue

pleng' keutong' na' hot' seun' leukah' tuil' Eun Peucawo' ri ui' na'."*

Cawo' Pi'lat mhaing' eun Yesu'

¹¹ Yam Yesu' cawng Eun nanggal' eun Pi'lat cawo' veng na', cawo' veng na' eun mhaing' Eun, "Meuh Mi hkun'haw'hkam' ce peue Yu'da na' aw?"

Yesu' Eun top' a, "Euh, seun' a ku' lah' mi na' yeut."

¹² Yam ro' peue jhawp' rit keuting na' mae'e ro' kan nang kawt na' tang' ce a'mu ri Heun na', Eun un' top' a saec' ti moeng. ¹³ Kop awn' na, cawo' Pi'lat eun mhaing' Eun, "Buih tang' ce map' ri Mi na', un' mhawng' Mi a aw?" ¹⁴ Daecti Yesu' Eun un' top' a saec' ti moeng na'. Cawo' Pi'lat eun am' nyawk'.

Taws' a'mu yeum ri Yesu' Eun

¹⁵ Yam yeuh pawe vel nya na' a kue' ritroe cawo' veng na' plo'e' eun peue htawng' ti peue seun' ku' peue kuing' na' hk'o' ce na'. ¹⁶ Yam awn' na, a kue' peue htawng' tut seucen nyawk' muis Yesu' Barabas' ti peue. ¹⁷ Yam peue cum heun' na' ing' hk'om ce puri tiduih' gawm'euc' na', cawo' Pi'lat eun mhaing' ce, "Pe' ci' sum' kah ui' plo'e' a'nhaw' pun pe', Barabas' eun aw, a'ko' Yesu' ku' lah' peue meuh Hkrit na' Eun aw?" ¹⁸ Aen' meuh a kopti cawo' Pi'lat yawng eun ro' peue jhawp' rit na' ap ce Yesu' Eun ri ti kopti hko'e mang' ce Eun na'.

¹⁹ Yam cawo' Pi'lat buih mok' eun pang ten taws' a'mu ri na', beun' eun na' ka kah mhai' ri na' eun heul' lah' a ri heun, "Pawlaee heul' ceu' peue leupaws seumeu' awn' Eun. Kopti meuh a peue awn' Eun na', ui' leumu un' chak'. A yeuh ui' hpum' un' sam'ran nyawk'."

* **27:10** 27:10 Yahkari' 11:12, 13; Yeramí 19:1-13, 32:6-9

²⁰ Daecti ro' peue jhawp' rit maeé ro'kan nang kawt na' ce cu' peue cum heun' na' ce hk'o' cawo' Pi'lat eun ploé Barabas' eun, Yesu' Eun na' toh ri.

²¹ Cawo' Pi'lat eun mhaing' ce, "Pe' cí sum' kah uí' ploé nangnhaw' ri peue lal' peue awn' ka?"

Ce top' a, "Barabas' eun."

²² Cawo' Pi'lat eun mhaing' ce, "A lawn yeuh keutit' ko', Yesu' ku' lah' peue meuh Hkrit na' Eun, pé' cí sum' kah uí' yeuh sa'nhaw' ri Heun?"

Ce klawng ri lah' a gawm'euc' ri, "Tawk' Eun yeum pang kleum' rawng'tawp' reu'."

²³ Cawo' Pi'lat eun mhaing' ce, "A cí' meuh kop keunhaw'? Eun cí' yeuh ku' kleuc' keunhaw'?"

Daecti ce klawng ri lah' laws' a baeé, "Tawk' Eun yeum pang kleum' rawng'tawp' reu'."

²⁴ Yam cawo' Pi'lat nyu eun ka un' laee meuh na' daecti a na' keut' ri meuh ku' suksak na', eun ti leuum' hkuc' ti' ri nanggal' ce na'. Eun lah', "Hpaw uí' ca' kue' hk'a' kleuc' ri hk'a' yeum Eun peue aen' Eun. Kah pé' ti beus ka na' heul' meun reu'."

²⁵ Peue gawm'euc' na' ce top' a, "Kah hk'a' kleuc' ka hk'a' yeum Eun na' rot hk'a' pang ye maeé hk'a' pang kon'hk'i ye na' ce reu'."

²⁶ Hawc' ko', cawo' Pi'lat eun ploé Barabas' eun ri ce. Daecti eun kah peue ta'faet' Yesu' Eun. Hawc' ko', eun ap ce tawk' Eun pang kleum' rawng'tawp' na'.

Peue suik' na' lah' ce ri pleh keunyas Yesu' Eun

²⁷ Hawc' ko', peue suik' eun cawo' Pi'lat na' ce va Yesu' Eun heul' nang kang'hkung' ka haw' eun na'. Ce klawng peue suik' nang tawp' na' ce ing' cu ri rop Yesu' Eun gawm'euc' ri. ²⁸ Ce hpuic' hk'o Eun na', ce tuil' Eun cuip' hk'o dal' seurak' nyawk' na'. ²⁹ Hawc' ko', ce taing' nhul' kat' na' seun' cui'maw hk'il' na' ce chui'p' a ri cing' Eun

na'. Ce ti ri seué Eun jhawp' hkawn na' hk'a' ti' a'tawm' Eun na'. Hawc' ko', ce seukluin ri nanggal' Eun na'. Ce lah' ri pleh keunyas ri Heun, "Hkun'haw'hkam' ce peue Yu'da, kah Mi mun' keuting reu'." ³⁰ Ce htueng' Eun ri nyel' ri. Ce ti ri ta'faet' cing' Eun na' ri hkawn na' ti pok hawc' ti pok. ³¹ Yam hawc' ce lah' ri pleh keunyas Eun na', ce hpuic' ri tec hk'o dal' na'. Ce tang tuil' Eun cuip' hk'eung ri na'. Hawc' ko', punta kaw ce heul' tawk' Eun pang kleum' rawng'tawp' na', ce va Eun pucti heul'.

Tawk' Yesu' Eun pang kleum' rawng'tawp'

³² Yam buih puc ce ri heul' na', ce nyu peue ing' neum veng Sa'rin' ti peue na' eun. Eun muis Si'mon. Ce yat ri tec' eun klawm' kleum' rawng'tawp' Eun Yesu' na'. ³³ Yam rot ce vang lah' peue meuh Kolakohta' na' (vangdoh' ka na' a meuh "vang doh cing'"), ³⁴ ce ti ri tuil' leuum' plí' bui hkawo' ri maeé' jhin' na' ri Heun. Hawc' cim Eun a na', Eun hkuin' nyui a. ³⁵ Yam hawc' ce tawk' ri Eun pang kleum' rawng'tawp' na', ce cop puri gvah hk'eung Eun na'. ³⁶ Hawc' ko', ce mok' ri ko' kawm Eun mawn'. ³⁷ Hk'a' pang ka cing' Eun na', ce tem' tu' htawm tang' map' na' ri Heun. Ce tem' a lah', "Hkaen' meuh Eun Yesu', Hkun'haw'hkam' ce peue Yu'da." ³⁸ Ce ku tawk' peue con' lal' peue na' ka pang kleum' rawng'tawp' maeé' Heun, hk'a' a'tawm' Eun na' ti peue hk'a' a've' Eun na' ti peue yeut. ³⁹ Peue heul' ing' na' ce vai'vuit' cing' ri, ce lah' leukah' un' nawpsang ri Heun. ⁴⁰ Ce lah', "Cawo' ku' kaw yeuh nya hk'o' mun' keuting na' lu, hawc' ko' tang pleng' a hk'a'nae loe' seunyi na' Mi, teum'kawm htut tu' Mi na' meun reu'. Mi lawn meuh Kon' ai' Eun Peucawo' ko', lih hk'ai' kleum' rawng'tawp' na' reu'."

⁴¹ Ro' peue jhawp' rit, peue guil leukah' ritroe na' maeé' ro'kan nang kawt na' ce ku lah' ri pleh keunyas Yesu' Eun yeut. ⁴² Ce lah', "Eun teum'kawm htut peue ri

pun, daecti Eun hkuin' cang teum'kawm htut meun ti ri pun. Eun lawn meuh hkun'haw'hkam' ce peue ísarela' ná' kó', kah Eun keulawn' lih hk'ai' kleum' rawng'tawp' ná' maet'maen' reu'. E' ku ná' yum' Eun. ⁴³ Yum' Eun Peucawo' Eun. Peucawo' ná' Eun lawn kawn' lo' Eun kó', kah Eun teum'kawm Eun maet'maen' reu', kopti tup lah' Eun, 'Meuh Ui' Kon' ai' Eun Peucawo'', ná'." ⁴⁴ Saec' meuh peue con' ku' tawk' ri pang kleum' rawng'tawp' maeé' Heun ná' ka ku lah' leukah' un' nawpsang heun' ceu ná' ri Heun yeut.

Yesu' yeum Eun

⁴⁵ Tang' neum peunnyi rot hk'a'pul loe' nali ná', bhen' keute' ná' a duim'lawng euc'. ⁴⁶ Yam rot a hk'a'pul loe' nali ná', Yesu' Eun klawng ri lah' seng' laws', "E'lo'í, E'lo'í lama sabak'htani'?" Vangdoh' ka ná' a lah', "Peucawo' Ui', Peucawo' Ui', a cí meuh kop keunhaw' Mi vaeé' tecla Ui'?"†

⁴⁷ Yam peue cawng keunam mawn' ná' ce ngon' pun ce ri mhawng' leukah' awn' a ná', ce lah', "Klawng Eun E'li'ya eun."

⁴⁸ Hk'a'naee muk ce ná' peue ti peue ná' eun keulawn' hk'uih heul' ti nya tuetai cup a nang leuum' pli' bui na ná' eun pak' a ri hkawn ná' eun tuil' Yesu' Eun nyui a. ⁴⁹ Daecti peue seubu ná' ce lah', "Pawlaee cheun' Eun, E'li'ya eun cí ná' kaw lih teum'kawm Eun un' teum', e' ná' puing kó' ri nawk a."

⁵⁰ Yam Yesu' hawc' Eun tang klawng ri lah' seng' laws' baeé ti pok ná', Eun hpum' deut.

⁵¹ Yam awn' na, hpen' kang' nang nya hk'o' mun' keuting ná' a res meuh lal' glawk' neum hk'a'tuh rot hk'a'col. A in'san', seumu ná' ce a taic gvah' hk'ai' puri. ⁵² Keutui' leumuic ná' ce a duh'. Tu' yeum ce peue seunga' chak'

† 27:46 27:46 Suk'seun' 22:1

Eun Peucawó ná a tang áyu im' heun' peue. ⁵³ Hawc' ka yam Yesu' tang kuh' im' Eun ná, ce pucti lih hk'ai' keutuí leumuic ná. Ce huk' nang veng Yeru' salaem seungá chak' ná. Ce tuil' peue nyu ri heun' peue.

⁵⁴ Yam pó suik' maeé peue suik' ku' kó kawn Yesu' Eun ná pun ce ri nyu in'san' ka maeé ku' keut' meuh ku' seubu ná ce ná, ce tok'seupa lhat'. Ce lah', "Peue aen' meuh Eun taeng Kon' aí Eun Peucawó neumneum."

⁵⁵ Beun' ná ce ngon' ce ut' vang ca ri seungai ná, ce kó ri nawk Eun. Punta kaw ce kó ri yeuh mhai' Eun Yesu' ná, ce hot' Eun tang' neum kuing' Galilae' ná. ⁵⁶ Ce ri a meuh Mari' peue veng Magadala', Mari' ma ka Yakop' maeé Yo'saep maeé ma ce kon' me eun Yebedae' ná ce.

Puing' Yesu' Eun

⁵⁷ Yam kaw a hk'aws' fec' ná, a kue' peue meuneum ti peue eun ing' neum veng Ari'mahtia eun muis Yo'saep. Eun ku meuh tapae' Eun Yesu' yeut. ⁵⁸ Eun heul' hk'o' tu' Eun Yesu' ná ri cawó Pi'lat eun. Cawó Pi'lat eun ku tuil' leukah' ri tuil' Eun yeut. ⁵⁹ Kop awn' na, Yo'saep eun ti tu' Eun Yesu' ná lih. Eun bawl' tu' Eun ná ri hpen' linin seungá ná. ⁶⁰ Eun seué Eun nang leuang' jhec' ri meuh keutuí leumuic kawn' hk'u' is' heun meun ná. Hawc' kó, eun cut' ri dho' keutuí ná ri meul' seumu keuting ná. Eun keutah ing'. ⁶¹ Mari' peue veng Magadala' maeé Mari' nang seubu ná ka mok' ri ring nanggal' ka keutuí leumuic vang un' de un' seungai ka ná.

Kó kawn keutuí leumuic

⁶² Hawc' ka ná ti seunyi ná kó, meuh a seunyi hawc' ka seunyi rangraen ri kaw yeuh pawe ná, peue jhawp' rit keuting maeé peue Hparisae' ná ce va puri heul' ri cawó Pi'lat eun. ⁶³ Ce lah', "Cawó, kuit rot ye ri peue cang chí' lai aen' yam kawn' áyu im' Eun ná lah' Eun, 'Hawc' ka loe'

seunyi ná, Uí ná tang kuh' im'.⁶⁴ Kop awn' na, hk'o' mi tuil' leukah' kah peue suik' mi ná ce kó kawn keutuí leumuic ná meulamlam ri rot loe' seunyi. A lawn un' yeuh keutit' kó tapae' Eun ná ná ce cang ing' ra ri ti tu' Eun ná, hawc' kó ce ná cang eo' ri lah' hkaen' tang kuh' im' Eun hawc' ri peue cum heun' ná peue. Hk'a' chí'lai pok aen' a ná a ná cang lheu' reng nyawk' hk'ai' hk'a' chí'lai pok nanggal' ná."

⁶⁵ Cawo' Pí'lat eun lah' a ri ce, "Ti peue suik' kó kawn ná ce heul'. Kó kawn a reng meulamlam ri seun' ku' cang yeuh pun pé' ná reu'." ⁶⁶ Kop awn' na, ce heul' nom' nawk keutuí leumuic ná meulamlam ri tawk' a is' tá'rá' maeé' kah peue kó kawn a.

28

Yesu' tang kuh' im' Eun

¹ Hawc' ka seunyi Sin'^{*}, peunngup cawo ka seunyi nanggal' ka vung ná[†], Marí' peue veng Magadala' maeé' Marí' nang seubu ná ka heul' nawk keutuí leumuic ná.

² Yam awn' na, a keulawn' in'san' keuting nyawk'. In'hpom Eun Peucawo' ti peue ná eun lih neum kuing' pang mao'. Eun cut' ri tec meul' seumu dho' ka keutuí leumuic ná. Eun mok' hk'a' pang ka meul' seumu awn' na. ³ Ruprang eun ná a seun' cak'cal'. Hk'ohk'eung eun ná a paing seun' seudap' kó. ⁴ Peue kó kawn ná ce lhat' keuyuing' ri in'hpom ná eun. Ce yeum jawng.

⁵ In'hpom ná eun lah' a ri beun' lal' peue awn' ka, "Pawlaee lhat'. Yawng uí' heul' sok pá' Yesu' ku' tawk' peue yeum pang kleum' rawng'tawp' ná Eun. ⁶ Hpaw Eun cá' laee ut' maen'. Seun' lah' Eun ri uin' a ná, kuh' im' Eun

^{*} **28:1** 28:1 Seunyi Sin' ce peue Yu'da ná a meuh seunyi les e' ná. [†] **28:1** 28:1 Seunyi nanggal' ka vung ce peue Yu'da ná a meuh seunyi Sin' e' ná.

hawc'. Ing' nawk vang uin' peue Eun na' reu'. ⁷ Vaevaeae, pa' na' ing' lah' a ri tapae' Eun na' ce yeuh keuit', 'Kuh' im' Eun hawc'. Buih heul' Eun nang kuing' Galilae' nangg'al pe'. Kaw pe' nyu Eun teh'. Ui' lih lah' a ri pe' hawc'."

⁸ Kop awn' na, ka pucti lih hk'ai' keutui' leumuic na' vaevaeae. Ka ku lhat' ka ku ren' nyawk', ka hk'uih ing' ris tapae' na' ce mhawng' a. ⁹ Yam awn' na, Yesu' Eun keulawn' ing' leukah' mae' ka. Ka ing' jhawp' cung Eun na', ka faee' Eun. ¹⁰ Hawc' ko', Yesu' Eun lah' a ri ka, "Pawlaee lhat'. Ing' lah' a ri ec'awng' Ui' na' ce. Kah ce heul' nang kuing' Galilae' na' reu'. Kaw ce pun ri hk'eup' Ui' teh'."

Leukah' lah' ce peue suik' ko' kawn

¹¹ Yam buih ing' ka na', peue suik' ko' kawn na' ce ing' lah' ris lawng ku' meuh na' ri peue jhawp' rit keuting na' ce nang veng na'. ¹² Hawc' ka yam peue jhawp' rit keuting na' sa'lit mhe' ce hk'a' kan' na' mae' ro' kan nang kawt na' ce na', ce tuil' leumuil ri peue suik' na' ce heun'heun'. ¹³ Ce deun' ce, "Na' pe' heul' lah' a ri peue yeuh keuit', "Tapae' Eun na' heul' ra ce ri ti tu' Eun na' yam buih it' ye peunsum' na'. ¹⁴ Lawng aen' a lawn na' lhon' ri lec yhuk' eun cawo' veng na' ko', punta kaw a un' cang rot ri pe' na', ye na' lah' a tang' pe'." ¹⁵ Kop awn' na, peue suik' na' ce rap ri ti leumuil ce na', ce hot' ri yeuh a seun' ku' deun' ce na'. Lawng aen' a seutuin seutan laws' hk'a'naee ce peue Yu'da na rot seunyaen'.

Leukah' tawm' keuting Eun Yesu'

¹⁶ Tapae' kul'ti peue na' ce heul' nang kuing' Galilae' na'. Ce heul' rot ri gong vang Yesu' hpawt' Eun ce na'. ¹⁷ Yam nyu ce Eun na', ce nghup' ri faee' Eun. Daecti ngon' ce kawn' kangkae ri Heun. ¹⁸ Yesu' Eun sat ri ing' de ce. Eun lah', "Ti'ca ka kuing' pang mao' na' mae' bhen'

keute' na' gawm'euc' pun a ri ap ri ri Ui' hawc'. ¹⁹ Kop awn' na, pe' na' heul' yeuh peue ceu gawm'euc' na' peue meuh tapae' Ui' reu'. Tuil' hk'a' cum' na' ri ce hk'a'nae[‡] muis Eun A'kuiing' Kon' ai' mae' Cit' seunga' chak' na' reu'. ²⁰ Sangsawn' ce yum' leukah' sangsawn' Ui' ri pe' na' gawm'euc' ka. Kaw Ui' ut' mae' pe' laleung rot ti yam ka bhen' keute' aen' sut' ka."

[‡] **28:19** 28:19 Peue caee 8:16; Ro'ma 6:3; 1 Kaw'rinhtu' 1:13; Galati' 3:27

Plang
The New Testament in the Blang language of Myanmar

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

PDF generated using Haiola and XeLaTeX on 19 Oct 2021 from source files dated 14 Jul
2021

0468b0b5-acb2-59c4-92d3-4fa09a4d091c